

VAIASO PAIA – ESETA I SALAMO
Holy Week and Easter with the Psalms
2 O PESE O VIIGA: 2 Songs of Praise
“Saunia: Rachael Poolman”

Aso Sa Aperila 01, 2018

“**O le suafa e sili i suafa uma**” The name above all name.

Tusi Faitau: Filipi 2: 5 – 11

Matua: Filipi 2 ff 9-10, “*O le mea lava lea ua matuā faaeaina ai o ia e le Atua, ma foaiina atu ai ia te ia o le suafa e silisili i suafa uma lava; ina ia tootuli o tulivae uma lava i le suafa o Iesu, o e o i le lagi, ma e o i le lalolagi, ma e o i lalo o le lalolagi.*”

I le aso Sā o le Eseta i le aai Paia o lo’o ou nofo ai, sa matou feiloai ai ma matauina le toatele o e o loo asiasi mai I le nuu Paia, ma ua le mafai ona matauina I latou taitoatasi, ma e tofu lava le tagata ma lana tala. O le tala a le tagata lava ia i lana sailiga i le itu i le tino atoa ai ma la le agaga. O fea po’o faapefea foi ona o tatou fa’amanatu le Eseta, o le faaiuga o le vaiaso e tele sona tauā i le iloiloina o la tatou savaliga fa’alefaatuatua. A’o tatou savavali faatasi ma uso a Kerisiano, e mafai ona faasoa lagona o le tuanai ma le taimi nei. E mafai foi ona o tatou fetufaa’i i o tatou faamoemoega, ma mea tatou te fefefe ai i le lumanai, e faafogaina e le Atua.

I lenei vaitaimi o le tausaga faalelotu, e mafai ona tatou faailoa le tele o lagona e faatatau i le toetū o Keriso. E le faaititia le olioli loloto i lea tala lelei.

I le mau a Filipi, o loo faamanatu mai ai i ai tatou, po’o a lava ta’u tatou te ta’uina ai, o le atoatoaga lava o lo’o ia Keriso Iesu, o le mea lilo, o le toetu ma le faamoemoe ola. E i ai lava la’asaga fa’aleagaga e ao ona tatou uia, e le mafai ona o tatou savavali ma faamoemoe i tatou i ai tatou lava, ae ao ona o tatou tumau ma faalagolago i le Alii o le ola.

Tatalo : I lugā ma lalō, ma mea uma, ua toe tū Iesu, ia avea le toetū ma fa’aaau. **Amene.**

Aso Gafua Aperila 02, 2018

“Ou te pese i le Alii” I will sing to the Lord

Tusi Faitau: Esoto 15: 1 – 13

Matua: Esoto 15 f 11, *“Le Alii e, o ai ea se ua tusa ma oe i le vao atua? O ai se ua tusa ma oe, o lē silisili ona paia, o lē mata’utia i viiga, o lē fai vavega?”*

Ou te nofo i le motu e fetaia’i ma galuafi, galulolo ma afā, ma e le mautinoa le gasologa o suiga o le tai ma le siosiomaga. E faalua i le aso ona tapunia le auala i le alu agai i le taulaga, mo le ta’ilima itulā, ona o le fafati malolosi mai o galu mai Matū. I nisi o taimi pe’a pe le tai, e manino mai ai le gausia o le ala, ma fese’etai o le oneone.

Sa lagiina e Mose ma tagata Isaraelu se pese aualofa e faailoa atu ai lo latou agaga vivii i lo latou Atua, peitai ane o loo i ai le taufaamata’u i le ala e le mafai ona o’o i ai lo tatou iloa. E i ai le taimi e latalata mai ai le oti, ae peitai, ua latou maua le ola fou, ma ua tuanai atu mea faigata. Ua latou fiafia ma olioli loloto i ana meaalofa, ma talatala i le silisili ese ma le mata’utia o le Atua, ao lona faamaoni ma le tunoa o lona alofa. O suiga ma le vaaiga i le malaga a Isaraelu, na atagia ai i le ulua’i tusi Paia Eperu, o lo’o tatou mulimuli ta’i ai i ana tala, ae maise le malaga ai i le tino nei, ma malamalama i le Atua. O tagata ola uma, latou te nofoia ma faaogaina le foafoaga, ua ola ma maliliu ai nisi. O le galuega na tapena i tausaga, vai tausaga po’o seneturi e afua’ua ai.

E tali faapena foi le feseetai o le oneone i le matafaga, ma le tutu’i o le sua o le tai, auā e tele sona afaina i aso fai so’o. Ua valaaulia i tatou se’i o tatou matamata ma mata’ituina le faagasologa o le mata’isau ma le faatufugaga a le Atua Paia. Le Atua o le alofa lava ia.

Tatalo: I lenei aso, tatala lou loto ina ia mafai ona ou talia le meaalofa o le faafouina. Ia ou talia i le agaga o le faafetai ma le faamanu. **Amene.**

Mafaufauga Loloto: Ua toe faamanatu mai ia te au le tafeaga i le au (samī), e tai faapena le saveuina o le vai i totonu o se tanoa. O lea le uiga o le mulimuli i le au?

Aso Lua Aperila 03, 2018

“Fa’agae’etia lo’u loto” My heart exults.

Tusi Faitau: 1 Samuelu 2: 1 – 10

Matua: 1 Samuelu 2 f.2, *“E leai sē paia e tusa ma le Alii; aua ua leai se tasi ua na o oe; e leai foi se papa e tusa ma lo tatou Atua.”*

O le vaايا e Hana o le manumalo, talu mai tausaga e tele o le lototigā ma le agaga ootia ona o le taufaifai, se’ia oo ina ua ia maua le ola fou, ao le ola fou na fofoa i tua o le lototiga ma le faamoemoe ua tauau ina mou atu. O le viiga ona o le malamalama ma le paolo a’o le tutui mai o le pogisa o le soifuaga nei. O se pese o le agaga faafetai a’o le tologo a’e o se moemoe fou. O se tatalo e le gata mo ia, ae mo i latou uma o i le lalolagi ua taua e pā ma le fananau, ae maise ai le le faatauaina ai o isi tagata pei o ia. E maofa Hana ona o le paia ma le silisili ese o le Atua, e le taitai ona au i ai so tatou iloa. O le Atua o lona talitā ma lona ‘olo maualuga, e le mafai ona suia i peau lagavale o lenei olaga.

O lona mautinoa o lona Atua, e le mafai ona tofotofoina, a talia ma talitonu i ai le tagata ma le faamaoni, e leai se afaina. E ui lava o lona fa’atuatua ma lana viiga na fofoa mai i lona mafatiaga, ae na pua’ina mai meaalofoa fou, ma o le meaalofoa foi lea mo nisi tagata.

Tusa lava poo ua tatou sapi i faamanuiaga po’o maua foi i mafatiaga, poo se isi lava mea o tatou i ai, ia tatou manatua pea Hana i ana tatalo ma pese, ma lona a’afiaga i isi tagata.

Tatalo: Le Atua e, o le e ona le malamalama ma le paolo, fesoasoani mai ina ia ou iloa ona faafetai, ma ia ou iloa ona ta’uta’u atu i lau Afio mea ou te pologa ai, ma tatalo mo isi tagata, **Amene.**

Mafaufauga Loloto: O le a le malosiaga o lau tatalo i le taimi nei? Faaitiitia ni isi manatu, ae saili ni upu ma ni musika mai nisi mea, ma faaleo lau tatalo i se pese ia leo tele.

Aso Lulu Aperila 04, 2018

“Ia fiafia le lalolagi” Let earth rejoice.

Tusi Faitau: Salamo 96

Matua: Salamo 96 ff. 11-12a, “*Ia fiafia le lagi, ia olioli foi le lalolagi; ia ta'alili mai le sami ma mea ua tumu ai; ia fiafia lava le laueleele ma mea uma o i ai;*”

Pe a ma le sefulu tausaga talu ai, sa ou nofo ai i ni nofoaga maotua o Egelani – i Cumbria i Matu i Sisifo, ma Norththumberland i matu i sasa'e. O ni nofoaga e tu i auvae mauga, ma e le toatele ni tagata e nofoia ia nofoaga, ona o le afaina i mala faalēnatura. O ā lava fa'amoemoega o tagata, e fa'aleaogaina lava e galuega a le natura. Molimauiina e alii o le malō, le tausailia o tagata leiloloa i auvaemauga, leoleo o le gataifale ma isi ona ua le mafai e le telefoni feavea'i ona fesoota'i mai. A oo mai foi le puao tele, ua atili ai ona le iloa se mea. E iai foi taimi e oo mai ai lologa, e le gafatia e taavale tetele, le malosi o tafega ma lologa.

I le tusi a Lau Salamo 96, o lo'o faamatala ai e le fai Salamo le matautia ma le silisili ese o galuega a le natura. E ofo ai le loto, i le fesootai ai o tatou i le luasefulu tasi seneturi, a'o tatou taumafai e fia malamalama i le foafoaga a le Atua, i le fesouaina o le sami, o le tutupu ma le tofoga ae o laau. O se meaalofa a le Atua o loo atagia ai ana faamanuiaga, e ui tatou te le onomea ona faaogaina, ae faafetai i le faapogai o nei meaalofa uma. Faamanatu mai le fai Salamo, tatou pepese i le pese fou, ma tatou manatua o loo silasila mai le Atua.

Tatalo: A'o tatou fetaia'i pea ma suiga o le tau, o le vaitau o le ola, oti ma le toe fuataina, suiga e le o'o i ai lo tatou malosi, ae tatou te faalogo pea i le matai o le galuega, **Amene.**

Mafaufauga Loloto: Tatou matamata i le tofoga ae o le vao i le taeao ma le magumagu i le afiafi, o le faaliga lea o le natura o le Atua.

Aso Tofi Aperila 05, 2018

“Selesele ma le alaga fiafia” Reap with shout of joy

Tusi Faitau: Salamo 126

Matua: Salamo 126 f.6, “*O le ua alu atu ma tagi fano, o loo ave le saito e lulu, e foi mai lava ia ma le alaga fiafia, o loo au*”

mai ana fusi saito.”

O le tala o le Eseta o se tala tigā mo nisi pe a o’o mai vai tau o puapuaga ma mafatiaga i se aiga. Ou te manatua aso o le talavou a’o o’u faifeau i se tasi o aulotu, ao faia le sauniga o le Toe tū. ‘Ua Toe tū Iesu, Aleluia’. A o ou faasoa atu e tusa ai ma le autū, ae sa ou maitauina se tinā o le aulotu, i lona faanoanoa ma lona le fiafia, ona o se faalavelave na tupu i lona aiga. Sa ou manatunatu pe faapefea ona pese fiafia lenei tina i le toe tu, pe afai o loo mafatia. O lona lava aso Sa, sa ou maua ai se a’oa’oga tauā, o le Eseta o le manumalo ma fiafia mo nisi, ae o se aso faanoanoa ma le mafatia mo nisi. O le Aso Malii (aso Faraile) o se vaega o le aso Sa o le Eseta.

I le lau Salamo 126, o lo’o faamatala ai le fiafia ma le olioli ona o se seleselega manuia a’o faailoa mai e le Atua ana fuafuaga, ae maise o se taimi faigata mo Isaraelu. O lo’o i ai lava e o lo’o fa’aauu le tagi tu’i ma le auē. Faamatala e le fai Salamo e o loo naunau mo se faamoemoe fou, ina ia ola le fatu ua toto ma fua mai. E fia selesele foi latou ona ua tetele mafatiaga.

O le toetu, e le tasi sona faauigaina, ae faamoemoe e uiga lasi ma e talafeagai ma vai tau eseese o lo tatou soifuaaga. O le tala foi o le Eseta e le na’o le manumalo o se vaega o tagata ua leai ni faafitauli, ae o se pese e aofia ai tagata uma o e puapuagatia i soo se mafuaaga ma so’o se mea.

Tatalo: Le Atua alofa e, a’oa’o mai a’u ina ia ou iloa faamaumau aso lelei o lo’u olaga, ia faalogo ma le manino i lou auai mai, pe’a o’o mai puapuaga, ma ia ou iloa ona tatalo mo mafatiaga o isi, **Amene.**

Mafaufauga Loloto: Mafaufau i se tasi o loo i ai sona mafatiaga. O lea se taga e te faia e mapu ai le tiga o lona tagata?

Aso Faraile Aperila 6, 2018

“Laei o le Faaolataga” The garments of salvation

Tusi Faitau: Isaia 61: 10–62: 3

Matua: Isaia 62 f.3, “*E fai oe ma pale matagofie i le aao o le*

Alii, ma pulou o le tupu i le alofilima o lou Atua.”

O se uo mamae lava ia te a’u, e masani lava ona ia ta’ua le fuaitau lea, “Ia e manatua o oe o le fanau ua alofaina e le Atua”. Ua ou vaetamaina ai lena fasi fuaitau, o taimi uma lava ou te i ai i se potopotoga pe valaaulia foi a’u i se sauniga, poo se talatalanoaga faasamasamanoa, ou te t̄aua o latou suafa, ona ou faapea atu lea, “O outou o fanau ua alofaina e le Atua.” A mae’a, ona valaau lea i ai sei alala i lalo ma toe manatunatu, i le t̄aua ma le loloto o ia upu. O se faamalosi tino faaleagaga e malosi, ma e totogo ane ai manatu e tele, e tataua lava ona faaaoga ma le vaai mamao pe talafeagai ma le potopotoga, ae maise le siosiomaga. Peitai, o upu ia e ao ona tatou t̄t̄u ‘a’ai ai, pe afai tatou te mananao e ta’uta’u le suafa o le Atua alofa. E i ai taimi e pisi ai Kerisiano i le malaga o le faafouina, e galo ai meaalofa a le Atua. O le taimi tatou te faalogo i tofotofoga o le Tusi Paia, fai suiga ma ola ai. E i ai foi taimi tatou te le malilie ai, pe’a le taunuu nisi o faamoemoega. Ae aua nei galo, aua tatou te naunau tele i ai, auā ua silafia e le Atua lo tatou taumafai ma lo tatou naunau, aua o loo silasila mai pea o ia.

I le tusi a le Perofeta o Isaia, e le o mapu le taulogologo ma le faamanatu a le Atua i lona nuu, ina ia faamaulalo ma faato’ese ona o a latou agasala, e ui lava i lona tiga, ae le vavaeeseina ai lona alofa. O le alofa lava o le Atua o lo’o fa’aalia pea. E ui o se fanau le faamalieina ma le faalogogata i le Atua, ae onosai pea o ia ma taumafai e faailoa atu lo latou matagofie ma faasusulu atu a latou taleni mo le lalolagi ma faailoa atu o i tatou uma o fanau ua alofaina e le Atua.

Tatalo: Lenei aso le Alii e, ua ou mautinoa lou alofa le fa’atuaoia, fesoasoani mai ma faailoa au meaalofa ma o’u vaivaiga i le ao atoa ma le po, Amene.

Mafaufauga Loloto: Taumafai e faataitai le galuega faatino o loo tusia, tautino ‘O au o le fanau a le Atua.’

Aso Toanai Aperila 7, 2018

“E paia, e paia, e paia” Holy, holy, holy.

Tusi Faitau: Faaaliga 4

Matua: Faaaliga 4 f.8b, “*E paia, e paia, e paia le Alii le Atua e ona le malosi uma lava, o le na soifua, o loo soifua foi, o le a afio mai!*”

Afai e avea oe ma faifeau i le motu Paia, e i ai le manatu o tagata e tele sou silafia i mea paia. E i ai le manatu o le toatele e ona avea a’u ma tagata e i ai se tomai faapitua i le upu paia, ae ao foi ona atagia ma faaalua mai lenei paia i mea uma ou te faia, ae ou te masalo, o le naunautaiga foi lea mo i tatou uma. O le upu paia i lona faauigaina, e le fa’amatalatalaina i so tatou iloa, ma e le o’o foi i ai so tatou malosi. O le tu ai i luga o le elelea paia, o le faaali mai lea o le pupula ma ataata o le nofoaga paia, (Faaaliga 4). Ou te lei talitonu i lenei tusi i le manino o le faamatalatalaina o le lagi lea, ua matuā toto’a le silasila ma le faalogo a le tusitala, ua siitia le va’aiga mai le lalolagi tuai, i le ola fou fa’aleagaga.

O se pese fou ua liliuina ai le olaga tuai. E paia, e paia, e paia, o le Atua o ananafi, le asō ma a taeao o le a afio mai. E talitonu, tatou te le’i o’o i le totonugalemū o le paia ma le silisiliese o le Alii peitai, e i ai taimi tatou te maua ai meaalofa, ma lagona ai lona pa’i mai, ma tatou faapea ane, e matautia ma ofoofogia lona paia ma lona silisiliese. Ua tatou saili i nofoaga ma talosaga faifai pea i tupulaga a le tuanai poo nofoaga matagofie, ae peitai o loo pa’i mai pea le paia o le silisili ese i lea aso ma lea aso, faapei ona pai mai o le lagi i le lalolagi. O le lu’i, o le tatala lea o tatou loto sei faaulufale mai meaalofa paia a le Atua.

Tatalo: Le Atua paia e, o le e le au iai lo matou malamalama, o le ua liutino tagata, pa’i maia ma suia o a’u faaleagaga, ina ia mafai ona ou savali faatasi ma oe, **Amene.**

Mafaufauga Loloto: Tilotilo i lau faamaumauga, se avanoa e faaofi ai le agaga o le Atua i lou mafaufau ma lou loto.

Eperu – Hebrew

O Iesu le ositaulaga sili

(Jesus the true high priest)

“Saunia : Catrin Harland”

Aso Sa Aperila 8, 2018

“Usu se pese o viiga” Singing a song of praise

Tusi Faitau: Eperu 1

Matua: Eperu 1 ff. 3-4, *“O ia o le pupula o lona mamalu ma ua matuā tusa lava ma ia , o loo o faatumauina e ia mea uma lava i lana afioga mana, na faamamāina e ia lava a tatou agasala, ona nofo ai lea o ia i le itu taumatau o lē Silisili ese o i lugā; ua faapea ona silisili ese o ia i agelu, pei ona sili o lona suafa ua maua i o latou.”*

O le telē ia o le eseesea o tapuaiga Kerisiano tamau i faavae ma tapuaiga faa-kerisiano pei ona i ai i ona po nei. Ae peitai, e foliga mai o tapuaiga uma e amata i le valaau tapuai o le tunoa o le alofa o Iesu na alai ona tatou mafuta.

O le tusi a Eperu, o se tusi faamalosi, o le tusi lenei a Eperu o loo faapitoa lava i Iutaia - Kerisiano. O e o loo tumau pea i faavae ma mataupu silisili faa-Iutaia. Ae o Iesu na faataunuuna le tulafono.

E amata lava le tusi a le tama Eperu, i le viiga i le Atua, o le faamanatu o mea lelei uma ua faia e le Atua e ala mai ia Keriso Iesu mo lana fanau, ma le valaau o le viiga. Ona mulimuli mai lea ma mataupu e fa’ataata i le viiga o Iesu le silisiliese, na i lo mea o i le lagi, o le nofoa’iga ma le paia o le atalii o le Atua.

O le tele o nei tusitusiga o lo’o atagia mai ai galuega a le fai Salamo, ae maise ai le loloto o vi’ivi’iga a le tagata Iutaia e faatatau i le Atua. E toatele o i tatou e auai i tapuaiga lautele, o tapuaiga e amata i le viiga o le Atua, o nisi o viiga mai anamua o nisi e fou. A’o viiga uma e manatua ai le na maliu, ma toe tu mai mo i tatou. *“O le silisili atu nai lo agelu, auā e silisili’ese lona suafa i goa uma lava.”*f4.

Tatalo: Fai sau tatalo poo sau pese i au lava upu. Tatalo mo se tasi e le mafai ona faia se viiga i le Atua, **Amene.**

Aso Gafua Aperila 09, 2018

“Tautinoga ma Faamagaloga” Confession and forgiveness

Tusi Faitau: Eperu 2

Matua: Eperu 2 ff. 6-7, *“a ua faapea ona molitino mai i le tasi*

upu, Se a ea le tagata ua e manatu mai ai ia te ia; po’o le atalii o le tagata ua e asiiasi mai ai ia te ia? Ua e faamaulalo ane teisi o ia i agelu ; ua e faapale ia te ia i le mamalu ma le viiga;”

Tautinoga: E le o a’u o se fai solo e momo’o ai se tasi i a’u fātuga pei o fai solo ta’uta’ua. O le sefulufa o ou tausaga, na ou muai faitau ai i solo e faatatau i le alofa. O le uumi ma le felanulanua’i o le gagana o loo faaogaina e le fatu solo, sa fenumia’i ai ou manatu ma tauau ina ou matapogia ai. O se mea e pito sili ona tigā, o le ta’utinoga a le tamaitai tusi solo, ua faaleaogaina lona alofa ma e foliga mai o se tautinoga ua maoaluma. E leai se tasi ua matuā atoatoa, ae peitai e i ai lava lou manatu maualuga e uiga i le solo ae va’ai maualalo ai foi nisi. O le mafutaga lava fa’aleuō, ua matuā le aoga lava ia te au. Ae peitai, o se lagona faavae lea o nisi o tapuaiga.

O le aso ananafi, sa tatou talanoa ai i le naunau e vivii ma tapuai i le Atua, afai tatou te saili i le Atua ma lona natura ma tatou maua lona atoatoa, e tatau ona tigā ona o lo tatou le atoatoa. O le vivii la ma faamanu i le Atua, e lagona ai le fia ta’utino. E faapena foi le sootaga o le Eperu ma le Atua, ae maise lona Alo, o le so’otaga vavalalata foi lea o le Atua ma ona tagata. O le alofa o le Atua e le tusa ma tatou, ae afai tatou te tautino, e le o le toe tepa i le tuanai poo le tolaulau o sese, ae o le iloa ma le mautinoa o le tunoa o le alofa o le Atua.

Tatalo: Tatalo i le Atua ia fesoasoani mai i lo tatou le ‘ato’atoa. Fesoasoani mai le Atua ina ia mafai ona fa’aatoatoaina la tatou mafutaga ma le Alii, **Amene**.

Mafaufauga Loloto: I lenei vaiaso matamata i le matagofie o fofoga o le Atua e atagia i tagata taitoatasi. Manatua, e ui lava ina faaleagaina le faatusa o le Atua, ae o loo mautinoa pea lona alofa.

Aso Lua Aperila 10, 2018

“Ola faamaoni pei o tagata o le aiga o le Atua”

Living faithfully as members of the house of God.

Tusi Faitau: Eperu 3

Matua: Eperu 3 ff 14 -15, “*Auā e mafuta faatasi o i tatou ma*

Keriso, pe afai tatou te taofi mau lava i lo tatou muai faatuatua e oo i le gataaga; manū o fai mai, O le aso nei afai tou te faalogo ai i lona siufofoga, aua tou te faamaaa i o outou loto, pei ona faia i le finauga.

E foliga mai o fanau uma lava e misa ma vevesi lava latou ia, e le alofia ai ma la’u fanau. E foliga mai o le latou misiona, o le faatiga ma faavevesi o i latou lava, ae maise ai a’u. Ae i ai le isi itu o le mafutaga lea, A i ai se mea e tupu mai se tasi o i latou, ona o latou omai faatasi lea ma le agaga e tasi e fesoasoani i le uso ua mafatia, latou te puipuia pe afai e manaomia, e o’o lava ia latou seleni, latou te ofoina atu mo le uso. A mae’a foi, ona toe foi lea i le femisaa’i ma le vevesi masani..

E atagia mai le tusitala Eperu, o le tusi lenei o loo faapogai i le ata o le aiga ma le nuu lotogatasi. O le aiga po’o totino o le aiga fa’a-Eleni ma le faa-Roma, e le gata i matua ma fanau, ae maise auauna ma pologa. E to’atele totino o nei aiga, ma ua maea mavaevae ona tulaga. O nisi e maualuluga, e i ai foi nisi e maualalo lo latou soifuaga o loo ola ai. O lo’o faapenā ona aumai e le tusi a Eperu le faataitaiga o le auauna faamaoni o Mose ma le atalii faalogo o Iesu lea, ma le nu’u faalogogatā o Isaraelu i le vaitau o le Esoto.

Ua valaaulia i tatou e avea ma totino o le aiga o le Atua. Afai tatou te talia le valaau, e ao ona tatou taumafai e ave atoa lo tatou atoatoa i le ulu o le aiga ae maise le atalii, aua e faamaoni lava le Atua i lana fanau, ma tuu atu i ai le mamalu atoatoa. Ae o le fesili tele, tatou te faamaoni ea ma faatuatua pe’a avea i tatou ma totino o le aiga o le Atua?

Tatalo: Le Atua e o le alofa ma malō, viia lau afio ona o avanoa lelei na avea i matou ma totino o lou aiga. Ia faatupuina lo’u faatuatua i o’u uso ma tuafafine, ae maise lau afio na e mua’i taliaina i matou, Amene.

Mafuafauga Loloto: O lea le uiga ia fa’aaloalo ma faatuatua i le Atua? O a uiga faaalii o totino o le aiga o le Atua?

Aso Lulu Aperila 11, 2018

“Mapu i aao o le Atua” Rest in the arms of God

Tusi Faitau: Eperu 4

Matua: Eperu 4 ff.15-16, *Auā e le ia te i tatou se ositaulaga sili e le mafaia ona tiga alofa faatasi ma i tatou i o tatou vaivai, a ua faasoosoina o ia i mea uma pei o i tatou, a ua leai se agasala ia te ia. O le mea lea ia tatou faalatalata atu ai ma le loto tele i le nofoālii o le alofa tunoa, ina ia alofaina ai o i tatou, ia maua ai foi le alofa tunoa e fesoasoani mai i ona aso e tatau ai.*

E le mafai ona tatou taunuu i se taunuuga lelei ma le manuia, pe'a o tatou le galulue malosi, o le ala fua lava lea na a'oa'oina mai ai tatou ao laiti. Atonu o le mafuaaga lea e ināinā ai le atunuu i e o lo'o ola faalagolago i tupe ma auunaga maua fua mai i le malō. E i ai taimi tatou te masalosalo ai i ē le tatau ona latou maua ia faamanuiaga. E faapenā manuia o tagata ta'aalo ona o lo latou faamaoni, tautiga ma galue pea seia o'o ina maua le pine auro, faapea i latou o loo latou faatuina matāti'a i ta'aloga. E maofa lava le agaga ona ua latou selesele mea na latou luluina.

Ae ese la le mau a le au Kerisiano. O le soifua ma le maliu ma toetū o Iesu Keriso, o se tala o lo tatou faamagaloina, e le fuaina i sa taua aga ua sao ma tonu, ae o le alofa e foai fua. Na ia ofoina le agaga o le fa'amalolo, alofa ma agalelei e aunoa ma le fesiligia o sona tau i mo tagata ia faaolaina. E foliga mai o le tele o ia meaalofo taua, ua foaina e aunoa ma sona mafuaaga e taofiofi mamau ai. Ae peitai, e manomia le tatala o lou loto, e faaulufale atu ia meaalofo foai fua.

O Sakaio sa lei alofaina ma taliaina ona o suiga na ia faia, ae ua ia olaina ma talia Iesu ma lona alofa. E talafeagai ma le tusitusiga a le tusitala Eperu, o lo'o ta'u atu, aua nei naunau galue ina ia maua ai se tau i faasili, o lo'o faailoa atu foi ina ia aua nei naunau i ni tauiviga e taunuu ai i se atoatoa. Ae peitai o loo faamanino mai e le tusitala ina ia faalogologo i le siufofoga o le Atua ma tatala o tatou loto, ma aaoaina ia faalagolago i le alofa tunoa o le Atua. E le faamasinoina i tatou fua i le maualuga ma le maoa'e o ni matati'a ua tatou ausia, ae faamasinoina i tatou i le malosi o lo tatou naunau atu ina ia o tatou sao atu i le malo o le Atua. E faamasinoina foi i tatou, e fua i lo tatou agalelei atu i le naunautauga e ofo atu se

auaunaga e aunoa ma sona tau. E i ai le upu e faamatala ai “Alofa Tunoa”.

Tatalo: Le Atua e, foai mai le filemu ma le tumu, e mafai ai ona ou faalogo ma faia lou finagalo i galuega faigata ona faataunuaina, **Amene.**

Mafuafauga Loloto: Pe ana o tatou o Sakaio, i nisi o taimi e valaauina i tatou ia galue malosi ma le le faalogologo tiga. E faapefea ona e taliaina le faatuatua e faaaupagaina oe mo lena faamoemoe?

Aso Tofi Aperila 12, 2018

“O agavaa lelei o le ositaulaga” The qualities of a priest.

Tusi Faitau: Eperu 5

Matua: Eperu 5 ff. 8-10, *E ui lava o ia o le Alo, a o mea sa tiga ai o ia na a'oa'oina ai o ia ia usiusitai, ua faaatoatoaina foi o ia, ona ave a lea o ia ma tupuga o le faaolataga faavavau ia i latou uma o e usiusitai ia te ia; ua ta'ua e le Atua o le ositaulaga sili, e uiga faatasi ma Mekisateko.*

O le tu'ufa'atasiga lenei o upu a le tamaloa tusitala o Tomasi Atamu e faatatau i le sailia o se ta'ita'i lelei. “O i latou uma e fia taitai, o i latou foi ia e le talafeagai mo le galuega.” O le uiga o lenei fasi faitau, ona o le mafuaaga lea e alai ona fia ta'ita'i o le pule lava, ae le o se fia ola auauna atu. Ou te lagona, ua iloa lelei e le tusitala Eperu le leaga o lenei mea. E oo lava i se ositaulaga lelei, na te iloa pe afai ua tele ana agasala. E ao ona fa'amaulalo, faatoese ma fai se taulaga o le faamagaloga. So'o se faitaulaga sili, e le naunau i sona mamalu faaositaulaga, ae mamafa ia te ia lona soifua auauna. Soo se ta'ita'i lelei po'o se failotu lelei, e le taitaiina i lona tomai po'o lagona, ae naunau i fautuaga ma lesona na a'oa'oina ai. E maua e ia le loto maulalo e ta'utino ai se poto itiiti na te iloa, ma o lea tali atu o ia i le valaau fa'ata'ita'i o le ave a ai i lenei tofiga poo lea tulaga, faapei o se mea tumau.

O Iesu lava ia o se ata fa'ata'ita'i o le tulaga ta'ita'i. Ua tofia o ia e fai ma ositaulaga sili, ae na te le'i faaogaina lena tofiga e sailia ai lona mamalu. Na ia maua le loto maulalo e auauna ai,

ma olopala ai ma lona loto maulalo. Na ia olaina le upu na ia folafola atu, “*o se fia muamua foi ia te outou, ia fai o ia ma a outou tautua*” (Mataio 20:24-28) O lona valaauina o le ositaulaga sili, o le faailoga o lona olaina o lana valaau.

Tatalo: Le Atua e, le faatonutonu folau, faailoa mai e oe ala e avea ona matou auaina atu ma le faamaoni. Agalelei i e o loo galulue pea ma faailoa oi matou o ta’ita’i le atoatoa ae o le auainaga i tagata, **Amene.**

Mafaufauga Loloto: O fea o loo vaaia ai faaiuga faalealofa i ta’ita’i? O fea o loo vaaia ai faaiuga le talafeagai i taitaiga ai latou ua avea ma taitai? E faapefea ona e faafeiloaia ia ituaiga taitaiga?

Aso Faraile Aperila 13, 2018

“Fa’aatoatoa i le alofa” Perfected in love

Tusi Faitau: Eperu 6

Matua: Eperu 6 ff. 11-12, *A ua matou mananao tele ina ia outou taitasi ma faaali mai lea lava filigā, ina ia mautinoa le faamoemoe e oo i le gataaga; ina ia le paie, a ia faaa’oa’o i e ua maua i le faatuatua ma le onosai mea na folafolaina.*

E i ai le manatu, o se iloa itiiti o se faafitauli tele lea. I nisi vaega o le soifuaaga, o se iloa itiiti, o le agaga faafetai lena, auā e i ai le taimi e galo ai ma le iloa se mea. E le o a’u o se foma’i (Biologist) o le tino, ae ou te iloa ona tausī lelei lou tino ina ia maloloina. E le o a’u o se tagata iloga se tomāi fa’a-komepiuta, ae mafai ona ou foia faafitauli o le komepiuta pe a tula’i mai, ona o se poto itiiti ua ou maua. E le mafai foi ona avea i tatou ma tagata ua atoatoa i ai ni taleni po’o ni agava’a i lea matātā i lenei lalolagi. O le ala lea tatou te faafetaia ai taleni ma meaalofoa a nisi ona e fesoasoani ma fa’alatele ai lo tatou iloa. Atonu foi e iai so tatou tomāi faapitoa e faavasega ai mataupu tau i fanau, ma faamafanafana ai i uo mafatia ma manaomia lau fesoasoani, ma e ao ona ofo ai lou atoatoa.

E iai le vaega o le soifuga tatou te vaai mama i ai, ao nisi e ao ona ave iai le faamamafa. O le tasi o ia vaega e tatau ona toto’a i ai la tatou sailiga, o le mafutaga lea ma lo tatou Atua e ala i lona alofa tunoa.

Molimau le tusi a Eperu, e le o fuaina le alofa o le Atua i ni matati'a ua tatou ausia, ae iloiloina i tatou i lo tatou taliaina o lona alofa tunoa, ae le taofia ai lo tatou saili pea i le Atua e tusa ai ma lona alofa mai, ma mafai ai ona tatou fesoota'i atu ai i o tatou tuaoi. E le fuaina le alofa o le Atua i so tatou atoatoa, a'o le alofa o le Atua tatou te naunau ai ia te ia.

Tatalo: Le Atua e, o le 'ato'atoa, a'oa'o mai i matou ina ia mafai ona o matou alolofa i lau afio ma saili i lou atoatoa, **Amene.**

Mafaufauga Loloto: Fai se mea se tasi e tali atu i le Atua ma lona alofa, fai se tatalo, faaali lou alofa i se isi tagata, po'o le faaoga se agavaa o ia te oe e auauna ai i le Atua.

Aso Toonai Aperila 14, 2018

“Taimi ma taulaga: lagolago le galuega a le Atua”

Time and tithes: support the work of God.

Tusi Faitau: Eperu 7: 1-14

Matua: Eperu 7 ff. 1-2, *Auā o lenei Mekisateko, o le tupu o Salema, o le ositaulaga a le Atua silisili ese, o le na fetaiai ma Aperamo ina o foi mai o ia mai le fasiga o tupu, ma na faamanuia atu ia te ia; sa foi atu foi e Aperamo ia te ia mea e sefulu a'i o mea uma. O le uiga muamua o lona igoa, o le tupu o le amiotonu, i le ma le tupu o Salema o le tupu o le filemu lea.*

O le sefulua'i o se masani ua tele ona feteena'i i Ekalesia. E i ai aulotu ua tele lo latou tamaoiga ona o lo latou foa'i. Ua masani lava latou i le foa'i ma le lotu malie. O lā latou mau, e ao ona vaevae tutusa pasene o sefulua'i, ina ia laugatasia uma ai tagata lotu, fua i le tupe maua a le tagata(income). E ese ai le mau a nisi, fai mai, o le sefulua'i, o le a avea ma faamamafa i tagata lima vaivai, ae o le avanoa e faalialia ai e malolosi, o le a punitia ai isi foi ese mai le sefulua'i, ae tutusa lava lona taua i le galuega faaleagaga. Ae ui i lea, e foliga mai ua tatou masani lava i le ola foa'i. Po'o leā lava le mafuaaga ma le lagona i le sefulua'i, o le foi lava ia o se vaega o le ola kerisiano.

I le tusi sa o tatou faitauina, o lo’o ta’ua ai le faaeaea o Aperaa mo ia Mekisateko, le ositaulaga ma tu’u ai le mea e sefulua’i mea e ala i le fasi fanua. O le ofoina atu o o tatou ola po’o o tatou nei totino, o le auala lelei lea e faaalua ai lo tatou faaalalo i le Atua ma lē ua ia valaaulia e fai ma ta’ita’i. Atonu, o le foai ma le tatou ofoina atu o le fa’aaloalo foi lea ma le alofa ia Keriso, o ia o le ositaulaga ua tusimatuaina ‘*ua fai o ia ma ositaulaga sili e faavavau, e uiga faatasi ma Mekisateko*’ (Eperu 6:20). O le alofa foi lea i e o lo’o galulue ma folafola ma talai lona finagalo.

E toatele e i ai taleni ma meaalofa eseese, atoa ma e tele oloa ae maise le tamaoiga o le eleele ma isi lava mea. Ae o le mea taua o le foai ma le fiafia, saoloto ma le faatuatua. Fai ma le alofa mea uma, o le ola kerisiano lena.

Tatalo: Le Atua agalelei e, a’oa’o mai a’u ma ia ou maua le agaga o le foai mo oe ma lau galuega. A’oa’o mai ia ou olaina le tunoa o lou alofa, **Amene.**

Mafaufauga Loloto: O leā sou lagona i le sefulua’i? O lea se mea e mafai ona e faia pe foa’i atu, manatua o le foa’i e le na’o tupe, ao lou taimi, o lau tatalo ma au galuega. O fea e taula’i i ai lau foai?

EPERU – Hebrew

2 O le Feagaiga Fou – 2 The new covenant

“Saunia : Abraham Mathew”

Aso Sa Aperila 15, 2018

“Ositaulaga ua ofoina atu e ia o ia lava”

Self –sacrificing priest

Tusi Faitau: Eperu 7: 15 – 28

Matua: Eperu 7 f. 27, ...*e le aoga ia te ia i aso fai soo, pei o ia ositaulaga, e muamua ona fai o taulaga mo ana lava agasala, ona fai ai lea mo agasala a le nuu; auā ua atu tasi lava ona faia e ia o lea mea ina ua avatua o ia e ia ma taulaga.*

O le upu ‘feagaiga’ o se malilie ma e aofia ai ma le upu ‘tautino atu’ i le va o ni vaega se lua po’o ni tagata se toalua.

O le maliliea poo le feagaiga a le Atua ma le tagata, o se tasi lea mataupu faavae o le Tusi Paia. I le feagaiga Tuai, sa tatou molimauina ai le feagaiga a le Atua ma Noa, Aperaamo ma Isaako, ae maise le nu'u o Isaraelu. O le feiloaiga a le Atua ma Mose i le mauga o Sinai, faapea ai le feagaiga na tauto ai ia Isaraelu e fai o ia ma o latou ta'ita'i, pe'a o latou savavali i le feagaiga ma le faamaoni. O le au ositaulaga sili latou te faia taulaga mo le faamagaloina o agasala ma isi tapuaiga.

I le feagaiga fou, o lo'o faamatalaina ai e Iesu lona soifua ofoina atu ma faavaeina ai se feagaiga fou, ma faamagaloina ai a tatou agasala. E le o so tatou poto, malosi ma se iloa ua faatumauiina ai lea feagaia, ae o le tunoa o le alofa o Keriso ua tatou penei ai. Ua valaauina i tatou e Iesu, ina ia mulimuli ma faataitai i le ola ofoina atu i lenei vaitau, e faailoa atu ai le alofa laveai o le Atua i se ua puapuagatia ona o le agasala, ma o loo iai se manaoga e faamalosia ai e o lo'o olopalaina ma tuulafoaina i lea tupulaga ma lea tupulaga ma ia saga unai ma faamalosia i latou, 'latou te mafaia'.

Pe mafai ea ona ofo atu lo tatou tamaoaiga ma o tatou tagata atoatoa, ina ia mafai ona siitia tagata pologa ma e saisaitia ina ia mafai ona o latou tofo i le ola faafouina?

Tatalo: Le Atua e, o le aumaia le feagaiga mautu, faafetai mo le faaolataga, avea i matou ma taulaga ola mo lou malō, **Amene.**

Aso Gafua Aperila 16, 2018 “Ala fou e tapuai ai”

New way of living

Tusi Faitau: Eperu 8

Matua: *Eperu 8 f.6, A o lenei ua maua e ia le faiva e sili, e pei ona faia o ia ma puluvaga o le feagaiga e sili ona lelei, o le ua faamauiina i mea na folafolaina e sili ona lelei.*

E ui lava na atoatoa le faamoemoega na fuafua ai le uluai feagaiga, ae na le tausisi le tagata i le tausia o le maliliea ma le Atua. Fetalai le Atua e ala ia Ieremia, ina ia perofeta atu le feagaiga fou e sili atu. Fai mai o le a le toe tusia se tulafono ae sili le teuina i le loto. O lea le toe fai atu le tasi i le tasi “*Ia*

outou iloa le Alii' aua e iloa a'u e i latou uma lava."(Jeremia 31:34). E ese le olaina, ese le folafolaina o le upu.

I le atunuu faapei o Initia, e tele gagana, tele talitonuga eseese, tele aganuu tele foi auala, e folafola atu ai le tala lelei, peitai ane o loo i ai foi feteenaiga ma nisi o talitonuga, o loo tuuaia le talitonuga Kerisiano i le liliuina o latou tagata. Peitai ane, tele ni tala e le o faailoaina o kerisiano o loo ofoina la latou auunaga mo e mama'i, matitiva atoa ma e ua leai se faamoemoe ona o le pule sau a nisi. Latou te le talaina le upu ae latou te olaina pei ona atagia ia Iesu ma latou talia Iesu e avea ma o latou Alii ma le faaola.

I nai tausaga ua mavae atu, na ou ulufale atu ai i se ofisa o le malo o Initia mo se fesoasoani i la'u mataupu tau le lotu. Na feiloai ma se taitai sinia o le ofisa o aoga, ma ave ai au i lona potu ma ou faamatalaina i ai lau mataupu, ae faamatala ai i se tasi o aoga Katoliko na aoga ai, ma le sao o se patele na suia ai lona olaga i lana molimau. Sa faaali mai ia te au lana Tusi Paia, ma ia faailoa mai, "E le o au o se kerisiano, ae faitau la'u Tusi Paia i aso uma, ma ou fia pei o Iesu.

Tatalo : Le Alii e, a'oa'o mai i matou ina ia mulimuli i le feagaiga fou, ma savavali i lou finagalo i nofoaga ua e tofofi ai matou ma atagia ai foliga o Iesu, **Amene.**

Mafaufauga Loloto: E to'afia ni tagata na tapenaina oe e ala ia latou faataitaiga? Ma e toafia i latou ua mautu o latou olaga ona o sau faataitaiga?

Aso Lua Aperila 17, 2018 "Ala fou e tapuai ai"

New way of worship

Tusi Faitau: Eperu 9 : 1-14

Matua: *Eperu 9 f.14, ... e le sili ea ona faamamāina o outou loto fuatia ifo ai galuega e oti ai, i le toto o Keriso, o le na avatua o ia e ia i le Agaga faavavau e fai ma taulaga e le ponā i le Atua, ina ia outou auauna i le Atua soifua?*

O le fale fetafai o le fale ie na fesi'ita'i e Isaraelu mo a latou tapuaiga, a'o le'i faia le malumalu. O le atolaau o lo'o i ai le feagaiga (papa ma'a o tulafono a le Atua na tuuina atu ia

Mose), sa taoto i le vaega e silisili ona paia o le fale fetāfa’i. Ua na o le ositaulaga sili e faatagaina ona ulufale i totonu o le mea paia, i taimi o tapuaiga, pe a mae’a le ofoina o le taulaga o le faamamaina e le gata mo ia, ao tagata uma. E i ai le talitonuga, e le mafai e le tagata agasala ona feiloai atu i le Atua, sei vagana ua faamamaina e ala i taulaga ma tapuaiga. Ae peitai, ua tatou molimauina e ala i tusitusiga, e le mafai e nei taulaga ma sauniga, ona faamamaina le agaga leaga mai tagata tapuai.

I le feagaiga fou, molimau mai le tusi a Eperu, o le toto o Iesu Keriso ua atoatoa ai lo tatou faamamaina. Ua faamamaina ma ua tu’u saoloto i tatou mai le agasala, ua mafai ona o tatou omai ma le le masalosalo e tapuai i le Atua Paia. E le ona ua tatou paia ma lelei tatou te tutu ai i luma o le Atua, peitai tatou te faalagolago i le alofa tunoa e ala ia Iesu Keriso. Afai e tautino a tatou agasala ta’ito’atasi atoa ai ma faapotopotoga, ma faalagolago i le fesoasoani mai o le Agaga Paia, ia tatou manatua, o upu ma faatinoga, e mafai ai ona galulue ma le manino. E le pine ae faamamaina i tatou. O le ola māmā ma le pulea lelei, o le a fesoasoani e vivii i le agaga ma le faamaoni, ma ia pua’ina mai ai le matagofie o le ola ofoina ma faapaiaina mo le Atua.

Tatalo: Le Alii e, ua matou omai i ou luma ma le mautinoa e tapuai ai ona o le toto o Iesu Keriso. Alofa mai ma fesoasoani ia matou maua le olioli ma le fiafia moni iā matou tapuaiga, **Amene.**

Mafaufauga Loloto: O faapefea mai le ola tapuai o lau aulotu i nei ona aso? O atagia le gagana o le tusi a Eperu, i lau tapuaiga pe leai?

Aso Lulu Aperila 18, 2018

“Folafolaga fou” New promise

Tusi Faitau: Eperu 9: 15 – 28

Matua: Eperu 9 f.15, *O le mea foi lea o loo fai ai o ia ma puluvaga o le feagaiga fou, ona o lona maliu foi e togiola a’i agasala na faia a o i le muai feagaiga, ia maua ai e i latou ua*

valaauina o le tofi faavavau na folafolaina.

A’o felafolafoa’i pea tagata i le ola tala atu o le oti pe moni pe leai, e ‘ese’ese talitonuga i lenei mataupu peitai, pau le mea mautinoa e i ai le ola i tua atu o le oti. O lo’o talanoa le talitonuga Initia (Hindu), i le toe fanaufouina o le agaga, ae fai mai le talitonuga o le au kerisiano, e iai le ola e i tala atu o le oti, e faatasi ai le agaga ma le Atua na faia o ia.

E masani ona alu la’u asiasiga fa’afaifeau e asia ni tagata ua ogaoga o latou gasegase. O nisi o i latou ua agai ina malolosi, ao nisi ua pulapula la goto ma ua lagona le le mautonu, po o fea e agai i ai le lumanai. Ua ou matauina foi nisi ua tauau ina mou le faamoemoe e faavae i o latou talitonuga ina ua mou atu nisi oe pele i ai latou.

O lea lenei faamoemoe fou? O le feagaiga fou lea, tatou te maua ai le ola mai le Atua e faaauau ai tala atu o le oti. *“O le ola faavavau foi lenei ia latou iloa oe le Atua moni e toatasi, atoa ma le ua e auina mai, o Iesu Keriso lea.”* (Ioane 17:3). O lenei faamoemoe pe afai ua tatou taliaina ma talitonu o Iesu o le Alo o le Atua, ma ia alolofa ma usiusitai ia te ia. I le ola ai i le olaga ua ofoina mo Keriso, o le faamoemoe ola lea o le alofa ma le usitai ia Iesu Keriso.

Ina ua mautū le mafutaga lea, fai mai Paulo i ona toe aso *“Ua ou tau le taua lelei, ua iu ia te au le tausinioga, ua ou taofi i le faatuatua. O lenei, ua teuina mo a’u le pale o le amiotonu, e foaiina mai ia te a’u i lea lava Aso e le Alii le faamasino amiotonu; e le gata foi ia te au, a o i latou uma lava o e fiafia i lona faaali mai”*(2 Timoteo 4: 6-8). O le ola e faavavau o le meaalofa foai fua mai le Atua, tatou te le faamasino po’o ai i latou e agava’a i ai, po’o ai foi e le saofāgā i ai, ae ao ona tatou ola matata’u ma le lē faagae’etia i le taitaiga a le agaga o le Atua, ina ia mautinoa la tatou mafutaga ma lo tatou Atua ae maise le au paia.

Tatalo: Le Atua o le faavavau e, matou te faafetaia lau afio ona o le mautinoa o le ola faavavau. Fesoasoani mai ina ia mafai ona matou ola tusa ma lau valaau. Avea i matou ma tausii mea lelei o lau foafoaga sei oo i le toe manava, **Amene.**

Mafaufauga Loloto: E faape’i foliga alofa ma le faamoemoe o le Atua, i totonu o se potu o loo taotoo ai ni ma’i tigaina?

Aso Tofi Aperila 19, 2018

“Taulaga fou: O le tuuina atu atoa”

New offering: commitment

Tusi Faitau: Eperu 10: 1 – 18

Matua: Eperu 10 ff.8-10, *Ua muamua ona fetalai mai, O manu fasia, o taulaga foi, ma taulaga mu, ma taulaga mo agasala ua e le finagalo i ai, ma e le fiafia i ai-o mea ia ua faia e tusa ma le tulafono – ona toe fetalai mai lea, Le Atua e, silasila mai ia, ou te alu atu e faia lou finagalo. Ua aveeseina ai e ia le mea na muamua, ina ia faatumauina o lona lua. O le finagalo lea ua faapaiaina ai i tatou i le taulaga i le tino o Iesu Keriso na fai faatasi.*

E iai tulaga masani e ta’i lima tausaga ma fai i se tasi o malumalu, i le laumua o Initia(Gadhimai festival). I le tausaga 2009, e 500,000 manu na osi ai taulaga, ma le faamoemoe e tutuli ai temoni ae aumai ai manuia. Ae peitai, ona o le tete’e o fa’apopotoga o tagata e puipui manu ma nisi tapuaiga e manumanu i le fasia o manu e aunoa ma se mafuaaga tatau. O lenei la taulaga po’o sauniga, ua taofia mai e afua mai le tausaga e 2015, ona o e tete’e i lea ituaiga tapuaiga. E i ai talitonuga, o taulaga ma sauniga faapea, e maua ai fa’amanuiaga ma faamagalo ai agasala e tusa ma le tulafono faa Iutaia. E faitaulaga tagata mai lea tausaga i lea tausaga, ae leai lava se suiga e tumau pea i le olaga agasala.

Ao Keriso na ia ofoina i le feagaiga fou se taulaga silisili, o le taulaga o lona ofoina atu atoa ia faia le finagalo o le Atua. Ua faaali mai Keriso e ala i lona soifua usitai i le Tamā, ua oo lava i lona maliu.

Ua faamatala e Paulo lona ola, ua pei o se vai pua’ina atu i se ipu mo isi. O se molimau matagofie, o le soifua ofoina atu o tamā ma tinā, ua latou iloa ma malamalama i le valaau a le Atua, e faapena ona atagia ai se tasi e na te faia le finagalo o le Atua, o se taulaga sili lea ma le matagofie.

E tele lava faaiuga tatou te faia, o le iunivesite e aooga ai, o le galuega tatou te galulue ai, o se pa’aga lelei, o se nofoaga e

nofo ai ma isi lava filifiliga. O le fesili tele, tatou te filifili ea i ia mea ona o se faasiliga tatou te maua ai poo ala faigofie e maua ai? Pe tatou te faia ea ni faaiuga e faamalie ai o tatou aiga ma uō. Po’o ua o tatou faatelegese te isi ma fesili, o le a le finagalo o le Atua mo i tatou? E ao ai ina ia tatou iloa ona ofo atu o tatou ola mo ia.

Tatalo: Le Alii e, a’oa’o mai ina ia iloa ona matou ofo atu o matou agaga ma o matou tagata atoatoa. A’oa’o mai ina ia matou faia e ui i le tiga ma le faigata ae o le mea moni lea, **Amene.**

Mafaufauga Loloto: O lea se mafuaaga loloto na faavae ai nisi o au filifiliga i lenei vaitau?

Aso Faraile Aperila 20, 2018

“Mafutaga fou” New fellowship

Tusi Faitau: Eperu 10: 19 – 25

Matua: Eperu 10 ff. 24-25, *ia tatou manatunatu foi le tasi i le tasi, ina ia taufaatupu ai le alofa ma galuega lelei; aua le lafoaiina le faapotopotoina o i tatou, pei o le masani o isi, a ia fefaamafanafanai; ia atili ai foi ona faapea ina ua outou iloa o le Aso o loo tāutala mai.*

Sa ou tuputupu a’e i se pitonuu i Saute o Initia. E i ai le talitonuga o Toma le soo o Iesu, na talai ma faatuina le Ekalesia i lea nofoaga i le seneturi TA52. I le tele o seneturi, sa mulimuli tai lava le faiga o tapuaiga pei ona masani ai aulotu sei o’o mai le asō. O se tusi tulafono tumau a le tamā o lo’u tamā, o le usu lea i la matou lotu masani i aso Sa uma. Ina ua ou malaga i le iunivesite mo aoaoga, ua ou taumafai lava e saili se lotu e latalata i le matou fale. Mo nisi o au uo, na soifua ma ola saoloto i tapuaiga e le mamafa ia i latou. Atonu o uiga tuai e faagalogalo gata o le naunautaiga mo a’u e alu i le lotu, ua le na’o se masani, ae o se mea fīafīa ia te a’u.

I le feagaiga fou, e ao lava ona tatou faia se faaleleiga ma le Atua ae maise i tatou lava. A maea, ona o tatou faia lea ma se faaleleiga ma o tatou uso. E i ai taimi e saisaitia ai le tagata ma faapea mai? “Na o a’u lava ma le Atua”, o aūga na o le tagata

ua alu ese ma le Atua, ua manatu fia tutoatasi. Ae o le Atua o paaga, o le Atua na te le tuua le mafutaga ma le tagata, o le Atua o faapotopotoga ma o mafutaga e lalaga faatasi, e galulue ma faamaite galuega lelei mo i latou o loo i totonu o le lotoifale o le lotu, ae sili ai i latou o loo i fafo ma le lio o le lotu. Ma o le faamalosi la e amata i le aiga, ae faapitoa lava ia tatou fanau, ina ia ola ma tumau i uiga faaleagaga, a oo ina matutua i latou e le toe te'a ese ai.

Tatalo: Le Atua e, ave a matou mafutaga ma aulotu e talia ai tagata uma meaalofa. Ia manino la matou vaai ma le faalogo i manaoga ma tiga o tagata uma, **Amene.**

Mafuafauga Loloto: O leā le to'atele o lau aulotu ua e masani i ai? Faauo i se tagata fou i lenei Aso Sa, faasoa ma faamalosi i le alofa o le Atua.

Aso Toanai Aperila 21, 2018

“Tali fou: o le onosai” New response: endurance

Tusi Faitau: Eperu 10 : 26 – 39

Matua: Eperu 10 ff.32,33,36, *A ia outou manatu i aso anamua, ina o faamalamalamaina outou, na outou onosai ai i le taua tele o tiga; ina ua faia outou ma mataaga i upu faifai ma puapuaga, tasi lea mea; i le ma lenei, ina ua faatasi outou ma e na faapeaina. Aua ua aoga ia te outou le onosai, ina ia maua e outou le mea na folafolaina, pe a uma ona faia e outou le finagalo o le Atua.*

O le to'atele o Kerisiano i Initia, e afua mai i le taunuu atu o Toma i le uluai seneturi. E 2.3 pasene o tagata kerisiano o le tele o taimi e lamatia o latou ola ona o le ese o a latou tapuaiga. Sa faamatata se taule'ale'a a'o aoga o ia i se Seminare i Initia, ua liliu o ia e ave a ma kerisiano. O lona ave a ma kerisiano na matua inosia ai e le latou aiga ae maise e matutua. E le gata ua liliu e ave a ma Kerisiano, ae ua aoaoina foi o ia e fia ave a ma misionare e ta'uta'u atu le tala lelei i le lelei o le Atua i ona tagata. Ua ou vaia le naunau e vivii ma aoaoina i le Tusi Paia, ese mai la i kerisiano masani ua loa tausaga o ave a ma kerisiano, ae leai se naunau. O le a'oga ma le nuu na aoga ai lenei taulealea, na faaumatia e tagata Hindu

(tapuaiga). Na faasalalauina i le TV ma leitio. Na tupu lenei faalavelave i le tausaga e 2008, ma o le tele o nei kerisiano, na susunu ma olopalaina, ae ui inei sauaga ae le'i faaitiitia ai ma pē ai lo latou faatuatua. O le sauaina, olopalaina faamalosi ma susunuina o le au kerisiano i Initia, o le tala lava mai le amataga.

O le feagaiga fou foi ma aoaoga a Iesu, ua feteena'i ma aoaoga a le lalolagi, mo so'o se kerisiano moni lava, na te le taliaina aoaoga a le lalolagi. E ui lava na sauaina le uluai ekalesia, ae lei faaitiitia ai le lamepa o le fia galue, naunau ma talai pea, ma ua tupu ma talaulau. I nei onapo, ua solo i tua le galuega aua ua le toe i ai se naunau. Ua muta le fia auai o le au kerisiano, o e na iloga ona maelega i le galuega. O nofoaga sa saisaitia ma olopalaina, ua tupu ae ai le moemoe fou. O le tofotofoina o lo tatou faatuatua, e tupu ai le naunautaiga ma maua ai le ola fou.

Tatalo: Le Atua e, le e le tatau ai le tiga ma le safa, fesoasoani mai ina ia matou mafai ona onosai i upu faifai ae maise le olopalaina. Aumai le loto tele ma le manino ma ia matou ola ma oti mo oe, **Amene.**

Mafaufaga Loloto: Tatalo mo le au Kerisiano uma i nofoaga o lo'o lamatia lo latou ola.

Eperu – Hebrew

Faatuatua ma galuega – Faith and works

“Saunia: Alesana Fosi Pala'amo”

Aso Sa Aperila 22, 2018 “Siamupini o le Faatuatua”

Champions of Faith

Tusi Faitau: Epeu 11: 1 - 16

Matua: Eperu 11 f.1-2, *A o le faatuatua, o le faalagolago lea i mea ua faamoemoe i ai, o le mautinoa lea o mea e le o vaai.*

Auā ona o lea na ta'uuleleiina ai o e anamua.

E le o manino tonu poo ai le tusitala o le tusi o Eperu. Fai mai nisi, o Paulo, o Luka poo Panapa. Talitonu e le taua lea vaega, ae o le mea taua o le tele o ni aoaoga o loo tusia i totonu o lenei tusi.

E tele ni aoaoga mai le Feagaiga Tuai ma le Feagaiga Fou. O tagata ua ta'ua i lenei aso, ua ou ta'ua e a'u o siamupini o le faatuatua, o lo'o taua i latou o siamupini o le naunautaiga e galue, o le tomai faapitoa e fai ai le galuega ma le tautoga e le foi i se isi mea. E tutusa uma ai i latou, o Apelu na ia faia le taulaga sili, Enoka na aveolaina i le lagi, Noa na ia fauina le va'a mo le lolo e ui lava ina faifai ona tagata. E siamupini uma latou i ala eseese Apelu (eleele) Enoka i le (ea) Noa i le (vai) Aperaamo le tamā o le au faatuatua, na faalagolago ma faatuatua i le Atua, lea na taitaiina e le Atua i le nuu na tauto ai ia te ia. O le siamupini foi o ia.

Ua a'oa'o mai nei siamupini o le faatuatua ina ia avea i tatou ma siamupini i o tatou taimi, e manaomia ona ola le lamepa o le naunau i totonu ia i tatou, ma e manaomia le tomai e faitau ai le Tusi Paia, faasoa ma tufa atu ma tatalo. E ao ona o tatou tutupu i le ola kerisiano e ala i la tatou auunaga ia Iesu. Ia tatou naunau, alofa ma ofo atu o tatou taimi mo le Alii, a o tatou faia ia mea, ona avea ai lea o tatou o Siamupini o le faatuatua, o le faalagolago ma faatuatua lea i mea e leo vaaia.

Tatalo: Le Atua e, fa'aupegaina i matou i le faatuatua e mafai ona faalagolago atu i lau afio, e mafai ai ona avea i matou ma siamupini o le faatuatua, **Amene.**

Aso Gafua Aperila 23, 2018

“E aumai e le faatuatua le ola”

Faith gives life

Tusi Faitau: Eperu 11: 17 – 31

Matua: Eperu 11 f.19, *Ua manatu o ia e mafaia e le Atua ona toe faatu mai tagata nai e ua oti, o lea foi na ia toe maua mai ai o ia, ua fai lea ma faatusa.*

O le tusi faitau o lenei aso, o lo'o faamatala ai le faatuatua o Aperaamo, na ola ai lona atalii o Isaako, ma le faatuatua ma galuega o matua o Mose, na faasaoina ai o ia. E tutusa nei tala o loo atagia ai le au faatasi o matua i le faasaoina mai o fanau. O nei tala, o loo faamanatu mai ai ia te a'u le tala i se tamā ma lona atalii. O le tala lenei o se mea na tupu i Niu Sila. Sā alu le ma fagotaga ma si o'u tama, i le 5 na o o'u tausaga, ua aga'i mai le tafa o ata o le taeao, ao ma i ai i se uafu tele. Sa ou manatia le faatonuga a lou tamā, ou te nofo i le taavale ona ua

timu, ae pe a ma le 10 mita le mea o loo fagota ai, o le isi mea ua ou manatua, ua ou magoto i le sami, a’o ou tepa a’e i le lagi, ma ua ou le iloa ai loa ma se mea. Ua ou toe lagona se lima o taumafai mai ia te a’u. Ua maua lou laulu ma ou iloa ai o lo’u tamā, sa taumafai o ia e faaopeopea a’u, ae o le malosi tele o le au, na tau au ina ma faaletonu uma ai. Na iu ina maua ai se toomaga i se polokasimā i lalo ifo o le uafu. Sa faalogo mai se tamā i le ma valaau mo se fesoasoani, ma agai mai loa ma laveai atu i maua. Mulimuli ane faamatala si ou tama, na ou fai atu o le a ou oso atu i le sami e tausaili mai ni i’a.

O tala faapenei e faailoa ai le faatuatua ma faalagolago i le Atua ma ofo le ola mo nisi o loo manaomia. Tatou faamoemoe, faatuatua, faalagolago i le Atua fai mea mafai, ae maise o le Atua o ia e puna mai ai le ola.

Talalo: Le Atua e, a’oa’o mai matou ina ia matou iloa ona talitonu ma faatuatua atu pea ia te oe, pea o’o mai lu’itau o le olaga. Ia matou faatuatua ia te oe matou te maua ai le ola, **Amene.**

Mafaufauga Loloto: O ai e tuu i ai lou faatuatua e mafai ai ona faaaauu galuega o le aso? O lou lava tagata, o ni isi tagata, po’o le Atua? O lo tatou faatuatua i le Atua, e fesoasoani mai le Atua i ai tatou atoa ma nisi na te mafaia ona fesoasoani mai i taimi o puapuaga.

Aso Lua Aperila 24, 2018

“E mafaia le taufetuliga lelei i le faatuatua”

Faith enables us to run the good race

Tusi Faitau: Eperu 11: 32-12:2

Matua: Eperu 12 f.1, *O lenei, o i tatou foi, o loo ua vagavagaia e le faapotopotoga o e matamata mai e faapea ona toatele, ina tatou tuu ese ia o mea mamafa uma, atoa ma le agasala e faalavelavegofie ai i tatou, ia tatou taufetuli ma le onosaii le ala tanu o i o tatou luma.*

A tapena se tasi mo se tauvaga, e ao lava ona tapena lelei. O le ituaiga tauvaga po’o le tu’uga e tatau lava ona manino o se tuuga i le elelee, sami po’o le ‘ea. O le umi e tatau ona tapena i ai le tagata tauva, e ao ona fuafua mamao. O le taunuu manuia

o le tu'uga, o le lava tapena lea o tagata tauvā uma. O le muagagana **“o le taufetuliga”** o lo'o afifi mai ai agaga o le malaga umi a le Samoa i le tausaga atoa. O le amataga o tausaga e fai ai lotu talosaga a le EFKAS po'o le EFKS i Samoa. O sauniga faafetai i le Atua i lena tausaga ua mavae, ae o le tapenaga mo le tausaga o le a tau amata. O le a molimau tiakono, tinā a'oa'o, fanau ma tagata matutua i le alofa o le Atua, ae maise apoapoaiga mo le tausaga tau amata, ma o le tapenaga foi lea mo le tu'uga o muamua. Ao se tapenaga foi mo tagata taitoatasi ma latou malaga i le taumua lua o le faigatā ma faafitauli o le olaga.

O la tatou tusi faitau o lenei aso, o loo atagia mai ai nisi o uiga faata'ita'i o le Tusi Paia, ua atili ona faamausali le agaga o le siamupini pei ona taua i le tatou mataupu o lenei vaiaso. O nei tagata na latou tauivi ma le filigā i o latou lava siosiomaga ma manumalo ai. E tele se a'oa'oga tatou te maua mai ia faigata mo la tatou tamō'ega o aso fai so'o, o lo tatou ola faatuatua i le Atua e faaauppegaina ai i tatou mo le tete'e atu i le fili. Ina ia mafai ai ona tatou tamomo'e i se tamoeaga lelei, pei o e o lo'o taua i le tala ma auuuna ma le faamaoni i le Atua.

Tatalo: Le Alii e, fesoasoani mai ina ia mafai ona o matou taufetuli i le tuuga lelei i aso uma o lo matou ola. Ia matou auuuna ma viia oe, **Amene.**

Mafaufauga Loloto: Ao le'i amatalia se tamō'ega, e ao lava ona e tu i luga ma sauni. E te lagona ea le agaga o le faapalapala ma le paie ao lei amataina le tamoeaga? Fai se suiga, amata nei.

Aso Lulu Aperila 25, 2018 “A'oa'o'oina e le faatuatua”
Faith disciplines

Tusi Faitau: Eperu 12: 3-13

Matua: Eperu 12 f.11, *O aoaiga uma foi a o i ai, e le manatu i ai o se mea e olioli ai, a o le mea e faanoanoa ai; a e mulimuli ane e fua mai ai fua o le amiotonu e manuia ai e ua a'oa'o'oina ai.*

Mo le au faitau i Ausetalia ma Niusila, o le asō, o se aso faailogaina ai auuunaga a fitafita tuai a nei atunuu. O le aso 25

Aperila 1915, na tuufaatasi ai fitafita a mālō afaatasi, sa o latou faasagatau atu i pulega faamosalemi i le atunuu o Take i se taeao segisegi. O se osofa'iga malosi, na faatoilaloina ai le taupulega faamosalemi lea, a'o uo mamae i le malo o Siamani. E valu masina o le taua, na faasaoina ai nisi o fitafita na tau ai. Ina ua mae'a le taua, e 8,709 fitafita Ausetalia na maliliu ai, 2,721 fitafita a Niusila ma le 33 fitafita Samoa, na maliliu ai. E faamanatu pea lenei aso malolo o fitafita tuai, tusa ai ma a latou auaunaga. "Aua nei galo".(ANZAC Day)

O le faitauga o lenei aso, e lua ni manatu o loo i ai. O le lesona ia tatou faapei o tamaiti, o fanau a le Atua e a'oa'o i ala o le Atua, o le faamoemoe ia tatou ola sa'o aua le ola fepi'opi'oa'i mai ala o le Alii. O lo tatou ola foi o i tatou o fanau a le Atua, e ao ona tatou mulimuli i ala o le Atua. O nai fitafita ia na maliliu, na mautu ma mausalī lo latou a'oa'oina, ae maise o lo latou lotu nuu ma le alofa i o latou tagatānuu, na mafua ai ma nisi lava mafuaaga o lelei. E tali faapena se manatu e tatau ona faamautū ma faamausali lo tatou aoaoina o i tatou o fitafita a le Atua, ao feagai ai i tatou ma taua i aso uma. O lo tatou faatuatua i lo tatou Alii ua toe tu, o le faatuatua lea e a'oa'o ai i tatou e auauna i le Atua.

Tatalo: Le Atua alofa e, fesoasoani ina o matou manatua o matou uso ua malolo ona o taua. Fesoasoani mai ina ia matou mautu i le aoaoina pea fetai ai i matou i aso uma ma faafitauli, ae ia matou tumau pea i ou ala, **Amene.**

Mafuafauga Loloto: O leā se auala filemu e aoaina ai fanau? E faafefea ona avea i tatou ma faataitaiga i fanau?

Aso Tofi Aperila 26, 2018

“O lo tatou faavae le faatuatua i le Atua”

Faith in God as our foundation

Tusi Faitau: Eperu 12: 14 – 29

Matua: Eperu 12 f.28, *O lenei, ua maua e i tatou le malo e le mafai ona luluina, ia tatou faafetai ai, tatou te auauna ai i le Atua ma le migao, ma le mata'u ia fiafia mai ai o ia.*

Fa'avae i le Atua Samoa, o le anava po'o le faavae lea a atunuu uma o le pasefika. O le faavae o le malo tuto'atasi o

Samoa ma lana anava , o loo faailoa ai se tele o le sao o le Atua mo Samoa.

O se tasi o faalavelave fa'alē natura na luluina ai faavae fa'alē faatuatua o le atunuu, o le Tsunami lea i le 2009. Ia Setema 29, 2009, na luluina ai Samoa i se mafuie i lona malosi e 8.1, na maliliu ai tagata e 143, ae ta'ape solo ai le 5200 tagata ua leai ni fale e nonofo ai. O se taimi pito i sili ona tiga ma faigata ia Samoa, Ae ui i lea, o se taimi na matua aliali ai le tele o le alofa o le Atua. Ua galulue faatasi le atunuu atoa ma le malo, e tau saili tagata ua le maua, ae maisie e ua maliliu. O fesoasoani mai fafo ma e galulue i faalavelave tutupu faafuase'i, ua latou tūtū ma galulue faatasi, e fau ma faamaopoopo aiga ua malepelepe ona o le tsunami. O le natura lava lea o le Samoa, ona e faavae Samoa i le Atua, ma soo se fale lava e tatau ona mautu sona faavae, ina ia aua nei lūlūina ma pa'u. E ta'iulu Samoa i le Atua, ma e o faatasi ma lana tīgāvai.

O le malo o le Atua e le mafai ona luluina, ma o e uma e pipii ma faapogai i le malo lea, e le mafai ona luluina, pe afai tatou te faatuatua ia te ia o lo tatou faavae mautu, e le mafai i tofotofoga ma luitau o le olaga ona luluina i tatou. E o'o foi i le oti, e lei mafai ona luluina ai le manumalo o le Alii, i lona toe tu manumalo mai le oti ma le tuugamau. E mafai foi ona tatou manumalo i tatou mai peau lagavale o le olaga nei, pe a o tatou taula ma faatuatua i le Atua. O le 'tala lelei lea', pe'a o tatou faatuatua i le Atua.

Tatalo: Faafetai i le Atua ona o le tunoa o lou alofa e ala mai ia Iesu. Faamanatu mai ia i matou o oe lava o le matou faavae mautu o lo matou olaga, **Amene.**

Mafaufauga Loloto: Tomanatunatu poo lea lou faavae ma le faavae o lou aiga? O le aganu'u ea, tupe, po'o le siitia o galuega, poo le Atua?

Aso Faraile Aperila 27, 2018

“Faatuatua i le ola fetufaa'i”

Faith in reciprocated love.

Tusi Faitau: Eperu 13: 1-17

Matua: Eperu 13 f.1, *Ia tumau le fealofani o le au uso.*

O le ola fetufaai, o le toe alofa atu i le na muai alofa ia te oe. E i ai le taimi e faapito tasi ai le alofa, ae tatau lava ona ola fetufaa'i. O le alofa fetufaai e tai tutusa lava ma le "alofa faasoa po o le alofa e fetuunai" o lo'o taua foi i la tatou Tusi faitau aso, o le alofa fetufaai e lagona e mea uma o le foafoaga e iai lagona. O lenei alofa e faapitoa lava i tagata ola ma nisi o manu. E le aofia i lenei alofa, au meatotino. O se faaitaiga, o lau taavale, o lau telefoni, komipiuta ma nisi mea. O mea e faaleleia ai lou soifua taumafai, ae le mafai e au meatotino ona tauia mai lou alofa.

Ua faafaigofie e Iesu auala e alofa atu ai. "*E te alofa atu i le Alii lou Atua ma lou loto atoa, ma lou agaga atoa, ma lou manatu atoa. E te alofa atu foi i le lua te tuaoi, ia pei o oe lava ia te oe*" (Mataio 22:37,39) O le alofa fetuunai e aofia ma le toe ofo atu i le Atua o lou alofa, o le alofa e faaauau atu ai lou alofa i le isi ou tuaoi, poo se o loo manaomia lau fesoasoani. O le alofa ia faaauau i lea tupulaga ma lea tupulaga.

Tatalo: Le Atua e, ia a'oa'i i matou ina ia mafai ona matou matua alolofa atu i lau afio, ma ia o matou alolofa atu i o matou tuaoi, **Amene.**

Mafaufauga Loloto: 'Vave fai se mea lelei mo le lumanai' aua e faaauauina e se tasi lea mea lelei.

Aso Toanai Aperila 28, 2018

"Faatuatua i faamanuiaga a le Atua"

Faith in God's blessings.

Tusi Faitau: Eperu 13: 18-25

Matua: Eperu 13 f.20, 21b, *A o le Atua e ona le manuia, o le na toe faatuina mai nai e ua oti le Leoleo mamoe sili, o lo tatou Alii o Iesu, ona o le toto o le feagaiga faavavau,.....ona o Iesu Keriso, ia ia te ia le viiga e faavavau faavavau lava, Amene.*

"Faamanuia le Atua", e peisea'i o le faamanuia lava lea a Samoa i so'o se mea e fai. Po'o le a lava le fa'amoemoe poo

se aso fanau, se manumalo i taaloga, po’o fuafuaga a le nuu po’o le malo, o le talitonuga lava, o le faamanuiaga mai le Atua e manuia ai le faamoemoe. O upu nei ua tu’u tupulaga mai matua i fanau, matai i aiga ma nuu, faifeau i aulotu. O le agaga e faailoa oe o le a faia se galuega, o lo’o i ai le tapuaiga ae maise o loo fatasi le Atua. E ave le faafetai i le amataga, e faapena foi le taunuuga, ae o le tatalo i le Atua mo ana faamanuiaga.

E leai se sailiga e sili atu nai lo le saili i le tunoa o le alofa o le Atua, tatou te saili pea i le Atua e ui ia tatou agasala ua tele naua. Tatou te talitonu ma faamoemoe i le toetu o Iesu e faasaosao ai o tatou ala. Ua agai ona maea le tusi a Eperu, ao faamanatu mai pea le alofa o Keriso Iesu. O se faaiuga o le faamatalaina o matupu faaleagaga ae maise le alofa o Iesu i le lalolagi atoa. Ua tatou faatuatua ma ua talitonu i le taulaga fai toatasi e Iesu, e ala i lona maliu ma lona toetu, ina ia magalo ai tagata uma, ma ia tatou maua uma le ola e faavavau. Faamanuia le Atua.

Tatalo: Le Atua alofa e, matou te faafetaia le tunoa o lou alofa e ala ia Keriso Iesu. Fesoasoani mai lau afio ina ia matou maua faamanuiaga a lau afio, **Amene.**

Mafaufauga Loloto: O lea le ituaiga faamanuiaga o loo e sailia i lou siosiomaga? E lelei ona e iloa o lo tatalo nisi mo oe.

Ua sosolo faama’i pipisi: Faamatalaga i le Tusi Paia

1 Faafesaga’i ma le Alii.

(Saunia e: Delroy Hall)

ASO SA, Aperila 29, 2018: “O le faatusa o le Atua.”

The intimate God

Tusi Faitau: Kenese 2:4-9.

Matua (f.7), *Ona faia lea e le Alii le Atua o le tagata i le efuefu o le eleele, ma ua manava i ona pogaiisu o le manava ola; ona avea ai lea o le tagata ma tagata ola.*

Na matapogia se tasi o a’u faauo ina ua mae’a le sauniga faa’umi’umi o le maliu o lona tuafafine. O le talanoaga i luga

o le telefoni, na fesili mai ai le ofisa o faalavelave faafuase'i: Po'o i ai se manava ola i le tina? Tali: Faafetai o loo maua pea le manava; ana fai e leai, e tatau ona fa'aaoga le togafiti o le CPR. Na 'ave i le falema'i e saili le tulaga o i ai, ma ua toe foi i le aiga.

Mulimuli ane, ua mafaufau ane, ana fai e faatino le CPR, semanu e maua se suiga o la'u uo. O le avanoa e lavea'iina ai mai le tulaga faigata sa i ai, o se avanoa lelei lea e faateleina ai pea le lagona o le alofa i so'o se faauoga. Aua e ono tele ni 'auala e faatino ai le fausia o tagata e le Atua. E le o i ai ni ona 'a'ao e faapei o i tatou, le gutu po o le māmā. Peitai, na ia fausia i tatou ma tuuina i ai le manava ola e faapei o le faatinoga o le CPR faaleagaga. O le faatinoga le na faale-Atua ua maua ai lo tatou fesootaiga vavalalata ma lo tatou Atua. O le alofa faapitoa lenei o le Atua ma lona taua i le tagata, na amata mai lava i le amataga i le tagata o Atamu, e faauau pea e o'o i le faavavau.

O le finagalo alofa o le Atua Silisili'ese e faauau pea i ana galuega mamana na fai. E faapei ona tatou fesaga'i vavalalata ma le Atua, mata-i-le-mata i lenei vaiaso, ua valaauina i tatou e sa'ili atu ia iloa atili lea fesootaiga ma le Atua, e ala i le faitau ma manatunatu i avanoa ua tuuina mai ua tatou manuia ai.

Tatalo: Le Alii e, fesoasoani mai ia matou iloa atili lou finagalo i o matou loto. Faatasi mai ia tosina atu o matou loto i le mafutaga pito sili ona vavalalata ma lau Afio. Amene.

ASO GAFUA, Aperila 30, 2018:

“Po ou te faatali ‘ea se ia afea?” How long?

Tusi Faitau: Salamo 13.

Matua (ff.1b-2a), ...*E te 'alo ou fofoga ia te a'u seia afea? Ou te filifili a'u ma le faanoanoa i lo'u loto i aso uma seia afea?*

O le a le faa'umi'umi loa ona e faitau i le tusi Salamo se ia o'o ina lagona le tuto'atasi, le tu'ulafoa'iina, po o le lē amana'ia. O se lagona masani lea faale-tagata soifua, a e maise lava i taimi e feagai ai ma faigata. O le a lē afaina po o le a le tulaga e iai, po'o se ma'i tuga ua lē togafitia, o se maliu o sē pele i le mafutaga, o se fe'ese'eseaiga faaulugalii po ona ua leai se

fesootaiga i le alofa, o mea uma nā tatou te lagona ai lenei ituaiga o faigata e o’o mai i le tagata. A e atonu o ia faigata e mafai ona fofō, a e tau ia o se faasinoga ina ia malamalama.

Pe a fai ua a’afia i tatou i nei ituaiga faigata, o aso lelei ma masina faalē-lelei, a e se’i mafaufau ane lava. Silasila foi: Fai mai le alii o Donald Witney, na tusia le, “Praying the Scriptures (Talosaga i le Tusi Paia)”, ua ia faapea mai: O Salamo o pese mai le Atua ia tatou vivi’i atu ai ia te IA i taimi o a tatou tapua’iga.

E faitau vaiaso po’o masina e feagai ai ma le anoano o tuatuaano’a faale-tagata, po’o le a lava; a e maise lava i taimi ua naunau ai e fai mea ua loto i ai le tagata lava ia; o iina tonu e masani ai ona galo le Atua e tapua’i i ai. Atonu o le finagalo o le Atua, ua faapea ane: “Ua fa’afia ona e natia le Atua i lau vaai?” E le taumate ua tatou manatu: E leai se lagona (emotion) o le Atua, e leai se lagona ia tatou mafuta faatasi ma IA. O le a sou manatu e uiga i le lautele ma le loloto o lea ituaiga o mafaufauga? O le Atua na faia le lagi ma le lalolagi, na fausia le tagata i le efuefu o le eleele, na manava i ona pogaiisu le manava ola, ua ola ai le tagata i le mata-i-le-mata e feagai ma lona Alii. Se faaaliga ina a ofoofogia?

Tatalo: Le Alii e, faamagalō mai ina ua matou faagalō e te silafia o matou loto---ua e finagalo ia matou mafuta, mata-i-le-mata ma lau Afio. Fesoasoani mai ia matou iloa ma lagona lea faaaliga ofoofogia. **Amene.**

Mafaufauga Loloto: E faapefea ona tatou malamalama e i ai lagona (feelings) o le Atua e mafuta faatasi ai ma le tagata?

ASO LUA, Me 1, 2018:

“O Mose ma le ‘au toeaina faatasi ma le Atua.”

Moses and the Elders with God.

Tusi Faitau: Esoto 24:9-18.

Matua (f.14), *Ua ia fai atu foi i toeaina, Ia outou tali atu i maua iinei, se’ia ma foi mai ia te outou; faauta, o Arona ma Huro o ia te outou i laua; ai se tasi ua i ai se mea e faamasino ai ia alu atu o ia i a i laua.*

O se faata’ita’iga matagofie lenei, e tusa ma le nofo faatalitali faatasi ma le Alii e talia se mea-alofa tāua ma le

aogā. Sa nofo faatali ma le onosa'i Mose, ua le o mamafa se lagona i tiute faa-uauna a le Alii se ia o'o ina fetalai mai le Atua. E faapena i le 'au failotu ma e ua talitonu i le Atua, e vave ona saili ma su'esu'e i tusi e faamatalaina ai le Tusi Paia, tusi e faauigaina ai le Tusi Paia, i le inateneti (internet), ma so'o se tusi aoga lava.

Faauta, aua nei faitio mai: o nei mea faigaluega e aoga e fesoasoani i lo tatou iloa ma malamalama i aganuu ma uiga masani o aso ta'itasi, peitai, i nei auga tupulaga ma le fesouaina i pisinisi eseese ma galuega fai, o lo'o i ai pea le finagalo o le Atua ia tatou faatali se ia fetalai mai. E faapea foi i tatou, ia tatou feso'otai i e matutua i 'au lotu e faailoa i ai lenei faatinoga taua e faia e le 'au failotu. Ua tatou faitau na poloa'i atu Mose i le 'au toeaina ia taga'i i faatinoga o galuega e faia e le 'au failotu, a e se'i alu 'ese e mafuta i le Atua; tatou te iloa lea uiga pe a faitau i le Galuega mataupu 6.

Ua o'o ina alia'e se tasi o faafitauli i le tausiga o fafine ua maliluu a latou tane, ua tupu ai le muimui o tagata-lolotu i ekalesia Eleni. E foliga o se tiute tau'ave e feagai ma alii/tama'ita'i faifeau, peitai e leai, ua silafia lelei e le 'au aposetolo leni tulaga. Ua valaauina le 'au aposetolo e tatalo ma folafola le Upu. O le mea lea, ua manatu le 'au aposetolo, e lelei ona filifilia nisi ua tagata-matutua ma faamoemoeina i le ekalesia e tau'aveina leni matafaioi. Se'i mafaufau ane lava, e atoa le 40 aso o faatalitali faatasi ma le Agaga o le Alii. Faatalitali pea ma finafinau aua le faataunuaina o le folafolaga; faatalitali i le si'ufofoga itiiti o loo musumusuina o tatou loto e aso faisoo---o le leo itiiti o loo faailoa mai ina ia tatou 'alo'alo 'ese mai le tele o leo tau faasesē ma le faatosina i tu'inanau o le lalolagi.

Tatalo: Faamagalalo i matou, le Tamā e, ona o lo'o tosina o matou loto i tu'inanau eseese o le lalolagi. Ua aafia i matou i tofotofoga ma faaosoosoga tau faasese. A'oa'o mai ia matou iloa ona faatalitali mo le o'o mai o au faamanuiaga. **Amene.**

Mafaufauga Loloto: Pe na e tuumuli ane i se avanoa itiiti, i nai aso e te manatunatu ai ma ma faufau ia te 'oe lava? Faata'ita'i i ai.

ASO LULU, Me 2, 2018: “Faafesaga’i.” Face to face

Tusi Faitau: Numera 12:1-9.

Matua (ff.7-8a), *A e le faapea lau auaua o Mose, o lē faamaoni i lou aiga uma lava. Ma te faafesaga’i ona ma tautala ma ia, e faaali lava a e le o upu lilo; ...*

“Ma te faafesaga’i.” O se faatinoga e ‘ese ma le maualuga! E tulaga ‘ese lona taua i le soifuaga faale-tagata. I le atunuu o Peretania, afai e te fia talanoa i le Tupu Tama’ita’i, le Palemia, po’o so’o se ofisa maualuga o le mālō, e mana’omia lava sau talosaga aloa’ia, ma e tele foi auala o feuia’iga. A e i le Tusi Paia, o faatinoga faapea, e i ai le ‘auala e faatino ai.

Sa faitioina Mose ona o ana filifiliga e fesoota’i ai ma isi mālō, ae maise o ana teuga e faalelei solo e tele ina faailoga fesili. Na naunau le finagalo o le Atua i se mafutaga ma Miriama, Arona ma Mose. Ua tuu’ese Miriama ma Arona, ona fetalai atu lea i le auala e faafesoota’i ai auaua perofeta i miti ma faaaliga, peitai, se’i taga’i ai i lana fetalaiga ia Mose. E ma’eu lava leni faatusatusaga. Ua lē faapea mai: “Na tautala mai Mose ia te a’u”, a ua faapea ane: “A e le faapea la’u auaua o Mose; o lē faamaoni i lo’u aiga uma. Ma te faafesaga’i ona ma tautala ma ia, e faaali lava a e le o upu lilo...” E peiseai o lē ua faitioina---e fesiligia lana pule, e le atoatoa lona malamalama, ua faia lana pule ma le lē faamalieina i le taga’i ma le silasila a e matamata mai---o ia tonu lea ua faafesaga’i ma tautala ma le Atua. O le mea lea e ao ai ona faaeteete i le faia o faamatalaga e uiga i tagata, ae maise e ua filifilia mo le tala lelei a le Alii.

Atonu ua faapena foi i tatou pei o Mose, e faafesagai ma lu’itau e tele, faitioina e tagata, ma tuua’ifuaina lau ta’ita’iga e le ‘au faitio mai. A ua e manatu lava, ua e faia le mea sili i lou iloa; a e atonu e le’i matua atoatoa lona lelei. A e ui i lea, o le finagalo o le Atua, ia maua le faafesaga’iga ma ‘oe: Ia feiloa’i ma lou Alii.

Tatalo: Le Tamā Paia e, o taimi e tuua’iina ai a’u, ou te lagona le fia tau ai. Peitai, ia e fesoasoani mai ia ou maua le fesaga’iga ma lau Afio. **Amene.**

Mafaufauga Loloto: O le aveā e fai ma faata'ita'i (pule) e i ai faatasi ma faitioga. Pe mafai ona e ole atu i le Atua ia fesoasoani mai?

ASO TOFI, Me 3, 2018:

“**Ua siitia a’e Elisaia i le lagi.**” Elijah ascends

Tusi Faitau: 2 Tupu 2:1-15.

Matua (f.11), *Ua savavali atu pea i laua, o tautalatala fano; faauta foi o le nofoa afi fa’ata’avalevale ma solofanua afi, ua te’a ese’ese ai i laua, ona alu a’e ai lea o Elisaia i le lagi.*

O se faatinoga ofoofogia lenēi ua faaalā i le tagata o le Alii: Ua fesootai Elisaia ma le Alii, ua faaalā e le Agaga Paia galuega sa faatinoina e le tagata, ma le auala ua faafesaga’i ai o ia ma lona Matai. O le tulaga lea na o’o ia Elisaia: A e o faapefea mai ‘oe?

O lenēi, se’i o’u faailoa atu: na feagai Elisaia ma tiute faapitoa mai le Atua ma sa faatasi mai le Atua. E faapea foi i tatou, e finagalo le Atua ia tatou fesaga’i ma ia i le faataunuuiina o le tala lelei o le faaolataga i o tatou olaga. Po ua e loto ‘ea e te auuāna atu e faatino lea tiute taua mo lou Atua?

Na i ai se tasi faifeāu na tosina mai le to’atele o tagata talitonu e ala i lana galuega folafola. E tele taimi e lauga atu ai i lana ‘au lotu, a e maise o e faalogologo ma matamata i TV i ana lauga faasalalau, e faapea ana upu: “E tele taimi tou te vaavaai ai i le mamalu ma le paia, a e tou te lē o malamalama i le tala.” E le taumate e le vaai lava Lē na faia i tatou i kariota ma solofanua afi ma asiosio, peitai, e mafai lava ona faaaau lelei pea la tatou faiga malaga faale-faatuatua. E faapefea ona faatino lea tulaga?

A taga’i i le tala pu’upu’u e faatatau i le olaga o Elisaia, o se auuāna na tuu atu lona ola mo lona Alii. Sa faamaoni ma ususita’i, o le pogai lea ua silasila mai ai le Alii ma le faamaoni o ana poloaiga. Pe afai e te mafaufau i sou siitia a’e e faapei o Elisaia, e ao ina e auuāna ma talia faigata e o’o mai, o iina e te lagona ai le tali mai o le Alii i lou olaga ususita’i ma le tautua faamaoni.

Tatalo: Le Alii e, sa e faamaoni i le filifilia o Elisaia i lona olaga auuāna ma tautua ma le faamaoni. Ia e fesoasoani mai ia mafai ona matou mulimuli tonu ai. **Amene.**

Mafaufauga Loloto: Ia manatunatu ma mafaufau loloto i afioga paia a le Alii, ia fai lea ma autū o lou olaga se ia o’o i le i’uga. Pe mafai ona tatou filifili i mea lelei ma le tonu?

ASO FARAILE, Me 4, 2018:

“Faapei o se afi mumu i pogāivi.” Fire in the bones

Tusi Faitau: Ieremia 20:7-12.

Matua(f.9), *Ona ou fai atu lea, Ou te le ta’uta’uina o ia, ma ou le toe tautala i lona suafa. A o lo’u loto e peiseai o se afi mumū sa i ai, ua punitia i o’u ivi, ua lailoa a’u i onosa’i, ua ou le mafaia lava.*

E lagona le atuatuvaile ma le faaletonu o le mafaufau pe a faitau i lenei faamatalaga. Ua ta’u leagaina Ieremia, tuulafoa’iina, tauemua, tuua’ifua ma sauaina: o ni upu e le faigofie ona mafaufau i ai, a e ua ta’u mai ai iina le faigata ma tugā o le olaga sa faafesaga’i ma Ieremia. A e o le mea e ofo ai, sa mafai lava ona fa’aaau lona soifua galue i taimi faigata. Faafofoga foi i ana upu, “Ou te le ta’uta’uina o ia, ma ‘ou lē toe tautala i lona suafa.”

A e ui lava i lea, ua le o upu faai’u ia a Ieremia. A o aga’i atu pea i luma la tatou faitau i lenei faamatalaga, e ona tula’i mai se fesili: Po o le a lava le pogai ua mafaia ai e Ieremia, ona fa’aaau ona tiute a o faafesaga’i ma nei tulaga faigata? O faapogai o le loto faamalosi ua atagia i upu nei: “A o lo’u loto e peiseai o se afi mumū sa i ai, ua punitia i o’u ivi, ua lailoa a’u i onosa’i, ua ou le mafaia lava.”

O le tusi lenei a Ieremia, ua faailoa mai ai ia i tatou se ata manino o le finagalo o le Atua, o se lu’itau taua ina ia tatou manatunatu ma mafaufau: A e faapefea ona ulutino lenei fe’au i le loto o Ieremia? Ua le o le ulu po o le mafaufau. A e sa tele ona taimi---e la toafia pe nofonofa vale---na ia manatunatu ai pea i le mafuta faatasi mai o lona Alii. O le ‘auala e tutasi lava lea. O lenei faamatalaga pu’upu’u a Ieremia, o loo atagia ai le lagona o lo’o faaalua i le tusi Salamo 119, ua faaali mai ai uiga o le tuulafoa’iina ma le lē amana’ia. A e ui lava i lea, e le tu’una lava le folafolaina o le finagalo o le Atua. I totonu o nei faamatalaga e faatatau i le soifuaga ua a’oa’o mai ai Ieremia, e le mafai ona folafola le finagalo o le Alii ma mulimuli ai, pe a le i totonu o tatou loto le finagalo o le Atua. Ma, e le mafai

ona tatou ola ma soifua i le finagalo o le Atua, e faapei o se afi mumū i o tatou olaga.

Tatalo: E to’atele ua ta’ua o Kerisiano, a e le atoatoa ona ola talitonu ma faatuatua. Le Atua e, ia ulufale i o matou loto lau Upu Moni o le ola, ia faapei o se afi mumu i o matou loto.
Amene.

Mafaufauga Loloto: O nisi vaega o le lalolagi e iai le sa’olotoga e tapua’i ai, peitai, ua tauau ina mou malie atu. Ua tatau ona toe faaolaolaina Afioga a le Atua i loto ma finagalo ina ia saunia ai pea le lumana’i sologa manuia.

ASO TOONAI, Me 5, 2018: “O foliga ua liua”

Transfigured

Tusi Faitau: Mataio 17:1-12.

Matua (f.5b), ... *“O lo’u Atalii pele lenā, ou te fiafia ia te ia; ia outou faalogo ia te ia.”*

O tusi faitau mai le Tusi Paia i lenei vaiaso, o lo’o filogia faatasi ai manatu autu e le faigofie ona iloa. O le mea lea, afai e faatopetope ona faitau i ai, e ono misi i le vaai mea taua o i ai. E taua, ia aua ne’i faatopetopeina. E le mafai ona atoatoa se taumafaiga, pe a faatatope ona fai se galuega.

Ou te manatua, i se tasi aso, na ou mafaufau ai o’u te savali i le tolu maila mai lo’u fale aga’i i le ogatotonu o le taulaga. E tele ni vaaiga sa ou molimauina: o faato’aga laau, ma se fale e teu ai le malosi faaeletise, tau ia na o se faailoga o mea eseese e tele i le vaai. E le o ni mea sa faafuase’i ona tutupu. O mea lava sa i ai i aso e tele, a e o a’u, o lea ou te alu atu i le taavale.

Mo lenei taimi, ia tatou vaavaai ia Iesu ma ona so’o o loo aga’i atu i luga o le mauga. E te le faavavevave pe a e aga’i a’e i se mauga, aua fo’i, o lea ua e fulitua i vaaiga faale-lalolagi, i le tele o tuatuaano’a o le olaga; a e o loo vaavaai atu pea faale-mafaufau ia Iesu, Mose ma Elisaia. O lenei to’atolu ua aofia i le faamoemoe e tasi! Ua faaalua mea e lē o i le lalolagi, i le molimau a ē o i le lalolagi.

Ua atagia i lenei tala le tulaga na o’o ia Peteru, o le auauna e tautala i ona lava lagona, lea na faapea atu: “Pe a e finagalo ai, ou te fausia ni nofoaga se tolu: o le tasi mo ‘oe, tasi mo Mose

ma le tasi o Elisaia”, peitai, o loo fetalai le Alii e fua i le taimi ma le loto maulalo. Sa faalogo le ‘au so’o ua fetalai le Alii ma ua matata’u. Ona a’oa’o atu lea o Iesu i ona so’o, ia aua ne’i faailoa atu lenei faaaliga i se tasi. E mafai ona maua le lagona loloto o le mafuta mai o le Alii, peitai, e le avea lea ma tulaga tatou te manatu faasausili ai pe fia iloa, aua e sili ona tatou mafaufau loloto i lo tatou savavali faatasi ma le Alii ma silafia lona finagalo tonu.

Tatalo: Le Alii e, ta’ita’i atu i matou i le mafutaga vavalalata ma lau Afio. Fesoasoani mai ia matou iloa ona faafesaga’i pea ma lau Afio, aua o ‘oe o le Atua, e tumau pea lava. **Amene.**

Mafaufauga Loloto: E finagalo le Alii ia liua i tatou. Pe a tatou faafesaga’i ma le Atua, ia liua i tatou e mulimuli i ona tulaga aao. Po ua e sauni ‘ea?

**Ua sosolo faama’i pipisi: Faamatalaga i le Tusi Paia
2: O ‘avefe’au a le Alii.**

(Saunia e: Paul Nicholson SJ.)

ASO SA, Me 6, 2018:

“E lua nofoaga e iloa ai le Atua.”

Two places to discover God.

Tusi Faitau: Salamo 19:1-10.

Matua (f.1), *Ua tala mai e le lagi le mamalu o le Atua, ua faaaliga foi e le va nimonimo le galuega a ona ‘a’ao.*

O Ikanasia o Loyola, o ia na faavaeina le faalapotopotoga faale-lotu o lo’o avea ai a’u ma ona totino, na soifua ma ola o ia i le 16 tausaga mulimuli o lona olaga i le ogatotonu o le malo o Roma. O lona soifua galue sa faapitoa ona tiute e fesoasoani i auauna filifilia, ua a’oa’oina mo le faamoemoe e faasalalau atu le tala i soo se itu o le lalolagi ma faailoa atu mea ua a’oa’oina ai ma talia e ua asiiasi ane.

I le tasi o afiafi ua aga’i mai le pogisa, sa ia nofononofo i luma o le politito i lumafale ane o lona ofisa, ma vaavaai a’e i le va nimonimo---o ia tausaga e le’i i ai ni moli eletise i luga o auala tetele---ua na iloa atu le masina ma fetu, o galuega ofoofogia ia a le Silisili Ese. Atonu o lagona foi ia sa i le loto o le tusi-

tala o le Salamo, e faapei ona tatou tatalo ai i aso faisoo. O le to'atele o Kerisiano, ua iloa ma faigofie ona faafesaga'i ma le Atua i le vaaiga faale-natura ua si'osi'omia ai. E faaopoopo ane i le pupula o fetu, ua faasino mai foi e le Salamo 19 se tasi o nofoaga e fesaga'i ai ma afioga a le Atua. Ua faailoa mai i le Tusi Paia o le a'oa'oina o Tulafono, lea ua ta'utino mai e le fai-Salamo: O le a'oa'oina o afioga a le Atua e ave e faapei o le pupula o le masina ma fetu i le pogisa, po'o le faatonu ala e savavali ai.

O tusi-tala o le Ulua'i Ekalesia Kerisiano, ua latou ta'ua "tusi" e lua ua faailoa mai ai le Atua: o le natura o le si'osi'omaga, ma afioga tusia a le Atua. E femolimau a'i tulaga ia e lua. O fea o ia tulaga e lua e te faalogologo ai i le tala lelei mai le Atua? A e o le a lea fe'au mai le Atua ia te 'oe?

Tatalo: Le Atua e, fetalai mai pea i au afioga e ala i le Tusi Paia, ma le pupula o le si'osi'oga o au galuega mamana. Faapupula i o matou mata e vaavaai ai, ma o matou taliga e faalogo ai. **Amene.**

ASO GAFUA, Me 7, 2018: "Ua 'aumai le tala lelei."

Bringing good news.

Tusi Faitau: Isaia 52:7-10.

Matua (f.7a), *E matuā matagofie i luga o mauga o vae o lē ua fai mai le tala lelei, o lē logologo mai le manuia, ua tala mai le tala lelei; ua faailoa mai le olataga...*

O le tausaga ua mavae sa faailogaina ai le iupeli auro talu ona faaiipoipo o'u matua. O se faamanatuga e ao ona faailoga, ma le faamoemoe e tuuina mai e le Tupu Tama'ita'i o le malo Peretania se fe'au o faamanuiga.

Sa matou taupulepule ma lo'u uso ma lo'u tuafafine ia matou faatinoina lenei fuafuaga, peitai, sa le matua atoatoa lona faatinoga. Sa ia te a'u le kopi o le tusi faamaonia o le faaiipoipoga, ma ua faatatau aga'i i ai a matou fuafuaga, ina ia mautinoa matou te loto faatasi pe a taunuu mai---e faia lava nei fuafuaga uma e aunoa ma le iloa e o matou mātua. O se tulaga e faagae'etia ai o matou loto ina ua matou vaaia i le taeao lava o le aso faamanatu le 'ave-meli, ua momoli mai le tusi o faamanuiga mai le Tupu Tama'ita'i o le malo o

Peretania. O lea ua tuu i le faava'a e fai ma faamanatuga o lenei aso taua, ma ua faapipii i le puipui o le potu nofonofo. Ua faailoa mai i le tusi faitau o lenei aso, e le o le 'ave-meli po o le fe'au na 'aumai e faasili lea i o tatou manatu. Aua o le tele lava o faaaliga a le Alii, e auala mai lea i se isi auauna ua filifilia. A o nisi foi taimi, e aofia ai le faifeau po o le failauga i le ekalesia, ua latou faamalosi e tala'i mai le fe'au mai le Alii. A e o nisi ua taumafai e faamalamalama mai, e faapea: Ua finagalo le Alii e faailoa mai lona finagalo i upu faigofie, po o ni faaa'oa'oga i o latou lava olaga.

E to'atele 'avefe'au e galulue ma faatino e aunoa ma le iloa atoatoa, ua fa'aogaina i latou e le Alii i le faatinoina o lona finagalo. Atonu o lenei aso tatou te fesaga'i ai ma se tasi ua na 'aumai le tala lelei mo 'oe ma a'u. A e pe faapefea ona iloa ma malamalama i lea mea? A e pe faapefea foi ona talia i latou ia?

Tatalo: Le Alii e, ia e faailoa mai i o matou loto le fe'au ua tala'i mai e au auauna ua filifilia, ma ia matou talia ma le agaga fiafia mea-alofa ua 'aumai mo i matou. **Amene.**

Mafaufauga Loloto: Pe e te manatua le taimi ma le nofoaga na valaauina ai 'oe e fai ma 'ave-feau a le Alii, e tala'i atu le tala lelei i le lalolagi?

ASO LUA, Me 8, 2018:

“Mafaufau ma manatunatu loloto e manuia ai.”

Meditate in order to appropriate.

Tusi Faitau: Salamo 119:1-16.

Matua (ff.14-15), *Ua ou fiafia lava i le ala o au tulafono, e sili i le oloa uma lava. Ou te mafaufau lava i au fe'au, ma ou manatua lava ou ala.*

A o o'u tusia lenei faamatalaga, o le taimi lea o lo'o usua se fonotaga i Roma, o lo'o faatasi ai sui mai itu eseese o le lalolagi o le faalapotopotoga a le "Jesuits." O lenei fonotaga e faatoa usua ina ua mavae pe sefulu tausaga; ou te manatua o le fonotaga taluai na faatulagaina ai tiute ma taualumaga uma e tatau ona ta'ita'iina ai le soifuaga auauna o le 'au uso aua le faamoemoe sologa manuia o lenei mafutaga.

I lenei vaitaimi, ua i ai se fesili ua tula'i mai, e faapea: E faapefea ona faatino ma faataunuu nei fuafuaga uma i se tulaga tataua ma le lelei? E faapefea ona faatino fuafuaga sa tusia i le vaitusi ma pepa, i se malosi e faataunuu ai i o tatou olaga ma olaola ai pea galuega faale-talalelei? O nei fesili, ua le fou lea i le fai Salamo. O le Tulafono, o le Tusi Paia Lutaia o le Tora, ua faailoa atu ai le Upu a le Alii, o a'oa'oga e faatatau i le finagalo o le Atua mo i tatou uma. Pe faapefea ona galue malosi ia afioga a le Atua i o tatou olaga a e maise e ua faitau i ai, mai lea auga tupulaga i le isi auga tupulaga?

“Ia mafaufau”, o le tali faapitoa lea ua ‘aumaia e le fai Salamo. Mafaufau loloto i upu ua tusia, ia faatino i talosaga, ma ole atu pea i le Atua mo le Agaga fesoasoani tatou te malolosi ai. E mautinoa ma le le masalosalo, o ia faatinoga e i ai ma le fiafia. O se avanoa lelei lenei e ‘aumaia ai le Upu a le Atua, a e le o se avega e tau'ave. E tusa lava pe ou te ta'utino lo'u faatamala, ina ua ou vaivai e tali atu i mana'oga o le Tulafono, a e o le faatuatua e iloa ai le agalelei ma le alofa o le Atua na te le tu'ulafoa'iina ai lo tatou vaivai faale-Tulafono. Ma, a o'ina ou iloa ma malamalama, ona leai lea o se loto masalosalo, a e fiafia e faasoa atu lea malamalama i e ua mafai ona faatasi mai ma mafuta faale-tala lelei.

Tatalo: Le Alii e, afio mai tatou te mafuta faatasi a o matou mafaufau ma manatunatu i au Tulafono. Fesoasoani mai ia faia lou finagalo i o matou olaga. **Amene.**

Mafaufauga Loloto: Afai e fesili atu se tasi ia e faailoa mai, ua e faia le finagalo o le Alii i lou olaga: Pe faapefea ona e tali atu i lea fesili?

ASO LULU, Me 9, 2018:

“Pe aisea ua faia ai faata'oto?”

Why parables?

Tusi Faitau: Mataio 13:10-17.

Matua (ff.16-17), *Amuia o outou mata, aua ua vaavaai; ma o outou taliga, aua ua faalogo; aua e moni, ou te fai atu ia te outou, E to'atele perofeta ma tagata amiotonu sa naunau i le fia iloa o mea ua outou vaai i ai, a e le'i iloa; na fia faalogo foi i mea ua outou faalogo i ai, a e le'i faalogo ai lava.*

“O le ogatotonu o le fe’au lea.” (the medium is the message). Na ta’ua e Marshall McLuhan nei upu, e fai ma auala e faaalua ai le filifiliga a le Atua i le ala e aumaia ai le tala lelei i le lalolagi. Ua faaali manino mai e le ‘au faievagelia, o Iesu lava na filifilia lenei auala e tasi: Ia a’oa’o mai i faata’oto. O le faata’oto la i lona amataga, ua le o se tala e faatatau i mea ua aofia i le tala ma o latou lava uiga faapitoa. O le faata’oto, o lo’o i ai se uiga loloto e fia faamalamalamaina, a e o se lu’itau e sa’iliiti i ai ina ia iloa tonu le mea sa lilo. O le faamatalaina o le faata’oto, ua le o finagalo Iesu e tali mai, “E moni, ua ou malamalama, ua manino mea uma!”, o le mea lea, “Po’o le a le uiga o nei mea uma?” A o e susu’e i afioga a le Alii ma vaavaai i ai, e mana’omia le mafaufau ma le loto e iloa atili ai.

Pe afai e taumafai e fia iloa le uiga o upu ua tusia i le faata’oto, o le upu moni, e mana’omia sou taimi ma le loto e malamalama ai. O le mea lea, i lenei taimi, o le to’atele e faalogo i nei faamatalaga, ua le o malamalama lava, ua le o iai foi se agaga e naunau i ai e pei ona mana’omia. Ua manino i le molimau a le ‘au faievagelia, na silafia lava e Iesu lenei mea, peitai, ua le taofia ai lona finagalo ina ia faataunuu le fe’au. E tusa lava pe tuu fesili ona so’o ia te ia, ina ia faataunuu i se isi auala e le faigata mo ia, peitai, sa faataunuuina lava. Ia manatua lenei mea, a o e taumafai ia manino ia te ‘oe le uiga o le faata’oto, e o’o mai lava le taimi e manino ai i lau vaai ma iloa lona taua e ta’ita’iina ai ‘oe ma le fiafia. O lea foi taimi, o le a manino ai ia te ‘oe le finagalo o le Alii o Iesu, i lona fa’aaogaina o lenei a’upegaga taua, Amuia o outou mata, aua ua vaavaai; ma o outou taliga, aua ua faalogo; ...

Tatalo: Ia e fesoasoani mai, le Alii e, ia ou malamalama atili i au afioga ua faamatalaina. Ia avea lea ma auala e faatino ai i lo’u olaga, e tusa ma lou finagalo. **Amene.**

Mafaufauga Loloto: O le fea faata’oto a Iesu e sili ona e fiafia i ai? Aisea ua e filifilia ai?

ASO TOFI, Me 10, 2018 (Aso o le Afio a'e):

“Taga’i i ou ‘autafa, a e le o luga.”

Look around not up.(Ascension Day)

Tusi Faitau: Galuega 1:1-11.

Matua (ff.10b-11), ... *Faauta foi, o tagata e to’alua ua tutu mai ia te i latou i ofu sisina. Ua fai mai, “O outou tagata Kalilaia e, se a le mea tou te tutu ai, ma vaavaai i le lagi? O Iesu le na, ua aveina a’e nai ia te outou i le lagi, e faapea ona toe afio mai o ia, pei o lona afio atu i le lagi na outou vaavaai i ai.”*

E to’atele ua iloa ma malamalama i le tulaga e uiga i tete’aga, ua mou atu i le vaai o e pele i le loto, ua malaga ese atu ma tu’ua le mafutaga sa masani ai---e faimalaga i taavale, o pasi, o vaa foi ma vaalele---e mou atu lava i se nuu e mamao. O se uiga masani, ma o se lagona foi e peiseai ua misi ma gaogao i le manatu ma le mafaufau. Pe ‘ou te toe vaai ‘ea i ai afea? O le a la sau mea o le a fai nei? E faapena le lagona sa o’o i le ‘au so’o sa vaavaai ma matamata i le taimi o le afio a’e i le lagi o Iesu. O le taimi lava lea na molimauina ai se vaaiga uiga ‘ese, o alii e to’alua e o’ofu i ofu papa’e sisina, o agelu, o ‘ave-feau mai le Atua. O agelu e le iloa po’o fea e o mai ai! E faigofie ma tuu sa’o la la fe’au ua ‘aumai. ‘Aua le va’ava’ai i le lagi, a e faasaga e galue ma tautua. E i ai galuega e tatau ona fai, a o faatalitali mo le toe afio mai o Iesu (ma le leai o se masalosalo). O le tasi lea o pogai o le faitioina e Karl Marx le ‘au Kerisiano, ina ia aua nei na ona faatalitali ma nofonofo, a e alo ane e fofu ma taumafai e titina le tele o faafitauli o loo tula’i mai i le si’osi’omaga o i ai nei, ia vaavaai i le lagi ma faatalitali e afio mai lava le Alii e lavea’i i faigata ma puapuaga. E i ai le taua o lenei faitioga. O i latou ua faalogo i le fe’au mai le Atua, silasila ane ma taga’i i ou tafatafa e faatino sau fesoasoani e faapei ona faia e le Keriso---fesoasoani ia i latou e mana’omia se fesoasoani. O i tatou lava o e ua valaauina e taga’i ane i ou tua’oi, a e le na o le vaavaai i le lagi.

Tatalo: Le Keriso e, fesoasoani mai ia matou taga’i toto’a i o matou tafatafa; foa’i mai le malosi matou te fesoasoani ai i e ua mana’omia le fesoasoani, a o matou faatali mo lou toe afio mai. **Amene.**

Mafaufauga Loloto: Tagataga’i pea i ou tafatafa i lenei aso, e faapei ona fesoasoani Iesu i e mafatia ma puapugatia. O le a se mea e te mafaia? E faapefea ona e tali atu i ai?

ASO FARAILE, Me 11, 2018:

“E faapefea ona e sau e feiloa’i ma Iesu?”

How do you come to know Jesus?

Tusi Faitau: Ioane 14:15-24.

Matua (ff.22-23), *Ua fai mai ia te ia Iuta (e lē o le Sekara lea), “Le Alii e, pe se a le mea o le a e faaali mai ai ‘oe ia te i matou, a e lē o le lalolagi?” Ona tali atu lea o Iesu ia te ia, “Afa’i e alofa mai se tasi ia te a’u, e tausia e ia la’u upu; e alofa foi lo’u Tamā ia te ia; e o mai foi i maua ia te ia, matou te nonofo ma ia.”*

E mafai ona su’esu’e i le Tusi Paia ma le loto atoa, le loto naunau i ai, e faapei ona faitau ma su’esu’e i le tala faasolopito o Roma po o tala faamaumuina o Farani. Sa i ai su’esu’ega faapolofesa ia faalautele le malamalama i le soifuaga o tagata i Kalilaia i ona po o le Alii o Iesu, po o le faamaumuina e pito sili ona sa’o i tusi ua tusia i le gagana Eleni. O ia su’esu’ega e avea ma fesoasoani malosi i e ua talitonu, e fesoasoani ia loloto le iloa ma le malamalama i le soifuaga ma taualumaga e uiga i le soifuaga o Iesu ma le fe’au o le tala lelei. Ua le afio mai Iesu i le lalolagi ona o se faamoemoe e ‘aumai ni tusi e sailia ai ni faailoga foma’i (doctorate)!

A silasila i lenei tusi faitau, o se molimau e mafai ona avea ma auala e malamalama ai ma iloa atili o i latou ua tuuina atu lo latou soifuaga atoatoa, i latou ua ta’utino atu le fia ‘auai i lenei mafutaga, i latou ua liua o latou olaga e fesoasoani i le lalolagi ma ona faigata. E avea lenei lagona e fai ma faamalosi loto, o lo’o mafuta faatasi mai le Agaga o le Atua i le aiga, o lo’o soifua ma ola ai.

O lenei, o lau lava filifiliga, ma o le lu’itau foi lea. O le uiga moni lea o lou su’esu’e atili i le Tusi Paia, o molimau mai tausaga anamuā, faatasi ai ma lou soifua a’oa’oina i le fesoasoani mai o tusi ua saunia e faalauteleina ai le iloa ma le malamalama i le finagalo tonu o le Alii lou Atua. Faamata e le avea lea avanoa, e tuuina atu ai atoatoa lou soifua, e talia lenei faasinoga e te ola ai pea? Ma o lenei foi auala, o le a

fa'aatoatoaina ai lou loto ia iloa mea sa lilo i lau vaai, ma lau faalogo.

Tatalo: Le Alii e, fesoasoani mai ia ou ola i le faasinoga mai le Tusi Paia, ou te ola ai pea i aso uma. Ia avea a'u e fai ma 'ave-feau o lea tala lelei mo aso uma lava. Amene.

Mafaufauga Loloto: Po ua e manatu, i so'o se auala lava, e mafai ona e feiloa'i ai ma lou Atua e ala i lou taumafai e ola e faapei o se so'o moni o Iesu?

ASO TOONAI, Me 12, 2018:

“Ola malamalama ina ua finau.”

Knowing through arguing.

Tusi Faitau: Galuega 1:12-14.

Matua (ff.12a-14a), *Ona latou toe foi atu lea i Ieruselema mai le mauga e igoa ia Olive, e latalata lea i Ieruselema, o le savaliga o le sapati lo la va. Ua latou taunuu, ona o a'e lea o i latou i le afeafe aupitoaluga, ... Ua finafinau pea i latou nei uma lava ma le loto gatasi i le tatalo ma le 'ai'oi ...*

O le tala na tusia e Chaim Potok, o le “The Chosen” (o lē ua filifilia), ua atagia tonu ai le uiga o le “yeshiva”, o se tasi o vaega o a'oa'o'ga faale-Tusi Paia a Iutaia. E tulaga 'ese e peisea'i o se nofoaga e a'oa'o ai le nofofilemu ma leai se leo e faalogoina, a e o le fale a'oga e pisapisaō i fefinaua'iga i mata'upu o loo tusia i le tusi ua tuuina mai e talosia i talosaga ma upu e lagi faatauloto. O le auala lenei, ua fautuaina, o le fe'au lea mai le Atua, ia manino ma malamalama ai ma avea e fai ma au meatotino.

Ina ua mavae le afio a'e, faapei ona ta'ua e Luka i le tusi o Galuega, na toe fo'i so'o o Iesu i Ieruselema ua mafuta faatasi ai i le tatalo, ma faatalitali i le afio ifo o le Agaga Paia, e faapei ona folafolaina mai. O le talitonuga e pei ona masani ai alii ma tama'ita'i, o loo i ai faatasi ma Maria le tina o Iesu, ua fai lea ma totonugalemu o lo latou faatasitasi, i le filemu lava ma le loto naunau i lona toe afio mai. E lē taumateina, o lenei vaaiga ua sili atu nai le vaaiga masani ua molimauina i le yeshiva. O se fefinaua'iga po o le a la le mea o le a faia nei. E manatua ai le alaga a Iesu e uiga i mea sa tutupu, ma le

fefinaua'iga e uiga i mea sa na ia faia. Sa latou tatalo faatauana mo se ta'ita'iga, ma le lagona ua tupu i le malosi o le mana o le fe'au sa latou faalagolago i ai.

Ua faamanatu mai e Luka, e faapea: “*Ua tasi lava le loto ma le manatu o e faatuatua uma lava;...*” (Galuega 4:32). O le faavae leni o le ola tuufaatasi ma taga'i loloto i le uiga moni o le tala lelei i le Keriso---pe faapefea ona ola ai ma saga tala'i atu i le lalolagi uma. E mafai ona finau atu Paulo ia Peteru, o Panapa foi ia Paulo---o iina tatou te vaai manino ai mafaufauga loloto i leni fefinaua'iga. Pe afai o le mafutaga ia 'aufaatasi e manatunatu atili ai i le taua o le 'aumaia o le tala lelei mai le Alii, e faapei ona faia, o le aoga lea o a tatou fetufaa'iga i taofi ma manatu e manino atili ai le fe'au ua 'aumaia mo le lalolagi Kerisiano.

Tatalo: Le Alii e, fesoasoani mai ia matou malamalama lelei i lagona o e ua matou loto faatasi, ia faapea foi i e ua ese'ese o matou manatu. Ia faailoa mai lou finagalo tonu i mea ua matou le iloa, ina ia matou iloa atili ai lou finagalo moni. **Amene.**

Mafaufauga Loloto: Faitau malamalama i le tusi faitau o leni aso, silasila ma taga'i i se isi faaliliuga e 'ese mai le faaliliuga ua e masani ai. O le a se mea taua ua e maua mai i nisi o faaliliuga e te le masani ai?

Ua sosolo faama'i pipisi: Faamatalaga i le Tusi Paia : 3 Ia 'auai faatasi.

Going Viral: Communication in the Bible: 3 Turning in
(Saunia e: Catherine Williams)

ASO SA, Me 13, 2018:

“Ia toe faafouina le ‘au ta’a’alo.”

Renewing the team

Tusi Faitau: Galuega 1:15-26.

Matua (ff.24-25): *Ua tatalo foi i latou, ua faapea atu, “Le Alii e, o ‘oe o lē silafia loto o tagata uma lava, ia e faailoa mai po o ai so laua nei ua e filifilia, na te maua le tofi o leni faiva o le apusetolo, na lafoa’iina e Iuta ina ia alu o ia i lana lava mea e nofo ai.”*

O le a faaaauu pea i lenei vaiaso la tatou sailiiliga i auala a le Alii ma ona tagata, e tusa ma auala e fesootai'i ai le tasi i le isi, ae maise lava i mataupu lilo, o lu'itau foi ma faasinoga e maua mai i le Tusi Paia, e tatau ona tau'ave pea, ma tatou maua ai le potomasani seia oo mai lava i nei ona po. O le tusi faitau o lenei aso, ua na ta'ita'iina i tatou se ia o'o i le aso Penetekoso, ma le o'o mai o le Agaga Paia ia i latou uma ua talitonu ma faatuatua ia Iesu.

Ia tatou amata atu i le 'au so'o ina ua mavae le afio a'e o Iesu, a e nonofo ma faatalitali pea po o le a se tasi mea e tupu mai. Ua tatou maua i le Tusi Paia le faailoa atu e Peteru, e faapea, afai e tumau pea lenei mafutaga e aveva ma totonugalemu o le toe faafouina o Isaraelu, ona tatau ai lea ona filifilia se to'a 12 o e fai ma ta'ita'i, ina ua to'esea Iuta le faalata ma lona maluu.

E faapei ona filifilia e Iesu le to'a 12 i le amataga, e tatau foi i le 'au so'o ona tatalo atu i le Alii e foa'i mai le iloa ma le malamalama e faia ai la latou filifiliga. Ua fai le vili, ma ua filifilia ai Matatia. Po'o tatou manatua 'ea, ua faafia ona tatou tatalo i le Atua ia foa'i mai le poto ma le mafaufau e faia ai a tatou filifiliga i mea e aafia ai le mafutaga a le 'au Kerisiano? Po ua tatou malamalama 'ea o le Agaga o le Atua na te ta'ita'iina i tatou e ala i talosaga, ia a'oa'oina lelei i tatou ia iloa ma malamalama o le Tusi Paia o Afioga a le Atua, ae maise o lo tatou sa'ili fesoasoani i auauna filifilia a le Alii? Po ua tatou faatuatua 'ea ma faalagolago i le Ekalesia Kerisiano ma le tala lelei ia Iesu Keriso, e pei ona tatou lolotu ma tautua ai i lenei aso?

Tatalo: Le Alii e, ia a'oa'o mai i lau Ekalesia Kerisiano ia savavali e tusa ma lou finagalo tonu. Ia auina mai lou Agaga Paia na te faatonu i matou ia tusa ma lau amiotonu. **Amene.**

ASO GAFUA, Me 14, 2018:

“Ia a'oa'ao mai ia te i matou.”

Teach me

Tusi Faitau: Salamo 119:25-40.

Matua (ff.33-34), *Le Alii e, ia e a'oa'o mai ia te a'u i le ala o au tulafono, ona ou 'ana'ana lava lea i ai se ia o'o i le*

gata'aga. Ia e a'oa'o mai ia te a'u, ona ou 'ana'ana lea i lau tulafono, ma ou tausia ma lo'u loto atoa.

Pe mata sa i ai sou taimi na e lagona ai, ua e pa'ū ifo i le ta'ele o lou iloa, ma ua leai lava se isi lagona e sili atu i le nā? E mafai ona maua le na lagona i taimi o ou faanoanoaga, i taimi ua puapuagatia i se ma'i faigata, po o taimi e iloa ai ua e matuā a'afia i se agasala matuiā lava, ma o'o ai ia te 'oe le masiasi ona o se faatinoga e pogai ona o le faatamala.

E foliga o se tulaga faapea na o'o iai le fai Salamo, e pei ona tatou faitauina. E pei ua ta'oto i le efuefu o le 'ele'ele---ina ua fo'i le tagata i le mea na mua'i faia ai. O se lagona faanoanoa ua tele na'uā, e peiseai ua 'ave'esea i tatou ona o faigata e lē ma 'alofia lava se ia o'o ina 'ave'esea ai le ola. Tatou te fefefe ma matata'u, aua o le a faaumatia ai i tatou.

Ona oo mai lea o le lagona, ia sola 'ese ma lafi ne'i iloa mai, a e sili ona fia sola 'ese mai le silafaga ati a le Atua soifua. Peitai, ua a'oa'o'ina le Kerisiano---ia fo'i i le Atua, o lē na faia le ulua'i tagata, o le Atua e agalelei ma alofa fua mai i ana galuega mamana na ia faia. O le tuuina atu atoatoa lea i le Alii ma le loto faatuatua moni, o iina e maua ai le amataga fou, aua e mafaia mea uma i le faatasi mai o le Atua soifua. Ua faailoa mai e le fai Salamo le faamoemoega e sili ona malosi, e ta'ita'iina ai i tatou i lalo ifo o le paolo tatou te malu ai i le ola fou e fiafia ai. Ua ole atu le fai Salamo i le Atua, ina ia a'oa'o mai, ta'it'ai mai, foa'i mai ma ia tumau ai. O lo tatou ole atu foi lea, ina ia foa'i mai se amataga fou, o lo'o i ai faatasi ma le mana'oga: ia a'oa'o'ina atili i tatou i ala o le Atua, tatou te iloa atili ai lona finagalo tatou te tutupu a'e ai ma le iloa o ana poloaiga.

O le a faataunuaina lava lenei mana'oga---i le agamalu ma le loto maulalo---ina ua tuuina atu ato'ato'a o tatou loto e tusa ma le finagalo o le Alii, i auala ma faasinoga ua musumusuina ai e le Agaga Paia tatou te le sese ai lava. O le loto ato'atoa mo le Alii ina ua faitau ma malamalama i ana afioga tusia, o le Tusi Paia, ae maise o Iesu le Alo Pele o le Atua e to'atasi---e ui ina tatou pa'u'ū ifo i le ta'ele o le lalolagi agasala: A e ona o le toe-tu manumalo o le Keriso le Faaola, o iina tatou te maua ai le ola fou ma le fiafia e tumau e faavavau, e ala ia Keriso Iesu.

Tatalo: Le Atua e, o ‘Oe lava o lo matou faamoemoe i le ola fou ua i o matou luma. Fesoasoani mai ia matou saili pea ia tupu le faatuatua i le ola fou ia Keriso. O ‘Oe lava o lo matou Matai e ta’ita’iina i matou i ala o le ola e tumau e faavavau. **Amene.**

Mafaufauga Loloto: O le fea le itu o lou ola faatuatua e tatau ona faalatele ai lou iloa? Tatalo i le Atua ina ia fesoasoani mai e faatupu tele lou faatuatua ma talitonu i lona alofa pea mai.

ASO LUA, Me 15, 2018: “Fetufa a’i a tatou avega.”

Sharing the Lord

Tusi Faitau: Numera 11:4-29.

Matua (f.25a), *Ona afio ifo ai lea o le Alii i le ao, ma fetalai mai ia te ia, ua ia avea foi nisi o le agaga na ia te ia, ma na tuuina atu i toaina e to’afitugafulu; ua nofo le agaga i luga ia te i latou, ona latou perofeta ane ai lea,...*

Na lavea’i le Alii ia Isaraelu nai le nofopologa, na tausi ia i latou i mea e aai ai, na avea lea ma faafiafiaga ia i latou aua na malolosi ai. A e ui i lea, sa latou muimui ma faaali lo latou le fiafia ia i latou lava atoa ma Mose. E manatua pea i o latou loto---e mo’omo’o i mea ‘ai matagofie ma le nanamu na tausia ai i Aikupito, a e galo lo latou pologa na mafatia ai i le pule sau a le tupu o Farao. Na taumafai Mose ma le loto onosa’i, i le ta’ita’iga o lenei to’atele o tagata, ona faameo ai lea ma muimui i le Alii. Ua faafiti na te le fia ta’ita’iina ma avea ma faatina i lenei nuu. Ua oo ina tupu lona loto vaivai ona ua tele taimi e taumafai ai pea. Ua ole atu i le Atua i lona le fiafia aua lenei tulaga faigata.

Ua faafofoga mai le Alii, ua na ‘au mai le fuafuaga e ‘ese lona faatinoga. Ua vaeluaina le malosi faale-agaga na tuuina ia Mose, a ua faasoa i le to’a 70 o toaina, ia latou fiafia ma fetufa a’i ai le avega i tiute faale-ta’ita’i i le perofeta atu. Na fiafia Mose i lenei fuafuaga, ia fetufa a’i le faatinoga o galuega faale-ta’ita’i, a e ia tulimata’i pea i luma i le taimi e foaiina mai ai e le Atua i ana auauna, o e ua talia le agaga paia e perofeta atu ai. Ua faafofoga mai foi le Atua i le ‘ai’oi atu a le fanauga a Isaraelu, ua foa’iina mai ai le tamaoiga o manu e tele e fai ma a latou mea’ai. E faapea foi i tatou, po ua faafia

ona tatou tagi i le Atua e foa'i mai, peitai, ua le faamalieina ai lo tatou tu'inaanau ia foa'i atili mai?

Po'o manatua e iai le taimi na tatou mulimuli ai ia Iesu ma le manatu o se tulaga e faigofie lea? Tatou te muimui ma faailoa le le fiafia i isi, a e galo ona ole i le Atua i o tatou mafatiaga? A e ia manatua foi, a avea i tatou ma ta'ita'i i a tatou ekalesia, ona manatu ai lea ia tatou pulea mea uma? Ia fetufa a'i o tatou tiute ma matafaioi, ia le mamafatu ai se avega e tau'ave e le fanau a le Atua, a e ia sologa manuia le faatinoga o mea uma.

Tatalo: Le Alii e, ua matou faafetai i mea alofa ua foa'iina mai, a e maise o le Agaga Paia lo matou Fesoasoani sili. Ua matou molimauina le togiola na saunia e Keriso, ua maua ai le malosi e fesoasoani i e ua puapuagatia. **Amene.**

Mafaufauga Loloto: O faapefea ona saunia ta'ita'i i la outou aulotu? O a ni auala ua saunia e mafai ai ona galulue faatasi? E i ai sona aoga ua maua mai ai?

ASO LULU, Me 16, 2018: “Faailoga o le ta'utinoga.”

Signs of committment

Tusi Faitau: Faata'oto 3:1-10.

Matua (f.3), *Aua ne'i te'a ma 'oe le alofa ma le faamaoni, ia asoa ai i lou ua; ia e tusi ai i le papa o lou loto.*

O loo i ai le mama-faaipoipo auro laitiiti lava, i lo'u tamatama'i lima lona tolu o lo'u lima tauagavale. A e faapea foi i le lima o lo'u to'alua faaipoipo, ua atoa nei le 30 tausaga o ma tau'aveina pea. E asoa i lo'u ua le 'ula e i ai le faakoluse auro, ma e toetoe o aso uma ou te la'eiina ai le fasi'ie pa'epa'e i le kola o lo'u ofutino. O le matua faanoanoa lava o lo'u loto, pe afai a e le iloa se tasi o nei faailoga-taua; e le faapea ona o le taugata po ona o tupe na maua mai ai, a e ona o se tulaga e matua sili lava i lo'u loto---o la'u ta'utinoga o le faaipoipoga, ae maise o la'u ta'utinoga faa-Kerisiano mo le ositaulaga---o mea e sili atu lona tau nai lo tupe. O folafolaga, o le ta'utino atu o le tautoga i luma o le Atua, o se faatinoga e tupuga mai i le alofa, le faatuatua ma le avafatafata i le va feagai ma isi---aiga, uo ma e masani, e oo lava i tagata'ese.

O le tusitala o le tusi o Faata'oto, ua na faamalosi mai i e talitonu ma faatuatua i le Atua, e tatau ona taofiofi mau i tulafono seia oo lava i le faavavau. O le poloa'iga ua tusia i le Teuteronome, o loo mulimuli ai pea tagata Iutaia i le 'ulaina o le tama'i pusa e tuu ai upusi'i mai le Tusi Paia, e faapipi'i foi i o latou muāulu ma le lima tauagavale i taimi o talosaga. O le faailoga lea e iloa ai o Tulafono a le Atua o lo'o tusia lea i o latou loto. A e o nisi foi o taimi, e fesoasoani lenei faatinoga e fai ma faailoga vaaia, e fetufa a'i ai ma isi, a e maise o se faamaufa'ailoga o lo'o tumau pea le faatuatua. O nei faailoga fa'atauavaa i le va'ai, e fa'ailoa ai le talitonuga e tumau ma le mausali i le loto talitonu ma le faatuatua i le fa'amoemoe e savavali ai pea i luma. Ua fa'amanatu mai e le tusi Faata'oto, ia fa'amuamua le Atua i mea uma---i le agalelei ma le alofa, foa'i ma le fa'amasinoga tonu, a e maise ia iloa, o nei mua'i fa'asinoga e maua ai le ola saogalemu ma le fiafia.

Na a'oa'o mai se tasi faifeau Aferika i Saute i le tele o tausaga ua mavae, ina ia ou manatua pea upu nei: "O lo tatou tiute ia ola faatuatua, a e o le Atua e foa'i mai mea ua tatou ole atu ai." Pe a faatuatua, ona iloa ai lea, o le Atua ua na foa'i mai mo i tatou e tusa ma lona finagalo.

Tatalo: Le Alii e, ia avea lo'u loto e fai ma mea e faapipi'i ai le alofa ma le faatuatua i lau afio. Ia avea ia faailoga e fai ma mea e faaalua ai le alofa ma le faamaoni, e ala i upu ou te tautala atu ai. **Amene.**

Mafaufauga Loloto: "O lo tatou tiute o le faatuatua, a o le Atua na te foa'iina mai mea ua tatou ole atu ai." O a ni faatinoga o e faia e faamaonia ai ua ia te 'oe lea talitonuga?

ASO TOFI, Me 17, 2018:

"O le Atua: o ananafi, o le asō ma le lumana'i e faavavau."

God: yesterday, today and forever

Tusi Faitau: Salamo 77.

Matua (ff.11-12), *Ou te manatua galuega a le Alii; e moni, ou te matuā manatua ou vavega anamuā. Ou te manatunatu foi i au galuega uma, ou te mafaufau i mea na e faia.*

E i ai taimi i la tatou faiga malaga faa-Kerisiano, tatou te faapea ane ai, ua mamao le Atua ma i tatou, e foliga ua na

tu'u lafoa'i mai. E ui i lo tatou faatuatua, a e i ai taimi e fetaia'i ai ma faafitauli o le olaga, o le amioletonu foi po'o mafaufauga tau faasese, ma faalavelave faafuase'i e tutupu mai. Ua le avea lo tatou fai ma so'o o Keriso e 'alofia ai mai mea faigata o le olaga, a e maise o tatou lava mafaufauga leaga ma le loto masalosalo. E to'atele Kerisiano latou te ta'u mai ituaiga o a'afiaga eseese o le olaga, ua faaigoa o: "taimi pogisa faale-agaga"; a e avea le ola tupu pea ma le faatuatua faafouina e faamalosia ai le ola auaua mo le Alii le Atua; e tatalo ma tagitu'i mo se fesoasoani; taumafai ma le faamaoni e fulitua i le leaga; inoino ma taumafai malosi e taofiofi lagona vaivai e tula'i mai. O ia tulaga faigata sa faafeagai ma le fai Salamo ma maua ai lona potomasani: Ia fai lea ma faaa'oa'oga e ta'ita'iina ai i tatou pe a faafeagai ma faigata o le olaga. E peiseai ua manatu le fai Salamo, ua le faataunuuina poloaiga a le Atua, e peiseai ua galo i le Atua ona agalelei mai ma faaauau lona alofa. A e o le faatuatua, e le tasi se auala e saunia e le Atua mo le tagata, e faapei ona tatou molimauiina i ana galuega mamana, ua iloa ai lona alofa tunoa i ana galuega na mua'i faia, ma e faapea lava ona faia i o tatou taimi. Ua iloa e le fai Salamo o le Alii le Atua, o le Atua alofa, o lona finagalo alofa e laveaiina ai ma faasaoina lana fanau. E tumau pea le Atua, o ana galuega foi e vaaia i le lumanai, e atagia ai mea na ia faia i taimi ua mavae. E telē atu le avanoa e sili ai le Kerisiano nai lo le fai Salamo.

Tatou te iloa le faatinoga pito maualuga na saunia e le Alii le Atua---na liutino-tagata e ala ia Iesu aua le lavea'iina o le lalolagi o tagata. E ao ona tatou talitonu e le mafai e le pouliuli pito pogisa, e le mafai foi e so'o se puapuaga o le olaga nei, aua o le mana o le Atua e mafaia ai mea uma.

Tatalo: Faafetai le Atua i lou agalelei ma lou alofa o loo faaalua i aso uma e le aunoa. Fesoasoani mai ia matou faatasitasi ma mafuta i lou alofa tunoa, ae maise lava i e o loo finau ia ola i le faatuatua. **Amene.**

Mafaufauga Loloto: Faitau i le Tusi Paia i tala o galuega mamana na saunia e le Atua, ia avea lea e fai ma talipupuni i taimi faigata ma taimi e vaivai ai le ola faatuatua.

ASO FARAILE, Me 18, 2018:

“I tala atu o le ola toefuata’iina.”

Beyond conversion

Tusi Faitau: 1 Korinito 2;1-13.

Matua (f.7), *A e peitai, matou te tautala atu i le potu o le Atua, ua lilo ma ua natia, na tofia e le Atua anamuā anamuā lava, ina ia tatou manuia ai.*

Na faapefea ona liua ‘oe faale-faatuatua? E te manatua? Atonu pe na e fanau mai i le li’o o se aiga Kerisiano, ma a’oa’oina ai ‘oe ia e alofa ia Iesu lou Faaola a o e itiiti lava. Ai sa a’oa’oina ‘oe i tala e faatatau ia Iesu i le a’oga, ma e fiafia ai e te mulimuli ia Iesu. A le o le na foi, ua a’oa’oina ‘oe ina ua e matua, ma ua e talitonu e mulimuli ai e tusa ma le mālō o le Atua. Atonu sa o’o ia te ‘oe se faaliliuga uiga ‘ese i lou olaga, ina ua fetalai le Alii ia te ‘oe i se miti, e faapei o le liliuina o Paulo i le faaaliga. Ua tusi atu Paulo i le ekalesia i Korinito, ma lona loto filifiliga i le malosi o le mana o le Agaga Paia, e tala’i atu le tala ia Iesu Keriso na faasatauroina, i upu faigofie e malamalama ai. O le mana o le Atua e ala i le togiola na saunia e Keriso: I lona maliu ma lona toe-tu nai le oti, o le ata manino lea o le ola ua faaliliuina, e le o se potu faale-tagata po’o se faatauana. O le faamanatu mai lea ia i tatou ia avea ma amepasa o le tala lelei ia Keriso, ina ua a’oa’oina i le olaga faakerisiano moni, ma faatamaoigaina i tatou e ala i le Agaga Paia, e tala’i atu i upu ma amioga e liua ai loto ma manatu o e ua tala’iina.

A e faauta foi, o le faatuatua e le gata na o le faaliliuina, aua o le faa’ato’atoaina o le ola ia Keriso ma tumau i le faatuatua, e ao i le Kerisiano ona su’esu’e ma tulimata’i pea ia iloa le loloto ma le maualuga o le Atua e le o vaai i mata faale-tagata. E le gata le ola sa’ili’ili pea ia iloa le Atua. E leai foi se faai’uga o la tatou sa’iliga i le olaga nei, se ia vagana ua tatou iloa atoatoa le i ai o le Atua. A e ina ua tatou talia le Agaga Paia, ua avea lea ma fesoasoani sili tatou te iloa ai le potu o le Atua sa lilo. E taua lo tatou sa’ili’ili ia maua le malamalama, faitau i le Tusi Paia, fetufa a’i ma su’esu’e atili ia malamalama i le ola faatuatua ma le agamalū.

Tatalo: Le Alii e, faafetai i e ua matou mafuta ma talatalanoa faatasi e uiga i le faatuatua i lau afio. Fesoasoani mai ia ou iloa

ona molimau le tala ia Iesu i upu e faigofie ona malamalama ai, ma ia matou malamalama i le mana silisili ese o le Agaga Paia. **Amene.**

Mafaufauga Loloto: O le mafutaga a le ‘au Kerisiano ua vaevaeina i mata’upu eseese. Silasila i ai ma filifilia se mata’upu e te vaavaai lelei i ai i ona itu uma. Vaavaai ma su’esu’e atili i ai po o le a se mea e te maua mai ai.

ASO TOONAI, Me 19, 20 “Sauniuni e faailoga le fiafia.”

Getting ready to celebrate

Tusi Faitau: Salamo 51:1-12.

Matua (ff.10,12), *Le Atua e, ia e faia se loto mamā mo a’u; ma ia e faafouina se loto mau i totonu ia te a’u. ...Ia e faafo’isia mai ia te a’u le olioli o le olataga mai ia te ‘oe; ia e taofimauiina foi o a’u ma le loto fiafia.*

O lea ua tatou tulata i le faai’uga o le vaiaso, a e se’i silasila ma tagataga’i i le faamanatuina o se tasi o aso taua ua lata mai, o le Penetekoso, tatou te faailogaina le afio ifo o le Agaga Paia i mea uma e i ai le faatuatuaga ia Iesu. Ua masani ona fa’aogaina le Salamo 51 i sauniga e faatino ai le faato’esega mo le faamamaina o agasala, e faapei o le Aso Lulu o le Lefulefu ma le vaitau o le Leni (lent).

Ua fesoasoani mai lenei i lo tatou sauniuni e avatu le faato’esega mo a tatou agasala---o le faato’esega mo le faamamāina o agasala, ma faafouina i tatou e talia le afio ifo o le Agaga Paia. Ua talosaga le fai Salamo ia faamamā ma ia matuā fufulu’eseina uma leaga, a e talia le ola fou ua saunia tatou te fiafia ma olioli ai.

O lenei tala lelei, o le alofa tunoa lea o le Atua ua lava ma totoe, e faamagaloina ai ma faafouina i tatou, peitai, e pa’ū’ū pea lava ma to’ilalo. Ua talosaga le fai Salamo ia foa’i mai se loto mamā ma ia faafouina se loto mau i totonu ia te ia. O upu ia e folafolaina atu e le ositaulaga, i le taimi e faataunuu ai le sauniga o le Talisuaga a le Alii. O le faamanatu mai lenei, o le alofa tunoa o le Atua ua faamamaina ai i latou ua faapitoa mo le tau’a’oaina o mea paia, aua o Iesu lava o lo’o i le Ulu o le Lao’ai---ua faafeiloa’i mai i tagata uma lava. O le faamaligiina o lona toto paia ua faamagaloina ai a tatou agasala, a o lona tino ua tatou maua ai se amataga fou.

Na tatou amata lenei vaiaso i le faaopoopoina o le ‘au so’o, ia lava saunia mo le tala’iga o le tala lelei e ala i le Mana malosi o le Atua. A e o se faatinoga taua i lenei aso, ia saunia lelei i tatou aua a taeao i le faailogaina o le afio ifo o le Agaga Paia, ma ia tatou sauniuni e tala’i atu le alofa tunoa o le Atua i e ua ta’utino e avea Iesu Keriso e fai ma o latou Alii ma le Faaola.

Tatalo: Le Alii e, ia e fesoasoani i a matou faato’eseega o lenei aso. Ia matuā fufulu’eseina o matou leaga, a e faafouina i matou aua le faailogaina o le Penetekoso a taeao: faatasi ma le ‘au paia uma, o ananafi, o le asō ma aso o i luma. **Amene.**

Mafaufauga Loloto: Ia la’ei le lanu-mūmū, lanu-samasama po o le lanu-moli a taeao, e faamanatu ai le “afi” (malosi) o le alofa o le Atua ua faaalai i le auina mai o le Agaga Paia.

Ua sosolo faama’i pipisi: Faamatalaga i le Tusi Paia:

4 Ua sosolo atu.

Going Viral: Communication in the Bible :

4 Going Viral

(Saunia e: Tim Yau)

ASO SA, Me 20, 2018 (Aso Penetekoso):

“Ua fetalai mai le Agaga Paia.”

Spirit speak (Penteconst)

Tusi Faitau: Galuega 2:1-13.

Matua (f.6), *Ua lagona foi lenei ta’alili, ona faapotopoto mai ai lea o le motu o tagata, ua fememea’i, ina ua ta’itasi ma faalogo atu ia te i latou ua tautala mai i lana lava gagana.*

Sa ou faimalaga ane i le vaalele i le fonotaga o ekalesia tuu faatasi, na faailoa mai ia te a’u e faatali atu le ‘ave taavale pe a ou taunuu. Ina ua ou taunuu i le nofoaga ua saunia mo pasese, sa ou le malamalama i le anoano o le mau tusitusiga ma faamatalaga ua tuuina mai, ae maise o gagana ou te le malamalama ai, ma ua faaletonu lo’u mafaufau po o le a lenei tulaga. A o o’u faatalitali pea, sa ou faalogoina le mau leo ese’ese ma le malomaloā mai tua. Taluai ona ou te le malamalama i le tele o talatalanoaga, sa ou faalogoina loa le faasalalauga, ma ua o’o ina ‘ave’eseina ai lo’u mafaufau. Ina

ua faasolosolo pea le taimi, ua amata ona ou mafaufau po o le a se mea ou te faia, pe afai e le taunuu se 'ave taavale. Ua ou tau mamao nei ma le aiga moni. Ua vave ona o'o ifo i lo'u loto, o se musumusuga i lo'u mafaufau lē mautinoa, o se leo i le gagana 'afa'afa faa-Peretania, "Po'o 'oe lea o Tim?" Ua ou faalogo ma ou malamalama i nei upu faatauvaavaa lava, a e foliga ua lava lea e lavea'i mai i lo'u nofonofa ma le leai o se mea'ai, fa moe, ae maise le malūlū o le fola o le fale i le malae vaalele.

O le "leo" ua taua lea mo a'u i lenei aso: O le a se uiga taua mo i tatou e tusa ma le o'o mai o le aso Penetekoso, o le Agaga Paia ua fetalai mai mo le lalolagi o malo ma tagata, e le afaina po'o le fia o gagana e fesoota'i ai, a e taua le silafaga a le Atua ua na silafia ai i tatou uma, o le "leo" o loo aumaia ai le tala lelei o le faaolataga ma le ofoofogia o le Alii le Atua.

Tatalo: Agaga Paia e, ia faaa'upegaina i matou i le gagana e tala'i atu le ofoofogia o le faaolataga ua uma ona saunia mo le lalolagi ma tagata o nonofo ai. **Amene.**

ASO GAFUA, Me 21, 2018: "Lauga o le Agaga Paia."
Spirit Sermon

Tusi Faitau: Galuega 2:14-21.

Matua (f.14), *Ona tulai lea o Peteru, atoa ma le to'atinoagafulu ma le to'atasi, ua fai atu ma le leo tele ia te i latou, "Sema e, o outou lutaia e, atoa foi ma e ua nonofo i Ierusalem uma lava, ia iloa e outou lenei mea, ma ia faafofoga mai i a'u upu."*

O fea sa e iai i le taimi o le faailogaina o le afiafi ua aulia le 1999 tausaga? E mafai ona e mafaufau ifo ia te oe lava, i le taimi o le 9/11 na osofa'ia ai e le Al-Qaeda le New York World Trade Center? E to'atele i latou e manatua le nofoaga tonu sa i ai i lea taimi na tupu ai lenei osofa'iga pito matuiā, ua suia ai taualumaga o le lalolagi ua i ai nei. Peitai, o nisi o taualumaga pito iloga, e tutupu ma toe mavae atu e aunoa ma lo tatou iloa, a e faatoa toe mānuā'e mulimuli ane ma iloa lo latou taua tele. Mo se faata'ita'iga, i le masina o Mati i le 1989, o le saienetisi e igoa ia Tim Berners-Lee mai Peretania, o ia lea na fausia le World Wide Web, ua fa'aaogaina nei i le

Digital Age, ma avea ma auala o fesootaiga o le miliona o tagata e fa'aaogaina ai le internet.

O le Aso Penetekoso, o le o'o mai lea o se amataga fou, o Tausaga o le Agaga Paia; ua suia le lalolagi i se tulaga sa le'i i ai muamua. Ua faasino tonu lea i le auala o feso'otaiga faale-Tala Lelei tau le Atua, i fetufaa'iga ua faaolaina ai le lalolagi uma. E amata mai i le Malumalu i Ierusalema se ia pa'ia malumalu o loto ta'ito'atasi. E amata mai i le Ositaulga Sili e pa'ia le 'au ositaulaga o e ua talitonu ma faatuatua. Na amata i tagata Iutaia ma pa'ia isi tagata, o ituaiga ma gagana eseese o le lalolagi. Ua saunia e le Atua auala ese'ese, peitai, e le o tagata uma e iloa ma malamalama i le tala lelei. Na ulutinoina le aposetolo o Peteru, o le tagata faifaiva e le iloa sona a'oa'oina, a e sau mai se aai e le lauiloa o Kalilaia. Ua tula'i nei Peteru i luma o le motu o tagata e uiga eseese o Ierusalema, e fefiloi ai tu ma aganuu eseese, le aufaigaluega matutua mai lea itu ma lea itu o le mälō tele o Roma, ua folafola atu i ai le tala lelei. Ona o le mana o le Agaga Paia, ua faailoa atu e Peteru le poloaiga ua tusia i le Tusi Paia, i se auala e manino i le faalogo, ua tupu ai le loto talitonu o le motu o tagata, ua faaopoopo le to'a 3,000 o e ua talitonu. Tatou te tau fai lagona lenei avanoa e talia ai ma talitonu, e le o le folafola ma lauga atu i se to'atele o le motu o tagata, a e o le Agaga Paia ia faaa'upegaina i tatou uma e tautala atu ai i upu ma amioga faale-Tala Lelei ia Iesu Keriso.

Tatalo: Le Agaga Paia e, ia fa'aaogaina i matou e fai ma a'upega o le tala lelei a Keriso, e le faalagolago i so matou lava malosi, po'o tofiga, po o le poto faale-lalolagi, a e ona o le Mana o le Atua e mafaia ai mea uma. **Amene.**

Mafaufauga Loloto: Pe faapefea ona e iloa o le finagalo o le Atua ua filifilia ai 'oe e fai ma 'avefe'au o le tala lelei?

ASO LUA, Me 22, 2018: “Pese a le Agaga.” Spirit song

Tusi Faitau: Salamo 98.

Matua (f.1), *Ia outou pepese atu i le Alii i le pese fou; aua o vavega na na faia...*

A o o'u talavou lava, sa i ai la'u kitara e lanu mūmū 'i'ila lava. Sa ou moe miti e i ai se aso ou te pese ai i luma o se faatasiga tele lava, peitai, ua na o le leo o uaua pe a taina ou te faalogologo i ai ma gata mai ai iina. Ia, ua na o ni mo'omo'oga faatama talavou ma o'u mana'oga sa i ai ia avea ma tama-pese, peitai ua le o se tama-autū i le tala'au pese, ua le o se tama-pese foi. O nisi taimi, e oo atu ai i le lagona o le fia ta'uta'ua i le vaavaai mai a tagata, ia alofagia e tagata, ma ia auauna mai foi tagata. I taimi o pepe i le tuputupu a'e, e tagi ma naunau ia si'isi'i pea, e 'ata'ata foi pe a eneene ma faafiafiaina. So'o sa tatou mea e fai, e i ai lava ona uiga ma sona mafua'aga e naunau i ai.

A e faafetai ona o le to'atele e maua avanoa e tutupu a'e ai i le li'o lea, ma faaauau ai pea ia uiga lelei mo isi. Peitai, e i ai lava le isi vaega e i ai pea le loto ia: "tama po'o le teine autū," e faigata ona vavae'eseina. O le pese le na e faatatau i le manatu faapito. E i ai foi taimi i le olaga faale-tagata e alu ai le mafaufau i isi tagata, e faapogai mai i le naunau o le loto i le vaavaai ma tosina i ai le loto, po'o le alofa faavalea foi i se faaupuga faigofie. E tupu foi lea tulaga i mātua e faapele i nisi o fanau.

E i ai le masaniga, e faapea: a oo ina tosina malosi faaitu-tasi le mafaufau i se isi mea, ona galo lea ona manatu ifo ia te 'oe lava. O le pese le na e faatatau i le isi tagata. A e ua faailoa mai e le fai Salamo, e i ai le isi auala. Ua le o se pese ia te 'oe lava, po o se pese foi i le isi tagata, a e o le pese fou i le Alii lou Atua. Ua le o se pese na o le leo e tasi e solo ai, a e o le pese e 'auina mai ai le leo o le faaolataga ua saunia e le Atua, o lona alofa na fusia ai le lagi ma le lalolagi ma mea uma o i ai. O lenei pese fou tatou te pepese ai faatasi ma le atulaulau i viiga o le Silisili Ese, mai le amataga o le foafoaga na peseina ai le alofa i le fausia o mea uma ia lelei. O lenei pese fou ua le o so tatou lava viiga po'o so tatou lelei, a e o le pese ia tatou iloa ai o le Atua e ona i tatou, o i tatou foi e ala mai ai faamanuiga o le lalolagi ua tatou aumau ai.

Tatalo: Agaga Paia e, pese ia i le pese fou ua e foa'i mai, o le pese e pepese ai mo le Atua, ina ia faalogo le lalolagi uma, aua o le pese o le faaolataga e pepese faatasi uma ai. **Amene.**

Mafaufauga Loloto: Afai tatou te pepese i le pese ua tatou iloa, ma tatou iloa foi le pese ua tatou pepese ai, e faapefea ona tatou faailoa atu? O a ni mea ofoofogia e mafai ona ta’ua i la tatou pepese atu?

ASO LULU, Me 23, 2018: “Faailoga o le Agaga Paia.”
Spirit signs

Tusi Faitau: Galuega 2:37-47.

Matua (f.43), *Ua o’o foi le fefe i tagata uma; ua faia foi e le ‘au aposetolo vavega ma faailoga e tele.*

Sa ou alu i la’u tu’uaga i se tasi o tau mafanafana i le Vanu o Wolfgangsee, o se vaega o le atumauga i le atunuu o Austria. O lo’u falenofo na fausia i St. Gilgen, ua si’osi’omia i atumauga mauaululuga e sili atu nai mauga i Peretania. O le mauga o Schafberg e sili lona tumutumu e 5,850 futu, ua ou manatu ou te fia a’ea. O lea mauga e pito manaia ona foliga e faatafa-tolu aga’i i luga i le vaavaai atu i ai. A e afai e taunuu i le tumutumu, ona vaavaai atu lea i le tasi itu, i le alu ifo i le tifatō o le papa, o se vaaiga e ofo ai i le vaai mamao atu, o se vaega e le’i laasia e se tasi. O iina na ou mafaufau ai ini taumafaiga se lua o lo’o faafeagai ma tagata tafafao: o nisi e taumafai malosi e ui atu i le pito, ona taumafai ifo ai lea i se taimi ‘umi, a e iai ma le loto popole; a e o nisi e taumafai lava ma le faaeteete se ia taunuu le faamoemoe e ui ina lagona le fefe.

Ina ua mavae le Penetekoso, ona amata ai lea ona faaopoopo tagata e talitonu, e le na o le tosina mai i le lauga atu, po o le a’oa’o atu faatauanau, a e ua faaopoopo i ai le molimauina o vavega sa faia e le ‘au aposetolo. Ua tatou faitau i mata’upu o lenei aso, e faapea: “Ua o’o foi le fefe i tagata uma...”, e foliga ua tupu le faagaetia o le loto; peitai, e ono i ai se isi vaega o tagata e ese mai ai. A e ua tupu se isi lagona ona o le upu, “phobos” i le gagana Eleni, ua faaliliuina i le upu, “fefe”, e faauiga foi lea upu i le: “mata’u”, o lona uiga, o se tulaga e ono sosola ‘ese ai tagata.

Tatou te malamalama, e le faapea o tagata uma e talitonu ma mulimuli i lenei faatuatuga fou ua tala’i mai. O nisi, ua avea le molimauina o vavega ua faia e le ‘au aposetolo o se faailoga faale-Atua e moni ma tonu; a e o isi foi, ua manatu o se faailoga o le natura ofoofogia faale-tagata, e tupu ai le loto fememea’i po o le loto masalosalo foi.

Ina ua mua'i avea a'u ma tagata e mulimuli ia Iesu, sa ou naunau ia ou maua se potomasani i le uiga i vavega. Ua ou manatu, o le a 'ou maua se avanoa e fetaia'i ai ma se tulaga ou te le malamalama lelei ai, a e ona o le mana o le Atua, na te faailoa mai e ala i le musumusuga i lo'u loto. E i ai ni vaaiga uiga ese sa tutupu mai, a e le'i mafai ona talitonu i ai tagata uma. O le vavega ia te a'u, e le faapea o se vavega foi lea i isi tagata.

Tatalo: Agaga Paia e, ua matou tatalo mo ni faailoga ofoofogia, e le ona o i matou, a e mo se viiga o le Atua o lo'o soifua pea ma fesoasoani mai i lo matou vaivai faalefaatuatua. Ia avea le molimauiina o vavega e fai ma faailoga e iloa ai le ofoofogia o le pogai o vavega mamana uma. **Amene.**

Mafaufauga Loloto: O le a le vavega o loo mo'omia e la outou mafutaga faale-aulotu? Pe tou te talitonu faamaoni e mafaia lea mea? Pe afai e vaaia mea ofoofogia, pe mafai ona atili tupu ai le faatuatua, po o le fefe?

ASO TOFI, Me 24, 2018: "O le vaitau o le Agaga Paia."

Spirit season

Tusi Faitau: Ioelu 2:23-32.

Matua (f.28), *Mulimuli ane, e i'u ina ou liligi ifo ai lo'u Agaga i luga i tagata uma; ona perofeta ai lea o outou atalii ma o outou afafine, e fai miti o outou toeaina, e iloa faaaliga e o outou taulelea.*

Ua o'o ina ou talitonu i le Ekalesia Penetekoso, e ui ina ou manatu e le matuā atoatoa, o le mea e tasi ua olaola mai, e faapea: E mafai ona maua e tagata uma le Agaga Paia. O le uiga masani o le 'auai faatasi, e ona faatinoina i auala eseese: o nisi e matuā iloga ona o'o i ai, a e o isi foi, e le matua iloga ona o'o i ai. E i ai pea le talitonuga, o le Atua na te saunia le ala e tusa ma lona lava finagalo, o le faapogai lea tatou te le taumafai ai e pulea e i tatou lava le o'o mai o le Agaga Paia, ia faia lona finagalo e tusa ma o tatou lagona faale-tagata. O le perofetaga a Ioelu na faatinoina i taimi faigata lava, o lo'o fefinaua'i le ola puapugatia ma le ola e i ai le faamoemoe o i luma.

Ua to'atele le 'au popoto i su'esu'ega faale-Tusi Paia, e faatatau i tausaga na toe faafoi ai le tafeaga a le nuu o Isaraelu mai le nofopologa i le tafeaga. O le taimi lea ua toe mafaufau ai tagata Iutaia i le faapogai o lo latou manatu ua liliu'ese le finagalo alofa o le Atua, ua faaalua i puapuaga e tele na a'afia ia i latou.

Ua tatou taga'i i le perofetaga e tusa ma le o'o mai o le olioli ma le faafetai, ina ua tali mai le Atua e tusa ma le loto ua salamo, ae maise o le saunia o le nuu ua folafolaina mai e tamaoaiga ma ola fiafia ai le nu'u o le Atua. Mulimuli ane, ua ta'ua lenei perofetaga i le lauga atu a Peteru, e pei ona tusia i le Galuega mataupu e 2, ua faamaonia, "*ua muai iloa e ia, ma ua fai mai foi i le toe tu mai o le Keriso*" (f.31), ua aofia uma i le feagaiga a le Atua ma lona Nu'u, e oo mai le Agaga Paia, e le faapitoa se taimi, e le faapitoa po'o alii po'o tama'ita'i, pe faapitoa na o se vaega e tasi.

O le uiga o lenei faasinoga, e le faapitoa lava le Agaga Paia, ua na o se vaega e tasi ua filifilia e fai le galuega, a e o'o mai ona po, o le taimi e faataunuu ai le faamoemoe sa i ai ia Mose, ina ua faapea ane: "*...Ou te mana'o lava ia fai ma perofeta le nuu uma o le Alii, ma ia foaiina atu e le Alii lona Agaga ia te i latou.*" (Numera 11:29b). O le perofetaga o nei auga tupulaga, ua le o naunau e ta'uta'u le lumana'i, a e naunau e folafola atu i tagata o le Alii ia ola e fai le amiotonu, ola i le faatuatua ma ia tapua'i ma le loto faamaoni i le Atua.

Tatalo: Agaga Paia e, ua matou tatalo ina ia tupu pea i o matou loto le naunau ia aveia i matou ma auala mai o perofetaga, o miti foi ma faaaliga. Foa'i mai ia i matou le loto toa e tala'i atu ai lou finagalo. **Amene.**

Mafaufauga Loloto: Pe faapefea ona faatino le perofetaga, miti ma faaaliga, e auala mai i le mafutaga faale-ekalesia? Pe afai e foliga ua taumamao le Atua, e faapefea ona e iloa ua e le lagona le faaali mai o le Atua i perofetaga?

ASO FARAILE, Me 25, 2018:

"Ua 'auina e le Agaga Paia." Spirit sending
Tusi Faitau: Ioane 20:19-23.

Matua (ff.21-22), *Ona toe fetalai atu lea o Iesu ia te i latou, "Ia outou manuia. Faapei ona auina mai o a'u e le Tamā, e faapea foi ona ou 'a'auina atu outou."* *Ua ia fetalai atu lea mea, ona mānava atu lea o ia ia te i latou ma faapea atu, "Ia outou talia le Agaga Paia."*

E i ai le pese e masani ona peseina i taimi o toluaupiga a le Sikauti, e faapea: "So'o se mea matou te o i ai. E tu'ufesili mai pea tagata/ O ai 'ea 'oe/ O fea matou te o mai ai/ Ona matou faapea atu lea/ O matou e o mai .../ A e afai latou te le faalogo mai/ Ona matou leo tetele ai lea: E amata i le leo musumus, ma aga'i lava ina leo tetele se ia o'o ina gata le malos; a e o'o ina toe fāi ifo le leo tetele, ua suia i le leo mālū: "Ua lelei, atonu e taliga tutuli."

Ou te talitonu e faapea se pese e masani ai le 'au aposetolo i le amataga, ae maise i taimi o savavali ai ia latou faigamalaga faamisionare. A o savalivali ma talatalanoa, e mafaufau ma manatunatu i le uiga o lenei faatuatuaga fou ua faavaeina, o iina na amata ai ona fotua'i mai se lagona e faatulaga se faiga e a'oa'o ai lenei faatuatuaga i o latou mafaufau. O le tusi faitau o le asō, ua amata ona fotua'i mai se manatu e tali i fesili ua tula'i mai: O ai 'ea i tatou? O fea tatou te o i ai? O le a sa tatou mea a fai? A e faapefea foi ona faatino? O le fesili, "po o ai?", e faigofie ona tali; aua o i tatou o e mulimuli ia Iesu, o Ia na faasatauroina, na maliu ma tanumia i le tuugamau, a e na toe soifua mai e faavavau.

O le fia iloa, "O fea", "O ai": Ua ta'ita'iina ai i tatou i le Poloaiga Sili: "...Ia outou o atu e fai nu'u uma lava ma so'o, ma papatiso atu ia te i latou i le suafa o le Tamā, ma le Atalii, ma le Agaga Paia; ia outou a'oa'o atu ia te i latou ia taus i mea uma ua ou fai atu ai ia te outou;...(Mataio 28:19b-20a). Mo Iesu ma le fesili, "Pe faapefea?", o lea ua uma ona faataunuaina i le Poloaiga Sili (ff.21-22). Ia outou o, e faapei ona 'auina Iesu, e faamalosi outou e le Agaga Paia, faatasi ma sauniga paia uma e faamalosi ai le fe'au ua tala'iina.

Tatalo: Agaga Paia e, ia 'auina i matou faatasi ma lou mana malos, aua ne'i tu'ua na o i matou. Faailoa mai, po o fea tonu matou te aga'i i ai ia faia nuu uma ma so'o, ma ia faateleina le

‘auai mai o Keriso i o matou loto, i upu, faapea i faatinoga uma. **Amene.**

Mafaufauga Loloto: Afai o le ‘auna ua faataau i le faaliliuina---ma o le avea ia foliga ia Keriso e liua ai nisi---o a ni foliga o lou ‘auna?, E faapefea ona faatino?

ASO TOONAI, Me 26, 2018:

“O faailoga o le Agaga Paia.” Spirit symbolism

Tusi Faitau: Faaaliga 22:1-5.

Matua (ff.1-2a), *Ona faaali mai lea e ia ia te a’u le vaitafe manino o le vai o le ola, e manino e pei o le ma’a tioata, ua tafe ifo mai le nofoalii o le Atua ma le Tama’i Mamoe. O i le moa o lona ala tele ma itu taitasi o le vaitafe le laau o le ola ...*

Ina ua aulia lo’u 20’s tausaga, o le taimi lea na ua ‘ou lagonaina ai, peiseai ua tuu lafoa’iina a’u. Mo se faata’ita’iga o lea lagona, sa ‘ou asiasi ane i se tasi o a’u uo i Lonetona. A e sa le avea lea ma ‘auala e te’a ‘ese ai le lagona faanoanoa ma le manatu o le tu’ulafoa’iina. O le mea lea, ua ma savalivali ma la’u uo i le ala, ona o le manatu atonu e suia ai so’u lagona. Ua ma savalivali faafesaga’i mo ni itula, o lo’o musumusu mai pea o’u lagona faaletonu, ua soso’o ai ma le tafe ifo o loimata. Ua ma savalivali pea ma le lagona vaivai, ua ma sopo’ia se vaitafe e matua saosaoa lona tafe, e aga’i atu i le itu e i ai le fale gaosi laupapa tele. Ona o le naunau e fia iloa le mea e agai i ai le tafe o le vai, ua ma mulimuli ai pea se ia gata la ma va’ai, peitai, ua ma tau atu i le mea e iai le paipa vai tele e pipisi maualuga i le ‘ea. A e o la ma savaliga umi i le vevela o le aso i le tau mafanafana, ua fai lea ma mea e ‘ave’esea ai le tino malosi. O le mea na soso’o ai, o le tuu ‘ese o le ‘ofu ua vevela, a e faasavili mo se ‘ea māli.

Ua vave nei ona lagona le fiafia; o le faamalosi ‘au i le vaai i le vai, o le faamalosi tino i le savali, ae maise le agaga faamalosi loto o la’u faauo, ua fai lea ma ‘auala e fesoasoani mai i o’u lagona ma mafaufauga faaletonu sa i ai. O le pipisi a’e o le suavai i le ‘ea, o se foliga lea e amata ai le toe sa’ili i se malosi’aga fou.

O le tusi faitau o lenei aso, ua ‘aumai ai le ata o le toe faafouina, o le malosi fou ma le tamaoiga e tele lava. Ua afio ifo le Atua ua ‘auai i le Ierusalem Fou, faatasi ai ma tagata o

le lalolagi fou, e pei ona molimau mai i valo'aga ua tusia i le Esekielu 47:1-12, ma Sakaria 14:8, ma e atagia ai foi le tala i le Kenese 2. Ua toe faafouina le lalolagi, ua i ai foi le Etena fou e iai le mamalu ma le paia o le Atua; e le o se malumalu, a e o le ogatotonu o le nuu o le faato'aga. E tafe mai i le nofoalii o le Atua le Tamā ma le Atalii e afio mai le: “vaitafe manino o le vai o le ola”, o le faailoga o le Agaga Paia, e faafouina ai le malosi o le ola i le nuu e faavavau o le Atua.

Tatalo: *“Aua e te lafoa'iina a'u i ou luma; aua foi e te ave'eseina lou Agaga Paia ia te a'u. Ia e faafo'isia mai ia te a'u le olioli o le olataga mai ia te 'oe; ia e taofimauiina foi o a'u ma le loto fiafia.”* (Salamo 51:11-12). **Amene.**

Mafaufauga Loloto: O le vai i le Tusi Faitau, o le faailoga o le Agaga Paia. O le a le uiga o lenei molimau ia te 'oe? O le a foi se faamoemoe e tuuina atu ai mo nisi?

Faitau i le Mareko (2)1: I totonu o le ala.

Reading in Mark (2): 1 On the road
(Apoapoaiga ua saunia: Michiko Ete-Limā.)

ASO SA, Me 27, 2018: “O le oti ma le ola fou.”

Death and new life

Tusi Faitau: Mareko 6:14-29.

Matua (f.14), *Ua faalogo ai le tupu o Herota, aua ua ta'ua le suafa o Iesu. Ua fai ane nisi, “Ua tula'i Ioane le papatiso nai e ua oti, o le mea lea ua fai ai e ia o vavega.”*

O ai 'ea Iesu ia te 'oe? O le vaiaso lenei ua valaauina ai 'oe se'i e mafaufau i lenei fesili, e faapea foi i le to'atele, a o tatou faitau ma manatunatu i le Tala Lelei e pei ona faatulaga i lenei tausaga---o le Tala Lelei na tusia e Mareko. O le tusi faitau o le aso lenei, ua 'aumaia ai e Mareko le ata o mafaufauga o Herota, ina ua faalogo i faamatalaga a tagata po'o ai Iesu.

Ma o le faamatalaga e pito taua i le faalogo a Herota, e faapea, o Iesu o le faatusa ua toe soifua mai o Ioane le Papatiso. O lenei la faamatalaga, ua toe fa'afoi ai mafaufau o Herota e uiga i le mea sa tupu, lea na ia poloa'ina ai le vavae'eseina o le ulu o Ioane le Papatiso. Ua lilivau le loto o Herota ina ua toe fafagu mai le tulaga sa oo ia Ioane le Papatiso, o se tulaga e le

ono tupu pe ana fai a e talia e Herota o ai Iesu Keriso ma lona afio mai. Ua manatu ma mafaufau Herota, afai na te talia Iesu e afio mai i lona fale, o lona uiga, o le aumaia lea o se ola fou ia te ia, ma o se faamoemoega lelei lea mo lona olaga lumana'i, a e faagalo ai ona sese i taimi ua mavae. O le fesili: E faapefea ona e faatinoina se olaga fou, ina ua e faitau i le evagelia a Mareko i lenei vaiaso, ina ua e faagalo i ou sese o taimi ua mavae?

Tatalo: Le Alii e, ia e faapupula i o matou mata, ina ia matou iloa lou afio mai, e tusa ma le togiola na saunia mo le lalolagi agasala---na e foa'i mai e faaolaina le lalolagi, ma ua e faatamāoigaina i matou i mea lelei uma lava. **Amene.**

ASO GAFUA, Me 28, 2018:

“O tagata-a-malo e le'i fuafuaina.”

Unexpected guests

Tusi Faitau: Mareko 6:30-44.

Matua (f.41), *Ua tago o ia i areto e lima ma i'a e lua lau, ona tepa a'e lea i le lagi, ua faafetai; ona tofitofi lea i areto, ma avatu i ona soo, latou te laulau atu ai ia te i latou; ma i'a foi e lua lau ua na tufatufa atu ai ia te i latou uma.*

So'o se faatasiga iloga lava i le atunuu o Samoa, e tatau ona saunia se ta'umafataga lelei. O le saunia ma le tapenaga o ta'umafataga lelei, o iina e iloa ai foliga o e na saunia i le agaga o le foa'i ma le maopoopo lona fuafuaina. Afai a e fesili se tasi po o le a le uiga o lea faatasiga ua fuafuaina, e ta'u mai i lea fesili le fia iloa po'o a ituaiga o ta'umafa e ona maua ai. A e le gata i lea, e mafaufau foi, pe faamata e lava ni mea ua saunia mo tagata uma. O le faataunuaina la o so'o se faatasiga tele, e faalagolago i le lelei ma le lava o ta'umafa ua saunia!

Ua faaalii i lenei faamatalaga, tatou te iloa ai o Iesu ma ona so'o, o i latou lava na saunia ma tapenaina le faatasiga, e faaopoopo i lea tulaga, peiseai sa popole le 'au so'o ina ua faaopoopo mai le aofai o e ua 'auai mai. Mo le 'au so'o, ua o'o ina faaletonu o latou manatu, aua e le lava mea ua saunia mo i latou ua auai.

E tali tutusa lava lenei tulaga ma le 'au aiga ua sauniuni mo le faiga'ai o le faaipoipoga, a e vaavaai atu i le fuainumera o e na

valaauina, ua faapoopoo mai ai ma isi e le'i valaauina. Ua tupu le popole! O le a faapefea nei ona faatulaga ia lava mo i latou uma? O le tulaga popole ua aliali mai i le au so'o, e foliga e le malamalama po o le a se fesoasoani e auala mai ia Iesu.

Ua le o iloa e le 'au so'o, e faia e Iesu le vavega e fafagaina ai le motu o tagata e to'atele i nai mea'ai faatauva'a ua maua. Ma o le faatinoina lenei o le iloa ma le malamalama atoatoa e uiga ia Iesu, o Ia lava na te saunia le tamaoaiga e faamalieina ai o tatou loto popole ma le atuatuva'e.

Tatalo: Le Alii e, ia 'aua ne'i o matou vaavaai i mea ua le'o'o i ai lo matou malosi, a ia matou vaavaai ma le loto mautinoa i mea ua e foa'i mai mo i matou. **Amene.**

Mafaufauga Loloto: O a tu masani po'o aganuu i lou atunuu, e faatino ai le agalelei ma le alofa? E i ai se ese'esega po'o le tutusa foi ma aganuu o loo faia i la outou aulotu?

ASO LUA, Me 29, 2018:

“O mea'ai mo e ua matata'u.”

Food for the fearful

Tusi Faitau: Salamo 111.

Matua (ff.4-5), *Ua fai ma faamanatuga ona vavega; o loo alofa fua mai ma alofa mutimuti vale mai le Alii. Ua foaiina mai e ia le mea e 'ai i e matata'u ia te ia; e manatua e ia lana feagaiga e faavavau.*

Ou te fiafia e matamata i ata tifaga, a e ou te faalagolago i e ua masani i ata e ta'u mai ia te a'u ata lelei ou te filifili i ai. O tagata ia ua masani i ata tifaga, o i latou na e filifili ma faamatala vaega taua ma ta'uta'u atu i tagata ina ia tosina ai le fia vaavaai i ai.

O le Salamo ua fai nei ma tusi faitau---ua faatusa i e popoto i ata tifaga---ua atagia ai le galuega na faia e Iesu, e faapei ona tusia e le 'au faievagelia o le Feagaiga Fou. Ua faamatala ma ua faaalii ai galuega ofoofogia sa faia e Iesu a e le'i afio i le lagi.

Ua ta'u'a i le fuaiupu e 5 o le tusi faitau, Ua foaiina mai e ia le mea e 'ai i e matata'u ia te ia;... E le gata i lea, i le fuaiupu e 4, faamanatuga ona vavega, ma le fuaiupu e 6, Ua faaali atu le mana o ana galuega i lona nuu.... Ua faatusa nei molimau i le

galuega na faia e Iesu. A tu'u aofa'i ia mea uma i le molimau ua tusia i le fuaiupu e 9, ua faapea mai: Na ia avatu le togioala mo lona nuu...

Ua molimauina i le Salamo 111, le faatinoina o galuega tetele ma le ofoofogia ua saunia e lo tatou Alii. Ua faaalai ai foi iina le taua ma le ofoofogia o le alofa o le Atua, e faapei ona saunia e ala ia Iesu Keriso, mo le lavea'iina o le lalolagi agasala.

Tatalo: Le Alii e, faafetai i lou auina mai o lou Alo Pele o Iesu Keriso, o lona alofa silisili ese e le faatua'oaia, ua faamagaloina ai agasala a le lalolagi uma. **Amene.**

Mafaufauga Loloto: O le a sou manatu e uiga i lenei molimau? *“O le mata'u i le Alii, o le amataga lea o le pota..”*(f.10).

ASO LULU, Me 30, 2018: “Mafaufau ma Faatino.”
Reflection and action

Tusi Faitau: Mareko 6:45-56.

Matua (ff.45-46), *Ona u'una'i loa lea o ia i ona so'o ina ia latou o a'e i le va'a, ma muamua atu i le tasi itu i Petesaita, ina seia tu'uina atu e ia le motu o tagata ia o. Ua fa'amavae o ia ia te i latou, ona maliu atu lea o ia i le mauga e tatalo.*

O se masaniga ou te fiafia i ai pe a ou ala mai i le taeao lava, e fia maua se avanoa to'a malie ou te mafaufau ai i le Alii le Atua. Ou te faitau i afioga paia a le Alii, ma ou tatalo faafetai ona o le manuia ua foa'i mai i le aso fou, ou te tatalo foi ia faafouina le malosi e saunia ai pea mo fe'au o le aso ua 'aumai. O le taimi ou te tatalo ai e faafouina ai lo'u malosi, e faatinoina ai fe'au ma tiute fuafuaina o le aso atoa.

O le tusi faitau o lenei aso, ua iloa ai e tu'umuli 'ese Iesu e tatalo i ona taimi faapitoa. Ua mae'a ona ta'umamafa le motu o tagata, ona fetalai atu lea o Iesu i ona so'o ia o, a e se'i tu'ua na o ia e tatalo. Ina ua mae'a lana tatalo, ona savali ai lea o Iesu i le vai ma faamalolo i e mama'i. O ia galuega ma ona faatinoga, e mana'omia le malosi o le tino faapea ma le agaga. O se tulaga tatou te faagaetia ai, o Iesu e faaavanoa ona taimi

faapitoa e tatalo ai. Ua silafia e Iesu e i ai le malosi e auala mai i le tatalo, o lea malosi e mafai ai ona faataunuu se mana’oga ma molimauina ai vavega ofoofogia. Ina ua ou faitauina lenei tusi faitau, ua a’oa’o mai ai ia te a’u le taua tele o le tatalo. A fai ua mana’omia e le Atalii o le Atua sona taimi faapitoa e tatalo ai, a e faapefea i tatou ma o tatou mana’oga e ole atu ai pea i le Atua?

Tatalo: Le Atua alofa e, ia e faataunuina i o matou loto le talitonu moni, o lou malosi lilo e mafuta faatasi mai i taimi o a matou talosaga, matou te mafaia ai mea uma matou ole atu ai e ala ia matou talosaga. **Amene.**

Mafaufauga Loloto: O le a le aofa’i o ou taimi faapitoa e te tatalo ai i lou Atua, ina ua mae’a au galuega fuafuaina o aso ta’itasi, i le taeao ma le afiafi?

ASO TOFI, Me 31, 2018:

“O le auala e tatalaina ai le loto.”

Open heart procedure

Tusi Faitau: Mareko 7:1-23.

Matua (ff.18-19), [Iesu] *Ona fetalai atu lea o ia ia te i latou, “E faapea foi ‘ea outou ona valelea? Tou te le iloa ‘ea, o mea i fafo uma e alu ane i totonu o le tagata e le mafai ona leaga ai o ia? Aua e le oo ia mea i lona loto, a o le manava; e oo ane foi i fafo i le maliuga.” O lea ua ta’u mamāina ai e ia o mea e ‘ai uma.*

O le tele o tu ma aganuu i le lalolagi, e masani ona avane se tanoa vai e faamamaina ai lima a e le’i alo atu i le ta’umafataga. O ia faatinoga e faia mo le soifua maloloina, ma e faigofie ona faatusaina lea aganuu i le amataga o le tusi faitau i lenei aso. O le aganuu lea faa-Iutaia e pei ona tusia i le tala, e vaaia foi i le tele o atunuu i le lalolagi.

O se tulaga e mata’ina i le tusi faitau o lenei aso, o le auala na aumaia ai e Iesu, e peiseai o agavaa e tatau mo le tagata ua ta’umafa. Ua manino i le fetalaiga a Iesu, e lelei uma mea’ai ta’umafa (f.19). Ua faaauau pea le a’oa’oga a Iesu, ua ia faapea mai: ua le o mea’ai tatou te aai ai na te faaleagaina le tagata, a e o upu tatou te tautala atu ai. O le pogai lea o se tasi

muagagana, e faapea: “E iloa i tatou i mea’ai e aai ai”, a e tatau ona faapea: “E iloa i tatou i upu tatou te tautala atu ai.” Ua faauigaina foi lenei lava faamatalaga i le faafeagai o upu e tautala atu ai, ma manatu o lo’o i totonu o le loto.

O le mea lea, a tatou tautala i upu o le lotovale, ita ma le faatu’iese, o iina e atagia ai manatu ma mafauauga o loo i le loto. A e a tatou tautala i upu o le ola, lelei ma le agaalofo, o iina foi e avatu ai lagona o loo i le loto. Ma, o lenei tusi faitau mai le Tusi Paia, ua faaalua ai le taua tele o upu tatou te tautala atu ai i tagata. Aua o upu tatou te tautala atu ai, o le faailoa atu foi lea o manatu ma lagona o loo i totonu o tatou loto.

Tatalo: Le Alii e, ia e faafouina o matou loto ma mafauauga o aso ta’itasi, ia faaalua ia matou upu lou finagalo alofa ma le agalelei. Ia avea foi a matou upu e fai ma faailoga o le alofa faamaoni i o matou loto. **Amene.**

Mafauauga Loloto: I le Tusi Paia a Eperu, ua le ta’ua ai le upu, “mafauau (mind)”, a ua tele ina faaaoga le upu “loto (heart)” e suia ai

Aso Faraile- Iuni 01, 2018. “O le lē fo’i o le fafine ese.”

Bold outsider.

Tusi Faitau: Mareko- 7: 24-37.

Matua- (ff:28-30). *Ona tali mai lea o ia iā te ia, ua fa’apea mai, “Le Alii e, moni a oe, a e ui i lea o uli i lalo o le la’oai e aai i latou i momoi mea a tama.” Ona fetalai atu ai lea o ia iā te ia, “Inā alu ia ona o lau upu lenā, ua te’a le temoni sa i totonu o lau tama teine.” Ona alu atu lea o ia i lona fale, ua maua ai lana tama teine o ta’oto i luga o le moega, a ua te’a le temoni.*

O le tala i le fafine Suria Foinie, na amanaia lelei ai e Iesu le fa’atuatua o le fafine, ma fa’asa’olotoina ai lana tama teine sa i ai totonu agaga leaga po’o temoni. Ua manino mai ai, o Iesu e sili atu lona malosi nai lo’o se isi lava malosi’aga fa’ataulaitu na te noanoatia i lalo se tagata. O ia malosi’aga e o mai iā i tatou i foliga eseese. O nisi o le tu’inanau i ‘ava o’ona, a o isi o le lē ma’ona i fuālaau fa’asaina. A e i ai lava fo’i i latou o lo’o i ai pea le malosi’aga o le lē fa’amalieina i meaai ma vai-inu.

Ua fa'amanatu mai e le tala i le fafine lea iā i tatou, po'o le ā lava le paoa o se malosi'aga i o tatou olaga, o lo tatou fa'atuatua iā Iesu Keriso ma lo tatou taliaina moni o mea na te faia, o le ā tatalaina ai i tatou mai so'o se malosi'aga o taofia ai. E matuā mana'omia le tataua ona i ai lo tatou fa'atuatua fa'apei o le fafine Suria Foinie, e mafai ai ona tatou fa'ato'ilaloina so'o se fili ma so'o se malosi na te taofia i tua o tatou olaga.

Na matuā ioeina e le fafine Suria Foinie, faatasi ma le uo a le tagata tutuli ma leo o'olo, o Iesu lava na fa'atinoina vavega o le olataga e ala i o latou tagata. E fa'aloge Iesu, ona ia a'apa atu lea ma fa'amalōlō i tagata. O le ā se suiga tele na tupu i lo latou tumau i lo latou fa'atuatua?

Tatalo: Le Atua alofa e, aumaia mo i matou le fa'atuatua atu iā te Oe, ina ia mafai ai ona matou fa'ato'ilaloina mea faigatā, ma tumau ai lo matou malosi i o matou olaga, ma ia fa'amalōlōina ai i matou mai ma'i uma. Ia vi'ia ai lou suafa Iesu Keriso, **Amene.**

Mafaufauga Loloto: O le lē fo'i o le lototele o le fafine Suria Foinie, ma le tali i ai a Iesu? O le ā sou taofi pe afai o le mana'o lea o Iesu mo la tatou mafutaga ma Ia.?

Aso To'onai- Iuni 02, 2018. “Va'ai fa'alua” Second sight.

Tusi Faitau- Mareko- 8: 22-26.

Matua- (f: 25). *“Ona toe fa'ae'e atu lea e ia o ona aao i ona mata, ua pupula o ia, ona toe lelei lea o ia, ua na iloa lelei foi o mea.”*

E pei o se tagata ua leva ona tauaso, e faigofie ona ou fa'afeso'ota'iina i le faitauga lea. O le tamāloa na tauaso na fa'amalōlō e Iesu, a o lana tali iā Iesu ina ua fesili Iesu po ua ia iloaina ni mea e fa'apea, *“ua ou iloa atu tagata ua fa'apei o laau ua savavali.”*(f: 24). Ua mafai ona ou iloa atu tagata i sina mamao, peita'i o ō latou foliga o lo'o nenefu pea. E masani ona ou tā-aloalo mo se fesoasoani i so'o se tagata, ma le mafaufau o se isi tagata ese. O nei, ua ou taumafai ina ia ou 'alo ese mai le tā-aloalo i tagata, pe a lē faia lau mata-tioata. Ina ua faitau i le faitauga lenēi, na ou iloa ai na ave e Iesu le tauaso i tua o le aai ma fa'amalōlō ai. Ina ua malōlō o ia, ona

fetalai lea i ai o Iesu, ina ia alu sa'o i lona aiga, aua ne'i fa'ailoa atu i le nu'u. Masalo e le i finagalo lava le Alii ia i ai nisi e matamata ma maimoa, i le vavega fa'apitoa lea.

Ou te fia iloa, afai e fa'aalu aoga o tatou taimi fa'atasi na o Iesu lava, fa'amata o le ā lelei ma toe pupula ai o tatou mata fa'ale-agaga? Pe afai o le ā matuā fa'amaoni ona fa'a-avanoa o tatou taimi e mafuta ai ma Iesu, e lē taumate o ā tatou mata o le ā sa'o ma lelei ona fa'apupulaina, ma o le ā tatou manino lelei i vavega ma fa'amanuiaga o lo'o faia ma saunia e Iesu i o tatou olaga.

Tatalo: Le Alii alofa e, fesoasoani ina ia manino la matou va'ai. Fa'apupula o matou mata ina matou iloa le matagofie o vavega o lo o e faia mo le tagata. **Amene.**

Mafaufauga Loloto: O le ā se mea o tapunia ou mata fa'ale-agaga i le taimi nei? E mafai ona e fesili atu mo se fa'amalōlōga ina ia manino ai lau va'ai?

I LUGA O LE MAUGA PAIA.

2. Faitauga i le Tusi o Mareko.

(Saunia: Paul Faller).

(Fa'aliliuina mai le: NIVUK).

Aso Sa- Iuni 03, 2018. “Ua amataina le malaga.”

(Starting the journey).

Tusi Faitau- Mareko- 8: 27- 9: 1.

Matua- (ff:34- 35). *“Ona vala'au atu lea o ia i le motu o tagata, atoa ma ona so'o, ua fetalai atu iā te i latou, “Ai se fia mulimuli mai iā te a'u, ia fa'afiti o ia iā te ia, ma ave e ia lona satauro, i le mulimuli mai ai iā te a'u. Auā ai se fia fa'asaogālemuina lona ola, e maumau ai iā te ia, a o le fa'amaumau lona ola ona o a'u ma le talalelei, e fa'asaoina e ia.”*

O ai Iesu le Nasareta? O le fesili lea o le a va'aia pea i lenei faitauga ma lenei vaiaso atoa i le tusi o Mareko. Po o le ā lava le ta'u ma manatu ua ta'atele ua lauiloa ai Iesu, o le a lē afāina. A o le taimi lenei i lona olaga, na amata maitauina ai e tagata ana fetalai lu'itau i tagata ma ana galuega. Ua matuā tafafā tutusa lelei le fa'ataotoina e Iesu o le fesili i ona so'o.

“A o outou na, se ā la outou upu iā te a’u nei, po o ai?” (f: 29).

E matuā manino mai i le fesili a Iesu, e i ai le ‘ese’ese ga i le va o le iloaina o se tagata, ma le iloaina fa’ataatau i se tagata. Fa’ata’ita’iga: E mafai ona ou faitauina le tala’aga o Matini Luteru ma tali le aofai o ni fesili o mea moni e fa’ataatau iā te ia. Peitai, e lē mafai ona ou fa’apea ifo ai ua ou iloaina o ia ona o le tala. Ou te mana’omia lo’u savali ma te talanoa ma ia. Mo oe ma a’u i lenei aso, o le fesili ua tu’uina mai e Iesu, o lo’o atagia ai se malaga, o se feiloa’iga ma ia atoa ma se mafutaga lilo i totonu ma lona Agaga. Fa’amata o le ā le natura o lea faigamalaga o le a i ai?

Ina ua uma ona vavao e Peteru iā Iesu e lē oti o ia, ma vavao atu fo’i e Iesu iā Peteru, e lē o mea a le Atua e loto i ai a o mea a tagata. Ona fa’ataoto loa lea e Iesu le ala, ma fa’atonu atu iā i latou uma na fa’alogologo, le uiga moni o le Mesia, Keriso, po o lē ua fa’au’uina. I lana tali atu iā Peteru, na ta’u ai e Iesu o ia o le “Atalii o le Tagata,” e fa’ailoa ai, o le malaga e lē na’o mo Iesu. Peita’i, e mo so’o se tagata ma tagata ola uma e naunau ia avea ma vaega o le tino o Keriso. Taua e Chet Myers, o le ‘Tagata Ola,’ (in *binding the Strong Man: A Political Reading of Mark’s Story of Jesus*, Orbis Books).

Tatalo: Le Atua alofa e, o le uo ma le uso, e mafai ea ona matou iloa manino lau Afio? Matou te alolofa tele mo Oe mai le ta’ele o matou agaga, ma mulimuli latalata atu iā te Oe i lea aso ma lea aso. **Amene.**

Aso Gafua- Iuni 04, 2018. “Fa’amalosi’au i le ala.”

(Encouragement on the way).

Tusi Faitau- Mareko-9: 2- 13.

Matua- (f: 3-5). *“Ua pupula ona ofu, ua matuā pa’epa’e lava, e leai fo’i se tagata tā ofu i le lalolagi, na te mafaia ona fa’asinasina fa’apenā. Ua fa’aali mai fo’i iā te i latou o Elia ma Mose, ua fetautalatalaa’i i latou ma Iesu. Ona fai mai lea o Peteru iā Iesu, “Rapi e, ona ua tatou i’inei, se’i matou faia fo’i ni fale-apitaga se tolu, o le tasi mo oe, o le tasi mo Mose, o le tasi mo Elia.”*

E fa’ataatau i le ā luga o le mauga? O le nofoaga o le mautū, e mamao mai le pisi o se maketi, le nofoaga o lo’o fa’alautele ai

i tua atu feso'ota'iga o aso uma, ma le tele o va'aiga tetele o le fiafia ma le olioli. O le a'oa'oina atili i ala o Iesu, e foliga maualalo ma lē mana'omia, e uma e pei ona iai i foliga va'aia uma lava i le satauro. A o le mea mautinoa, e mo Peteru, Iakopo ma Ioane ma isi so'o. Afai o le i'uga o le satauro, o ai e mana'o e mulimuli iā Iesu? O le mea ea o le muta'aga moni lea o le auala? Ae ina ua uma le fa'aaliga i le ala o le koluse, na lagonaina ai e so'o filifilia e to'atolu le fa'aaliga ma lona fa'aatoatoaina.

Ae fa'apefea le to'alua iloga ia na talanoa ma Iesu? O Iesu, o le fa'aatoatoaina lea o le fa'aaliga o le Atua na amata mai le foafoaina o le lalolagi. O Mose, o lē na aumaia tulafono (Torah), ma Elia o le perofeta (Nebi'im) na lu'iina tagata ia fa'atuatua i le tulafono ma Iesu. O le poto o le Atua (Kethubim), na fa'aalia mai ai le i'uga sa'o o le fa'atinoina o le tulafono, o lo'o ta aofa'i ai le Tusi Paia atoa. (Tanak). O le leo mai le ao, o le auala o le vi'iga o le Atua, ua fa'amautinoa ai upu na fetalai muamua ai Iesu, e fa'atatau i le ala o le ā ia savali ai.

O le ā le lagona o Iesu iā te ia lava i'inei? Ae o le ā so tatou lagona o le a iai i taimi e filifilia ai tatou? O Ia na matuā ta'ele i le malamalama e lē mafai ona te'a 'ese, ma liua ai lona tagata atoa, a'o aveina a'e i le fa'aatoatoaina o le malo o le Atua. E mo ia lava, o le fa'amalosi 'au. Ua toe auina atu o ia i lana misiona ina ua ma'ea lona liutino tagata mai, e pei ona i ai i le lagonaina e Mose (Esoto: 33:18), ma Elia (1 Tupu: 19:11).

Tatalo: Fa'afetai mo le Atali'i o le tagata ua liutino tagata, ina ia avea ai i tatou ma fanau a le Atua. **Amene**

Mafaufauga Loloto: O Iesu na fa'aalia mai ai le Atua, o le ā la le uiga o le avea ma tagata atoatoa?

Aso Lua- Iuni 05, 2018. **“Pe ā e tausuai.”**
(Causing to stumble).

Tusi Faitau- Mareko- 9: 42-50.

Matua- (f: 43). *“A fa'atausuiina foi oe e lou lima, inā tutū 'ese ia, e lelei ona e sao i le ola a ua e lima mutu, a e leaga ona lima lua, a e alu i Kēna, i le afi e lē mafai ona tineia.*

I Aferika, afai e mana'o se tagata tulimanu e pu'e se manuki,

ona ia ave lea o se siā (jar) e i ai se avanoa e telē atu i lo’o le lima o le manuki, ua i ai foi ma ni nai mea’ai i totonu e fa’atosina ane ai le manuki. E tu’u atu e le manuki lona lima i totonu o le siā ma aofa’i ai mea’ai e fa’aaogāina ai ona matiu’u. O le mea e tupu, e lē mafai e le manuki ona toe ave i fafo lona lima, se’i vaganā ua toe fa’amamulu ma fa’apau’u mea’ai i totonu o le siā. O le gutu o le siā, e la’iitiiti lona lautele, pe ana fai e telē, semanu e mafai e le manuki ona fa’apau’u mea’ai ma faigofie ai ona toe ave i fafo lona lima, peita’i, e lē mafai. E ui lava ina i ai lona lava mana’oga malosi e mafai ai ona sola ‘ese, ua lē mafai lava. Auā ua taofia lona lima o lo’o tumu i mea’ai, se’ia o’o ina lafo atu e le tagata tulimanu le upega i ona luga ma pu’eina ai o ia.

Ua leva ona malamalama a’oa’oga a Iesu i fa’ata’oto fa’apenei i tausaga e tele ua tuana’i, e una’ia ai aiga uma i le mea sa’o, a fia maua le ola, e tatau ona tatou sauni e feoti mo nisi mea. E na o i latou ua sauni e tu’ua mea uma ua iā te’i latou, e mafai ona fa’aolaina mai le va’a pe ā goto. So’o se mea lava e fa’asalāvei mai le ala tatou te ulu atu ai i le malō o le Atua, e tatau ona lafoa’i ‘ese. O lima e fai ai feau, e tatau ona tatou tipi’esea so’o se gaioiga e fa’aitiitia ai le aoao o le pule a le Atua. O vae e savavali ai, e tatau ona tatou savavali i le ala o lo’o ta’ita’iina ai i tatou e le Agaga, a e lē o le savali i totonu o mailei fa’apei o le manuki. O mata e va’ai ai, peita’i, e lē tatau ona tosina ma tu’inanau atu i le fa’atamala o le sa’olotoga o ē valea.

Tatalo: Iesu e, e leai sou tino matou te iloa atu, a o oe lava o mata na va’ai ai le lalolagi, o vae na toe savavali ai, ma lima na fa’amanuiaina ai i matou uma. **Amene.**

Mafaufauga Loloto: Pe ā o’o ina ogaoga ma pa’i tumutumu le atuatuvaile, e fa’aaoga so’o e Iesu le gagana mao tua ma le loloto. Fa’amata o fesili moni mai iā i tatou ina ia fa’amanu’aina ai o tatou loto?

Aso Lulu- Iuni 06, 2018.

“O le ala e malaga ai tamaiti.”

(The way children travel).

Tusi Faitau- Mareko- 10: 13-16.

Matua- (f: 15-16). “*E moni, ou te fai atu iā te outou, Ai se lē talia le malō o le Atua fa’apei o se tamaitiiti, e lē sao lava ia i ai. Ona si’itia lea e ia o i latou i ona lima, ua fa’ae’e foi ona aao i luga iā te i latou, ma fa’amanuia iā te i latou.*”

Na aumai e Iesu i latou aupito maualalo o tagata maualalo uma, o tamaiti. Na ia aumaia i le totonugālemu o le fa’apopotoga, ma lavea’ina mai i latou i le fa’asinoinomia. Na ia fusi iā i latou, fa’ailoa i ai lona a’afia fa’atasi ma i latou, na fa’ae’e atu ona aao i luga iā i latou, avatu iā i latou so latou tulaga amanaia, ma fa’amanuia iā i latou, ma fa’afiafiaina ai i latou e ui lava i o latou tulaga. E lua lava mafua’aga na faia ai e Iesu le gaioiga lea. Muamua: O le isi lea fa’ata’ita’iga o fa’ata’oto a Iesu e foliga e fete’ena’i ma mafaufau o tagata, ae o loo aumai ai le feau sa’o. O le tagata e fia muamua, ia mulimuli, a o le tagata mulimuli ia fai ma muamua. Ua fa’amautinoa e Iesu, a lē liua outou fa’apei o tamaiti, e lē fai mo outou le malō o le Atua. Lua: e pei ona fa’amalamalama e St. John of the Cross, ‘o le agaga e pei o se afifi e le’i tatalaina, ma e na o le Atua na te silafiaina le mea na ia tu’uina i totonu.’

I taimi o le avea ma tamaitiiti, na toetoe lava a fa’aalia mai le mea o lo’o i totonu o le afifi, peita’i, ina ua avea ma tagata matutua, o le afifi e le’i tatalaina, ua lilofia e le tele o isi mau mea ua afifi ai ma nonoa mau ai. O le tele o mea ua afifi ai le agaga o le tagata matua, ua na o lona lava saogalemu, peita’i, o le atoatoa ma le fa’amaoni pei ona olaina e tamaiti e tatau ona latou iloaina. O le ala lea o le fetalai o Iesu, “*E moni ou te fai atu iā te outou, Ai sē le talia le malō o le Atua fa’apei o se tamaitiiti, e lē sao lava ia i ai.*”

O le mea lea o lo’o fa’auau ai pea le manatu autu o ā tatou faitauga. O ā mea e tatau ona tatou fa’agalo pe afai tatou te fia ulufale atu i le malō o le Atua, i le fa’ata’ita’iga lea, o le olaga masani o le tagata matua. I le isi fo’i itu, ua mana’omia le toe fafagu o le atoatoa o mea patino i le soifuaga fa’a-tamaitiiti. O tamaiti e tatala atu mafaufau e mamā, o mea pu’e ata e leai se mea e misi, e matagofie ma tumu i mo’omo’oga o le olaga. Ae i le loloto o mea uma, ona o le tulaga o lo’o fuaina ai i latou i le olaga faitele, o lo latou iloa ma le malamalama o mea uma latou te maua ua na o ni meaalofa, e aunoa ma lo latou sailiili loloto i ai i o latou mafaufau.

Tatalo: Ou te vivii atu iā te oe Tamā, le Atua o le lagi ma le lalolagi. Auā ua e natia ia mea i e popoto ma a’oa’oina, a ua e fa’aalia mai i tamaiti. **Amene.**

Mafaufauga Loloto: O ā ni gaiōiga o tatou faia i o tatou aiga ma aulotu e puipuia mai ai tamaiti a o malaga atu iā Iesu? A o ā ni amio ma ni uiga o i totonu iā i tatou, e puipui ai i tatou ina ia tatou ulufale atu i le malō o le Atua.?

Aso Tofi- Iuni 07, 2018. “O le tau o le faigāmalaga.”

(The cost of the journey).

Tusi Faitau- Mareko- 10: 17-30.

Matua- (f: 21). *“Ua silasila atu Iesu iā te ia, ua alofa atu iā te ia, ua fetalai atu foi iā te ia, “E tasi le mea e lē o iā te oe. Inā alu ia, fa’atau atu au mea uma, ma avatu i e ua matitiva, ona e maua lea o le oa i le lagi, i le e sau ai, ma mulimuli mai iā te ‘au.”*

I le faitauga o ananafi, na faamamafa ai e Iesu le mana’o ina ia maua ma talia le malō o le Atua fa’apei o se tamaitiiti. Ia maua le mafaufau tatala atu mai le lagona e mamā, ia a’oa’oina ma maua le loto maulalo e fa’alagolago atu ai i se tasi. O lea va’aiga, e foliga faigofie ma fa’amafanafana loto, peita’i, e foliga sa’o i le maitau, ae o lo’o i ai sina fete’ena’iga i’inei. O le taumafai ia maua le malō o le Atua fa’apei o se tamaitiiti, e mana’omia ai se taumafaiga malosi ia avefa ma tamaitiiti pe fa’apei o se tamaitiiti. Ae peita’i, ua fa’amautinoa e Iesu iā i latou, e mafaia mea uma i le Atua. Ua tatou toe maua fo’i i’inei, le mafua’aga lelei e lē tataui ai ona fa’amoemoe se tasi i sona tulaga ma sona malosi fa’alē-tagata, e pei ona faia e le taule’ale’a mauoa, peita’i ia foa’i atu mea ua maua i le malaga, ma ia maua le avanoa mo mea sili atu ona aogā e fa’avavau mo le tagata.

O le mana’omia o le taumafai malosi, auā ua uma ona i ai le tau i e va’ai i ai i le lumana’i e pei ona folafola mai e Iesu. O le tu’uina atu o le agaga o le tagata e talitonu atoa ai i le Atua, o le ā ia maua ai sautuaselau i lona olaga ma o’o atu ai i le ola e fa’avavau. O ai la? E loloto le fesili lea, auā o lo’o fa’alaua’itele mai le mana’oga mo tagata uma. O le taule’ale’a mauoa, na fa’alaei’au i ai Iesu ina ia foa’i atu lona tamāoiga

mo e matitiva, i se isi fa'aupuga, ia teu au oa i le faletupe a le Atua, ona maua ai lea o le oa i le lagi i tala atu o ā tatou miti. E i ai le isi itu o le tamāoaiga, pe na maua i ala mamā pe leai. A o lana tali i le taule'ale'a mauoa, na fa'amuamua ai e Iesu le faia o le amiotonu na i lo'o le manatu fa'apito. A'oa'oina le mana'omia ona tufātufa atu ana oa i le sosaiete atoa o tagata ia tutusa uma ai, ae lē o le tumau ma nofo ai lava i le itu a le tulafono fai mai e “tausi le tulafono,” i le va'ai fa'apisinisi a le tagata lava ia iā te ia. Na fa'asa'o e Iesu i le taimi lea le manatu lea e fua i fa'amanuiaga pe ā tausi le finagalo o le Atua. O se a'oa'oga o lo'o manino mai ai, o le oa ma le tamāoaiga, o fa'amanuiaga mai le Atua, a o le mativa o le malaia. O se mea ua matuā salalau i le tele o atunu'u i le va o le 'au tu'inanau lē mao'ona ma le faigofie ona fa'avaleaina.

Tatalo: Le Atua e, se'i vaganā ua matou foa'i atu mo e ua matitiva, ona nanea lea o se mea matou te foa'i atu mo lau Afio, auā o lo o e silafia mana'oga o i latou, ma ua e mana'omia fo'i i matou ina ia matou foa'i atu mo i latou. **Amene.**

Mafaufauga Loloto: O le i ai i le malō o le Atua, o lona uiga, ia avea oe ma atali'i o le Atua. A o le avea ma atali'i o le Atua, e fai ai le malō o le Atua mo oe.

Aso Faraile- Iuni 08, 2018.

“O le lalolagi ua fa'au i luga ma lalo.”

Turning the world upside down

Tusi Faitau- Mareko- 10: 31- 45.

Matua- (ff: 43- 45). “..a e le fa'apea outou, a o se fia sili iā te outou, ia fai o ia ma a outou auauna, o se fia muamua foi iā te outou, ia fai o ia ma tautua a outou uma. Auā fo'i o le atali'i o le tagata na lē sau o ia ina ia auauna tagata iā te ia, a e peita'i ia auauna o ia, ma foa'iina atu lona ola, o le togiola mo tagata e to'atele.”

O Iesu ma i latou o lo'o mulimuli iā te ia, o lo'o i ai i le ala aga'i atu i Ierusalemā, le nofoaga o le filemū o le Atua. O le ala ua tumu i mea faigatā e o'o lava i le fasiotia o tagata, peita'i, o le ala e tau atu i le atoatoa o le ola. O le ala fo'i lea mo i latou uma o mulimuli iā Iesu i aso nei.

E manino ma malamalama, o so'o na mulimuli iā Iesu, e fa'apea fo'i i tatou, ua tatou mulimuli ma le pala'ai o o tatou loto, ua vaivai o tatou agaga, ma ua leai se malosi e taumafai ai e fa'aosofia le fa'atumauiina i le ala faigatā lea, ona ua tatou fesili atu i se taui fa'apitoa. E pei ona molimauina le malosi ma le paoa o Iesu i le tele o fa'ata'ita'iga, latou te le'i fefefe e fai atu iā Iesu, fa'amata e te aumaia iā i matou mea uma matou te fai atu ai? E ui lava e lē o iā Iesu le malosi e fa'ataunu'u ai le mana'oga fa'apitoa lea, ua matuā atoatoa ona latou manatuaina le fuaitau ma le Isaia (64: 4). Na toe fa'alauiteleina e Paulo i lana tusi iā Korinito. *“A e pei ona tusia, o mea e lē i va'aia e mata, e lē i lagona fo'i e taliga, e lē i o'fo'i i se loto o le tagata, o mea ia ua saunia e le Atua mo i latou e alolofa iā te ia.”* (1 Korinito 2: 9).

E loloto le tu'ufa'afeagai o le mana'oga o so'o e to'alua i le fa'ai'uga o le malaga i le ala o Iesu i le lalolagi, o le to'alua na nonofo i lona itu taumatau ma lona itu tauagavale i le vi'iga i le o'o mai o le malō o le Atua, 'o tagata gaoi e to'alua sa i luga o satauro i ona autafa.' E pei ona maua i le tele o fa'ata'ita'iga mai faitauga na tatou ui mai ai, o lo'o i ai lava le fesuia'iga mo i latou ma tatou fo'i, e tatau ona va'ava'ai i ai i le lumana'i. O lo'o i ai foi' le tu'ufa'afeagai manino i le fa'ai'uga o le faitauga lea, ua ofo mai e Iesu lona lava soifua e totogi ai le tau o agasala a tagata uma. Peita'i, o le sa'olotoga i lona maliu, na aumai ai le liliuga manuia o le fa'apologaina, po'o le auuuna i le ala o le fa'asa'olotoina.

Tatalo: Le Atua e, aumai mo a'u le malamalama e talia ai mea e lē mafai ona ou suia, le lototele e suia ai mea e mafai ona ou suia, ma le atamai ou te iloa ai le 'ese'esega o ia mea. **Amene.**

Mafaufauga Loloto: O le sa'olotoga e tupu a'e mai filifiliga e tatala atu a o tatou agaga ma mafaufau i le finagalo o le Atua, ma fa'atāua lo tatou fa'alagolago atu i le Atua e fa'apei o se tamaitiiti.

Aso To'onai- Iuni 09, 2018.

“Ia taunu'u i lo tatou nofoaga fa'amoemocina.”

(Reaching our destination).

Tusi Faitau- Salamo- 110: 1-7.

Matua- (f: 1). *“Ua tulei mai le afigoa a le Alii i lo’u alii, ia e nofo i lo’u itu taumatau, sei’a ou faia e ua ita iā te oe ma mea e tu ai ou vae.”*

O le to’atele o tagata, latou te faitauina le salamo lenei o lo o fa’aogāina i le malumalu, mo le tu’uina atu o le tupu e pei o ia e sui tulaga mo le Atua. O lo’o nofo i le itu taumatau o le Atua, e fa’ailoa mai ai le tulaga lea, o se nofoaga fa’aalooologia tele. O le salamo, e ui ina faigatā ona malamalama i isi ona vaega, ae lē mafai ai ona fa’aitiitia ai lona tāua, auā o lo’o fa’aataata manino mai ai le Mesia a le Atua o Iesu Keriso, o lona manumalō ai’a’i i ona fili uma, ua mautinoa lava.

Peita’i, o le manumalō o Iesu Keriso i le aso o le taua ma le fili, e lē ala mai i le fa’amomomoina o ta’ita’i o lo’o pulea le lalolagi atoa. Toe faamanatu atu, ua tatou molimauina fo’i i’inei le fa’afeagai o mea o le ā tutupu. “O le manumalō, e maua i le fa’amomomoina o le Tupu e ta’ita’i o le lalolagi, fa’alē-atunuu, fa’apolokiki, ma fa’alē- tapuaiga. O le satauro, na matuā aliali mataga mai ai le leaga o i latou ia, ma iloa manino ai le leai o so latou malosi.” O lo’o fa’amautinoa mai fo’i e le salamo lenei, le tu’ufaa’asia o le paleali’i ma le fata faitaulaga i le malō o le Atua, pe a fa’alauiloaina mai e le ositaulaga silisili e pei o Mekisateko, le ositaulaga silisili ma le tupu o Salema, e pei ona fa’amatalaina i le Kenese 14. O lo’o fa’aalia ai le aumaia o le falaoa ma le uaina, ma fa’aataata mai ai le meaalofa na tu’uina atu e Iesu i ona so’o i le po a’o le’i malii o ia.

O ananafi sa tatou mafaufau ai i le mana’oga o Iakopo ma Ioane ina ia la nonofo i autafa o Iesu i lona mamalu ma le vi’iga, o se talosaga e lē mafai ona tu’uina atu e Iesu, ua na o le Atua lava. Peita’i, e pei ona fa’aataata mai i le salamo lenei le fa’apaleina o Iesu, ua tataua lava ona maua e Iakopo ma Ioane le mafanafana mai le tautoga e le’i mamao atu na faia e Iesu, *“Ona fetalai atu ai lea o Iesu iā te i latou, e moni ou te fai atu iā te outou, o outou ua mulimuli mai iā te a’u, pe ā tietie le Atalii o le tagata i lona nofoalii mamalu, i le toefuata’ina, tou te tietie ai fo’i i nofoalii e sefulu ma le lua, e fa’amasino ai i ituaiga o Isaraelu e sefulu ma le lua.”* (Mataio 19:28).

Tatalo: I le i’uga o le matou faigā-malaga, e mafai ea ona

matou fa'alogo atu i lau fetalaiga, 'ua lelei tele lea, le auauna lelei e, ma le fa'amaoni, ua e fa'amaoni i mea iti, ou te tofia oe e pule i mea e tele, inā ulufale mai i le fiafia o lou Alii. **Amene.** (Mataio: 25:23).

Mafaufauga Loloto: O fea tatou te nonofo ai i le aso o le manumalo? Tatou loto maualalo ma faamoemoe e lagona ana upu, La'u uo e, sau ia i luga nei i le nofoaga silisili ona lelei. (Luka 14:10).

I TOTONU O LE A'AI PAIA.

3. Faitauga i le Tusi o Mareko.

(Saunia: Raj Patta).

Fa'aliliuina mai le: NRSVA.

Aso Sa- Iuni 10, 2018. “Osana, fa'aola mai i matou.”

Hosanna- save us

Tusi Faitau- Mareko- 11: 1-11.

Matua- (ff: 9-10). *“Ua alalaga fo'i e na muamua, ma e na mulimuli, ua fa'apea, “Osana! Ia manuia lē afio mai i le suafa o le Alii. Ia manuia le malō ua o'o mai o lō tatou tamā o Tavita; osana i mea aupito i luga.”*

O le malaga a Iesu i Ierusalemia i le va'aiga fa'apolokiki, na matuā lelei le lagolagoina e tagata, o sitiseni o le malō na alalaga, *“Osana i le alo o Tavita, ia manuia lē afio mai i le suafa o le Alii, osana i mea aupitoaluga.”* Peita'i, i le fa'afeagai ma le pule'aga a Kaisara, o isi lava fo'i tagata e sitiseni fa'atasi ma Iesu na latou alalaga, Osana i le alo o Tavita. O le alaga lea ua leva ona i ai iā i latou o ni sitiseni o le malō, o lo'o va'ava'ai atu i se sa'olotoga mai le olopaina fa'a-polokiki o i latou.

E fa'aola mai i latou i le a? pe fa'aola mai i latou mai iā te ai? O le latou alaga, e mafai ona fa'apea, fa'aola mai i latou mai le malō o Roma, po'o le fa'aola mai i latou mai iā Kaisara, auā o lo'o fa'ailogaina ai i latou o tagata ese i pule'aga malolosi a le malō. O le tagi ma le oi ina ia fa'aolaina mai i latou mai pulega o lo'o taotaomia ai.

O le asō ma lenei vaiaso atoa, o le vala'au, ia tu'uina atu atoatoa i le loto e tasi le fa'atuatua o le tatou fa'apotopotoga e auai fa'atasi ma Iesu i lana malaga e tete'e atu i pulega sauā,

ma alalaga, Osana, le Alii e, fa'aola mai i tatou i nei faiga o lo'o taotaomia ai i tatou i o tatou fo'i taimi ma aso nei. O le la'a maualuga a Iesu i le pulega sauā a le malō o Roma, o lona fa'au'uina lea i le malō o le Atua, ma e tatau ona avea ma fa'atuatuaga o tagata uma, e lē gata e fa'amatalaina pea lea tala, ae avea pea ma o tatou fa'aosofiaga fa'ale-agaga.

Tatalo: Le Atua o le fa'aolataga, fesoasoani mai ina ia matou auai fa'atasi ma Iesu i le fa'amoemoe o lana savali o le fa'aolaina i le aso nei ma aso uma lava. **Amene.**

Aso Gafua-Iuni 11, 2018. “O lima mamā ma loto mamā”

Clean hands and clean hearts

Tusi Faitau- Salamo-24:1-10.

Matua- (ff:3-4). *“O ai ea se alu a'e i le mauga o le Alii? o ai se tumau i lona afioaga paia? O lē ua i ai lima mamā, ma le loto mamā, o lē ua lē naunau lona loto i le mea fa'atauva'a, ma ua lē tautō fa'a'ole'ole.”*

O le Salamo e 24, ua manatu le to'atele o le pese e ulufale ai i le malumalu, ma o le salamo e usuina ma lagiina ai le mata'utia silisili-'ese o le Atua i lo'o mea uma o i ai i le lalolagi. Peita'i, pe ā faitau le salamo lea mai le si'osi'omaga fa'a-Initia ma lona fa'atulagaga, e fa'agasolo i le nota o le “fa'amamāina ma le 'ele'elea” ona faigatā ai lea ona malamalama fa'ale-agaga ma fa'amataupu silisili i ai. O i latou o lo'o mamā, latou te fa'ailogaina tagata na fa'ananau i fafo atu o le fa'agasologa lea, e ala i le te'ena o i latou e ulufale atu i le potu paia o le malumalu. Fa'amata e mafai ona toe maua ni upu o le ola i le Salamo e 24 mo Initia i aso nei, ma tatou uma fo'i?

O lo'o tāua e le fai-Salamo, agava'a tāua e fā e mana'omia mo i latou uma e saili atu ina ia ulufale i le nofoaga paia. 1. O i latou ua i ai lima mamā 2. O i latou ua i ai le loto mamā. 3. O i latou ua lē naunau loto i mea fa'atauva'a. 4. O i latou ua lē tautō fa'a'ole'ole. Pau ia o tagata e agava'a ma mafai ona ulufale i le nofoaga paia. Peita'i o nei agava'a ua tāua, e fete'enai ma mea tāua e ulufale ai i le malumalu pe ā fua i le fa'agasologa mai iā i latou pito i luga aga'i ifo i lalo, e ala i galuega, o lanu, o tulaga ma mamalu, e ui ina vala'auina tagata uma e le Atua, e tusa pe lē fa'aaloologia ma amanaiaina

ona o le ta'u ma le soifuaga o soifua ai. O le nofoaga o le Atua e mo tagata uma i nofoaga uma, *“auā o le lalolagi ma mea ua tumu ai o ā le Alii ia”* ma e leai ni tuāo'i ma ni pa pupuni e mafai ona te'ena sē ulufale atu e fa'atasi ma le Atua.

O le lu'i mo i tatou, ina ia tatou tete'e atu i tuāo'i ma faigā-vaega e taofia ai tagata e o mai e fia auai fa'atasi ma le Atua. O ā tatou Ekalesia ma ā tatou tapua'iga, e tataua ona leai ni pa vaeloto e fa'ailogaina ai tagata. Ae tataua ona talia ma le fiafia i le talimalō mamā tagata uma, ae maise lava a tatou filifiliga ia avea ma totino o lotu i latou o lo'o i fafo ma Ekalesia ma lē mafai ona ulufale i se falesā.

Tatalo: Le Atua o mea uma lava, o le lalolagi ma mea ua tumu ai o ā lau Afio ia. Tatalo ia mafai e tagata uma ona maua le agaga moni e talia ai Oe. **Amene.**

Mafaufauga Loloto: E fa'aapefa iā i tatou o le fa'apotopotoga Kerisiano ona avea ma tagata e talia so'o se tagata, tusa lava po'o le ā le tulaga o i ai? Ia e faia se su'esu'ega fa'amataupu-silisili o lau Ekalesia e faavae i agava'a o lo'o tāua i le Salamo 24.

Aso Lua- Iuni 12, 2018.

“Ua fulifaō malosi'aga fa'apolokiki”

Overturning empire

Tusi Faitau- Mareko 11: 15- 19.

Matua: (f:17). *“Ua a'oa'o atu foi o ia iā te i latou, ua fa'apea atu, “E lē ua tusia ea, e ta'ua lo'u fale o le fale tatalo mo nu'u uma? A ua faia e outou ma ana o e fāo mea.”*

O le malō o Roma i taimi o lana pule'aga fa'akolone, o le malumalu i Ierusalem, na avea ma totonugālemu o le fesuia'iga o tupe, o le fa'atau atu ma le fa'atau mai, ma isi lava fefa'atauaiga fa'apisinisi. Na te'ena e Iesu le nifo o faiga fa'apolokiki ma tu'i mau, e ala i lona fa'aalia o lana tete'e i polokiki i luma o tagata, ua ia tulia i fafo i latou uma na fefa'ataua'i i le malumalu i faiga fa'apisinisi, na fuli i lalo laulau a ē na fesuia'i tupe, *“ua ia lē mafai fo'i ona ui ane se tasi ma se 'avega i le malumalu.”*(f:16). O le manatu mulimuli, o lo'o atagia ai le manatu mamafa o Iesu i le

puiipuiga o le paia atoatoa o le tulafono a le Alii, ae lē o le tulafono fa'apolokiki.

O taimi o le mapuitiga o tagata Palesitina mo se amiotonu ma lona toe atina'eina, na tula'i mai ai se fa'apopotoga e ta'ua o le 'Boycott Divestment and Sanctions' (BDS). Na latou matuā fa'atosina malosi e tete'e atu i galuega ma oloa mai isi teritori, o se gaiouga e mafua tutusa ma le gaiouga a Iesu. O lo'o fa'amatalaina e ia gaiouga e lua lo latou tete'e malosi i pulega fa'apolokiki, pe afai e olopalaina ai e le tagata malosi isi tagata. Na matuā manino lava lea i gaiouga a Iesu, ma lona leo malosi na aumaia le ola, ina ua alaga, "*E ta'ua lo'u fale o le fale tatalo mo nu'u uma, a ua outou ave ma ana o e fao mea.*" Na tulia i fafo e Iesu i latou na fa'atumulia le fale, o le au fao mea ma i latou ua pologa fa'ale-agaga ma fa'ale-tapua'iga ina ua ave'esea lo latou fa'atuatua i le Atua. Na taumafai Iesu ina ia toe atina'eina ma fa'aolaina i latou ia, e ala i le puipuia o o latou nofoaga, lau'ele'ele, ma o latou aia e ola manuia ai. O le vala'au mo i tatou, ina ia tatou auai fa'atasi ma Iesu e tete'e atu ma tulia ese malosi'aga fa'apolokiki ona o galuega, ma auai i le fa'aolaina ma toe atina'eina o so'o se tagata, i so'o se nofoaga o i ai i o tatou si'osi'omaga.

Tatalo: Le Atua fa'aola e, ia ave lo matou naunau ia te Oe ia mumū ma lava lona malamalama e feliiua'ina ai i latou uma o lo'o tete'e i lau Afio ma lau pule'aga o le amiotonu ma le filemū. **Amene.**

Mafaufauga Loloto: E fa'apefea ia i tatou o le fa'apopotoga o le 'au fa'atuatua ona auai fa'atasi ma Iesu, e fa'ailoa atu ai le ofoina atu atoatoa o i tatou ia Iesu ma lana gaiouga, o le tete'e atu i pule'aga fa'apolokiki?

Aso Lulu- Iuni 13, 2018.

“Ave ma so'o, toe ave ma sitiseni”

Discipleship and citizenship

Tusi Faitau- Mareko- 12: 13- 17.

Matua- (f: 17)). "*Ona tali atu lea o Iesu ia te i latou, "Inā avatu ia o mea a Kaisara ia Kaisara, ia avatu fo'i mea a le Atua i le Atua." Ona latou ofo ai lea ia te ia.*

O tagata sa i ai le paoa, ua latou lē mafai ona toe fuli se isi ma'a, e tali atu ai i le tetee o Iesu. Ona latou taumafai atu lea e fa'aleaga Iesu, fa'alata iā te ia, ma molia i le tulafono. O le tete'e o Iesu i pulega sauā fa'apolokiki, e matuā mata'utia. E tataua ea i le tulafono ona tofogi atu lafoga i le emeperoa pe leai? o le fesili lea. Avatu i le emeperoa mea a le emeperoa, ae avatu i le Atua mea a le Atua, o le tali lea a Iesu. O se tasi lenei o ana mataupu silisili mao'ae, o lo'o fa'amalamalama ai le va o le fa'atuatua i le Atua ma le paoa i pulega sauā fa'apolokiki.

I lana tali lea, ua maioio mai ai iā Iesu le va o le emeperoa ma le Atua, i lona si'osi'omaga i le pule'aga fa'a-emeperoa a le malō o Roma. O le emeperoa, ua fa'amatalaina e pei o se atua lona maualuga ma lona malosi, e malamalama lelei lea i le ta'u o le pule a le emeperoa. Na talepeina e Iesu lea malosi'aga ua masani ai i luma o tagata. Na ia lu'iina le sosaiete o tagata ina ia maua'a iā i latou le tu'uina atu o mea a le Atua i le Atua, ae lē o le taumafai e fai ona o le taotaomia i le pule'aga fa'apolokiki a le emeperoa.

O le talafa'asolopito, e fausia e le sitete le paoa mo ia lava, ma fai tagata e sitiseni latou te pulea ma fa'atautaia. O le sitete ma i latou ua i ai le paoa, e masani ona latou gagana i vaega 'ese'ese o le fa'atuatua, ma pulea tagata o le fa'apotopotoga i le suafa o le Atua ma le fa'atuatua.

O aso nei, o le lu'i mo i tatou, ia fa'apei ma ia avea o ni sitiseni, o le avea ma sitiseni, e matuā tataua lava ona tatou fa'atuatua i lo tatou Atua. A'o le avea ma fa'apotopotoga fa'atuatua, o tatou tiute o sitiseni o le malō po'o le sitete, o le fesiligia lea o le olaga ua masani a'i, o le paoa ma le olopalaina. I se isi fa'aupuga, o le avea o i tatou ma sitiseni, e fa'atumuina ai ma fa'aleleia atili ai lo tatou avea ma so'o o le Alii. A'o lo tatou avea ma so'o, e tataua ona o fa'atasi ma lo tatou ta'u o sitiseni e fa'ailoa atu le amiotonu a le Atua.

Tatalo: Le Atua e, ta'ita'i lo matou olaga fa'a-so'o ia atagia i o matou tagata sitiseni, a'o o matou tagata sitiseni, ia taula ma ta'ele i lo matou olaga fa'a-so'o. **Amene.**

Mafaufauga Loloto: E fa’apefea ona avea le tautala e tete’e atu, mai le sa’olotoga o tapua’iga, o se mea totino a se so’o Kerisiano o Iesu?

Aso Tofi- Iuni 14, 2018. “E fa’ale-agaga le Tusi.”

Spirituality of scripture

Tusi Faitau- Mareko- 12: 18-27.

Matua- (f: 24). *“Ona tali atu lea o Iesu iā te i latou, “E lē o lenei ea ua outou sesē ai, ina ua outou lē iloa upu o Tusi, ma le mana o le Atua?”*

Ua ma’ea le taumafaiga a faresaio e mailei iā Iesu, a’o lea ua o’o i le taimi o le taumafaiga a satukaio. O le faiga o polōketi fa’akolone a Roma, e galulue i le fa’avae o le ‘vaevae ma le pule,’ o le mea lea e fa’amalosia ai se finauga fa’amataupu silisili i le va o faresaio ma satukaio. O le faitauga o le asō, o lea ua o’o i le mataupu o le talitonuga i le toetu, le mataupu o loo manana’o i ai le ‘au-satukaio e maua ai Iesu ma manumalo ai i le ‘au-faresaio, e ala lea i le si’itia o upu i le Tusi. O Iesu, o lo’o tu’uina atu i se su’esu’ega fa’ale- tagata i le mataupu o le fa’aipoipoga ma le toetu. Peita’i, na fa’afetaui e Iesu i latou na fesili e ala i le fa’alautele atu o lō latou sesē i le uiga o Tusi ma le mana o le Atua.

O se faiga ua aumaia ai se fa’ata’imuaga i le fa’aoa’ina ma le sesē ona fa’aaogāina, ia po’o le ova fa’aaogāina fo’i o Tusi. Ua fa’alautele foi e Iesu lo tatou sesē i le fa’aaogāina ma le fa’amatalaina o tusi, auā o le agaga o tusi, o le fa’atuatua lenā ua talafeagai ma tatou i aso nei. O le upu ua liutino tagata iā Iesu Keriso, ma ua valaauina i tatou ina ia fa’amatalaina fa’ailoga o tatou taimi mai se va’aiga fa’ale-agaga, auā o le mana o le Atua o lo’o i Tusi ua fa’aalia mai i le ala lenā.

Tatalo: Le Atua alofa e, ia avea le mana o lou agaga e ta’ita’iina ai i matou e saili i le amiotonu ma le toe atina’eina fa’ale-agaga, e ala i le faitau ma saga faitau i lau Upu.

Mafaufauga Loloto: E fa’apefea ona ‘ese’ese le toe faitau ma saga faitau o le Tusi Paia? Ae fa’apefea fo’i ona tutusa?

Aso Faraile- Iuni 15, 2018.

“Alofa i le Atua, alofa i le tuaoi.”

Loving God, loving neighbour

Tusi Faitau- Mareko- 12: 28-34.

Matua- (f:34). *“Ua silafia e Iesu ua tali mai o ia ma le atamai, ona fetalai atu lea iā te ia, “E te lē vāvā mamao oe ma le malō o le Atua” Talu ai ua lē toe fa’amalosi se tasi e fesili iā te ia.”*

I pulega sauā fa’apolokiki a le malō o Roma, o le alofa i le emeperoa ma auauna i ai e leai se gagana, e matuā fa’amalosi lea. O le mea lea, na tali ai Iesu e tete’e atu i lea faiga e ala i lona fa’amamafaina o le alofa i le Atua ma le alofa i le tuaoi i le ‘au tusiupu sa fa’alogologo ai. O le alofa i le Atua ma le alofa i le tuāo’i, o tulafono ia e lē tataua ona fa’apogisaina ai se tasi o alofa i le emeperoa ma le malō. I lea auala, ua tatala ai e Iesu le fa’ailoaina o lea tulafono. O le alofa o le Atua ma le tuāo’i e manino lelei lava le ofoia atu i so’o se tagata o sauāina fa’akolone e isi, pe ā va’ai i ai fa’ale-agaga.

Ina ua tali ane le tusiupu iā Iesu e pei ona tāua i le faitauga o le asō e uiga i le tulafono, na ia toe fa’alautele ai e ala i le fa’asilisili o le alofa i lo taulaga e pei ona faia i sauniga i le malumalu. Na amanaia e Iesu le tusiupu lea ma ia fa’apea ane, *“E te lē vāvā mamao oe ma le malō o le Atua.”* O le pule’aga a le Atua, e lē tutusa ma le pule a le emeperoa ma lona malō, auā i le amataga, o le alofa o le Atua ma le tuāo’i e ogātotonu iā Iesu, ma o le fa’avae maua’a lenā. O le malō o le Atua e maua i le fa’atinoina o le alofa, ma fa’alatalata mai i le fa’atinoga ma fa’aaliga uma o lea alofa silisili.

O le mea lea, tatou tete’e atu, o ‘ese mai, ma matuā fa’aumatia malosi’aga uma fa’a-emeperoa ma pulega sauā fa’apolokiki o ō tatou taimi. Ma ia fa’ataga o tatou tagata e nonofo latalata atu i le malō o le Atua, e ala i lo tatou alolofa i le Atua, ma ia tatou alolofa fo’i i o tatou tuāo’i ia lē fa’atuāo’ia ma ia lē gata.

Tatalo: Le Atua o le alofa fua, ia avea i matou ma molimau mausalī o lou alofa, ina ua matou tu’uina atu atoatoa i matou e alolofa fa’amaoni i lau Afio, ae maise o matou tuāo’i i le asō ma aso uma, ina ia faia pea lau pule silisili i o matou taimi, **Amene.**

Mafaufauga Loloto: E te manatu o le tiute o le isi malō o le alofa i le isi malō, pe na o le tagata to’atasi i le isi tagata?

Aso To'onai- Iuni 16, 2018.

“Fa’afiaamiotonu ma le fa’aleaogāina.”

Hypocrisy and condemnation.”

Tusi Faitau- Mareko- 12: 35- 44.

Matua- (f: 43). *“Ona vala’au atu lea o ia i ona so’o, ua fetalai atu iā te i latou, “E moni, ou te fai atu iā te outou, o mea a lenā fafine mativa ua oti lana tane, ua lafo i le mea e teu ai tupe, ua sili ia i ā latou uma na lafo i ai.”*

O taimi fa’ai’u o fetaia’iga fa’amataupu silisili a Iesu ma le to’atele o tagata, e o fa’atasi le fa’aleaogāina po’o le fa’asesēina ma ana saunoaga. Na ia fa’aleaogāina le fa’afiaamiotonu ma le lē sa’o o tusiupu, i lo latou tu’inanau i le paoa, ua faasesēina ai tagata lautele. A o le isi fo’i itu, na ia saunoa tuu sa’o ai i le fafine mativa ma le maoa’e o lana foa’i, e fa’atusatusa i e mauoloa na ō ni nai mea mai mea e tele ua iā te i latou na latou lafoina i le malumalu. Ua fa’aleaogāina fa’alaua’itele e Iesu le fa’afiaamiotonu o le pule i le lotu. Ua latou fa’aaogāina tagata o lo’o fai ma ā latou kolone, atoa ma fafine matitiva i le suafo o le Atua, e ufiufi ai lo latou fa’afiaamiotonu. Ua latou teuteu lumāfale e fa’amalie ai le va’aiga a tagata. Ua u’umi a latou tatalo, ua fia evaeva ma ofu tapuvae, ua fia maua fo’i o nofoa sili i sunako, ma mea sili e ta’oto ai i faigā’ai. Ua ola fa’afoliga i o latou olaga i le tino, e foliga mai ai o lo’o lelei ma le agaga. Peita’i, na faasa’o e Iesu lo latou pepelo ma le fa’afoliga fa’ale-agaga, ma ia perofeta atu i ai i le matuā fa’aleagaina o i latou uma, o lo latou tau i lea mai le Atua.

I le ofisa o le tupe i le malumalu, na fa’atāua ai e Iesu le fafine mativa ua oti lana tane, auā i le tu’ufa’afeagai ma tusiupu, ua ia alofa i le Atua mai lona mativa, ma ave uma ai tupe e ola ai mo le Atua. E lē o le fa’amamafa a Iesu o le a’ofaiga na foa’i atu, a’o le agaga i le fafine na foa’iina ai, o lona alofa atoatoa i le Atua. O le tamāoaiga ua telē lona aofa’i o lo’o iā i latou, na latou ave fa’ananā mai foa’i a i latou e matitiva. E lē i manatu mamafa Iesu po’o ai e telē lana foa’i i le malumalu i le mea e teu ai tupe. O lo tatou vala’auina, ia ave’esea nei le fa’afiaamiotonu, ma taofia le ola fa’afoliga i galuega o le fa’atuatua, a ia fa’amalosia i tatou i le agaga e ofoina atu ma foa’i atu le lelei silisili ma le atoatoa mo le Atua.

Tatalo: Le Atua alofa e, ave'ese i o matou olaga le ola fa'afia-amiotonu, ma fesoasoani mai ina ia maua le loto maualalo e alolofa i le mea silisili e ala i ā matou foa'i. **Amene.**

Mafaufauga Loloto: O ai ua fa'asino mai e Iesu i aso nei o ni fa'ata'ita'iga o le fa'afia-amiotonu ma le tu'inaanau lē maona?

O LE NOFOAGA E NONOFO AI.

1. O le maumausolo.

(Saunia: Deseta Davis).

Fa'aliliuina mai le: NRSVA.

Aso Sa- Iuni 17, 2018. “E leai se nofoaga.”

No where

Tusi Faitau- Luka 9: 57- 62.

Matua- (f: 58). *“Ona fetalai atu ai lea o Iesu iā te ia, “E fai lua o alope, e fai fo'i mea e momoe ai manu felelei; a o le atali'i o le tagata, e leai se mea e moe ai o ia.”*

O tagata ua leai ni aiga e nonofo ai, o se fa'afitauli ua i ai i le lalolagi atoa. O aso nei, e pei fo'i ona i ai i le ulua'i seneturi i Palesitina, e fa'amalosia tagata e momo'o ma sa'ili'ili solo ni nofoaga e momoe ai, po'o le ā lava latou te mafai ona maua. Na fetalai Iesu i le taule'ale'a na mana'o e mulimuli iā te ia, “e fai lua o alope, e fai foi mea e momoe ai manu felelei ma ola ai. Pe ā fa'atusatusa, o Iesu lava ia, e leai se nofoaga po se mea e ta'oto ai ma moe ai o ia. O nei aso, ua to'atele ua momoe i faitotoa o fale, ma fale'ie latou te mafaia. O nisi taimi, na pau le malutia mo i latou, o sina atigipusa mālo e maua. O nisi ua mo'omo'o mai se tasi nofoaga i se isi nofoaga, mai se tasi nu'u i se tasi nu'u, mai se tasi atunu'u i se tasi atunu'u, e sulufa'i i ai mo se lavea'iina.

O Iesu, ua fa'aailoaina fa'atasi o ia ma so'o se tagata lava. Na te silafia ma lagona lelei le mea e ta'ua o le te'ena. Na te silafia ma lagona lelei le mea e ta'ua o le fia'ai ma le fia inu. Na te lagonaina lelei le leai o sona tulaga ma sona fa'aaloaloga, e mafai ai ona ia maua se va'a o sana uo e i ai se moega. Na te lagonaina le faigatā o le 'aisi ma fa'amoemoe i le alofa ane o tagata. E leai se mea e ta'u ai o ia, e matua leai lava foi se mea e patino iā te ia.

E to'atele tagata e manana'o e mulimuli iā Iesu, peitai, e toe liliu ma fo'i i tua isi, pe ā latou iloa ane e leai ni mea fa'ale tino na te ofoina i tagata. O le nei vaiaso, o le ā tatou talanoaina ai le tigā ma mo'omo'oga o feagai ma i latou o lo'o sa'ili solo, ma fa'amoemoe i isi, ae maise o le fa'anaunau ma tatalo mo se suiga o lea faigatā.

Tatalo: E mafai ona tupu le leai o ni aiga ona o taua, ia po'o le malepelepe o aiga. Tatalo mo i latou ua leai ni aiga e nonofo ai i le nofoaga o lo'o e i ai. **Amene.**

Aso Gafua- Iuni 18, 2018.

“O le mea lenā, peitai, e mo le alofa tunoa o le Atua.”

There, but for the grace of God

Tusi Faitau- Kenese 4:8-16.

Matua- (ff: 8, 15). *“Ua fai mai fo'i Kaino iā Apelu lona uso, ua i ai fo'i i laua i le fanua, ona tula'i atu lea o Kaino iā Apelu lona uso, ma fasioti iā te ia. Ua fetalai atu le Ali'i iā te ia, O lenei, ai se fasioti iā Kaino e tauia fa'afitu o ia, Ona tu'uina lea e le Ali'i le fa'ailoga iā Kaino, e lē fasiotia o ia e sē maua o ia.”*

Na fa'asalaina Kaino ina ua ia faia le solitulafono aupito mamafa i le soifuaga o le tagata. Na ia fasiotia lona lava uso. O le ulua'i fasioti tagata lea na fa'amauina, a'o le fasiotiga o lona lava toto ma a'ano. O le isi vaega o lona fa'asalaga, o le ā avea o ia ma maumusolo ma fa'asevasevaloaina i le lalolagi. Na lagona e Kaino ua matuā mamafa lona fa'asalaga, peitai, o le Atua i lona alofa tunoa tele na ia toe tu'u ai le fa'ailoga iā Kaino e taofia ai so'o se tasi ona tau'i atu iā Kaino e tusa o le agasala ua uma ona ia faia.

O agasala fa'apea, ua ta'atele fo'i i o tatou aso. E mafai ona tatou talia nisi agasala fa'apea, o mea tutupu lava o le olaga, peita'i, tatou te fa'amoemoe lava o le ā i ai se taimi e fa'asalaina ai lē na faia le agasala. O nisi e fa'apea ane, ave e loka ma ave'esea ki mai iā i latou, ua tele tupe o lafoga a tagata ua latou aveina.

Peita'i, o le ā le mea a le Atua na faia iā Kaino? Na ia faia Kaino ma maumusolo ma fa'asevasevaloaina i le lalaolagi, e leai se nofoaga e mau ai, na momo'o ia maua sina avanoa mo se moega mo ia. A o le Atua fo'i, e ui lava i lona fa'amoemoe

e fa'ataunu'u pea le fa'asalaga o Kaino, na ia tu'u lava le fa'aailoga mo Kaino. Fa'amata e lē o se galuega lenā o le alofa mutimutivale ma le tunoa o le Atua?

O le fa'ateleina o lo tatou fa'amoemoe e fa'asalaina tagata ona o mea sesē ua latou faia, e matuā tatau lava fo'i i lea taimi ona i ai iā i tatou sina vaega o le alofa mutimutivale mo i latou. O le to'atele o tagata e solia tulafono ma agasala ai, e o 'ese mai falepui, ma i'u ane ua avea ma maumausolo ua leai ni mea e nonofo ai. O lona uiga, ua fa'aauuina pea ona tatou fa'asalaina i latou. Peita'i, ia fa'apei o le mutimutivale o le alofa o le Atua, ua tatau ona iā i tatou le fa'amafanafana atu, ma tausia i latou ua pau'u 'ese ma le ala, i le alofa mutimutivale ma le alofa tunoa tele fa'apei ona faia e le Atua.

Tatalo: Le Tamā alofa mutimutivale e, o le to'atele o pagota ma i latou o mafatia ona o solitulafono. Fa'amolemole fesoasoani iā i latou ina ia latou iloa o latou sesē, ma toe fa'asa'o o latou ala, ina ia latou maua le alofa e fa'amagalalo ai, **Amene.**

Mafaufauga Loloto: E i ai se mea e mafai ona e faia e fesoasoani ai i tagata o le tou nofoaga, e suia mai i latou i le olaga falepui i le olaga i totonu o le sosaiete?

Aso Lua Iuni 19, 2018. “O latou nei, a'o tatou taeao,”

Theirs today, ours tomorrow

Tusi Faitau- Kenese- 7: 1-16.

Matua- (ff: 7, 16). *“Ua ulu atu Noa, ma ona atali'i, ma lana avā, ma avā a ona atali'i fa'atasi ma ia i le va'a ona o le lolo. Ua latou ulu atu, o le po'a ma le fafine i meaola uma, ua latou ulu atu, e fa'apei ona poloa'i atu le Atua iā te ia, ona pupuni ai lea e le Alii iā te ia.”*

Ina ua latou ulufale i le va'a, ua fa'amalosia ai Noa ma lona aiga e tu'ua lo latou aiga ma mea uma ae malaga 'ese, e aunoa ma le iloaina po'o fea e o i ai, a'o le ā fo'i o lo'o ta'oto mai le lumana'i mo i latou. E to'atele tagata e lē mafai ona sosola 'ese mai le fa'aleagaina po'o le fa'atama'iaina e le natura. I nisi nofoaga, ua susunuina e le la le lau'ele'ele, ona tu'ua ai lea ua leai se vai e totō ma ola ai fa'atoaga, ma o'o ai ina feiti tagata mai se oge tele. Ae e i ai fo'i isi nofoaga o lo'o tele ai

timuga ma malelemo ai mea totō, ma o lo’o feoti ai tagata i lologa ma tafega, aemaise o le leai o ni mea’ai. E fa’apefea ona latou sosola ‘ese?

Ua avea le tau o se tasi o mafua’aga o le tu’ua e tagata o latou aiga, ae saili atu i se nofoaga e maua ai ni mea’ai ma ni vai-inu. Latou te savavali mo le tele o maila ma i’u ane ua avea ma tagata sulufa’i i isi ‘ele’ele. O le lau’ele’ele o le ā taunu’u i ai, atonu o le ā mafai ona avea ma lau’ele’ele e puipuia ai i latou. Peita’i, i nisi lau’ele’ele e sulufa’i i ai e maua ai le saogālemū, a’o isi e maua i ai le te’ena ma le inosiaina.

Na saunia e le Atua se auala mo Noa. Na tapuni e le Atua le faitoto’a o le va’a, na tu’uina meaola o le foafoaga i totonu mo lo latou saogālemū ma fesoasoani i lo latou sosola ‘ese mai le lolo. Ia fa’apei o le Atua, o i latou o lo’o saogālemū i o latou lau’ele’ele, e tatau ona fa’aeteete e fa’ailoa atu le alofa ma le puipuiga iā i latou o sulufa’i solo mo se saogālemū. E tele ina tatou lē iloa uiga o le tau, e i ai lava se ogā’ele’ele o le ā mafai ona folo ese atu e lologa ma tafega.

I nai tausaga ua te’a atu, na fa’ateteleina ai lologa ma tafega i le United Kingdom, a’o o’u tusia nei mafaufauga, sa ou fa’alogoina fo’i tala i lologa ma tafega i nisi vaega o le Iunaite Setete. Tatou te manatunatu mo se fesoasoani pe ā pagātia ma mafatia i tatou i le fa’atama’iaina e le tau, a’o tatou feoa’i solo ma taumafai ia maua ni nofoaga malu puipuia ma mautū lelei. O le fesili la, fa’amata o le ā tatou fesoasoani i isi o lo’o puapuagātia i aso nei?. Manatua, o ā mea ua tutupu iā i latou i le asō, atonu e tutupu iā i tatou taeao.

Tatalo: Le Atua o le alofa tunoa e, e pulea e lau Afio le matagi ma le vai, fesoasoani iā i latou ua leai ni mea e nonofo ai ona o a’afiaga o le tau. Talosia ia maua ni o latou nofoaga filemū ma le saogālemū. **Amene.**

Mafaufauga Loloto: O le ā se galuega o lo’o faia e le tou faigā-malō e puipuia ai tagata mai fesuia’iga o le tau?

Aso Lulu Iuni 20, 2018

“I se nofoaga i luga atu o le nuanua.”

Somewhere over the rainbow

Tusi Faitau- Kenese- 12: 1- 9.

Matua- (f: 1). *“Ua fetalai mai le Ali’i iā Aperamo, Ia tu’ua e oe o lou nu’u, ma tagata o lou nu’u, ma le aiga o lou tamā, a e alu atu i se nu’u ou te fa’asino atu ai iā te oe.”*

O le tu’ua o le aiga, o se taimi fiafia tele pe afai ua iloa ma mautinoa le mea o lo’o aga’i i ai, ma ua uma fo’i ona fa’ata’oto lelei mea uma. Ae e mafai foi ona avea ma fa’avaivai malosi pe o’o ai ina fefe ma palaa’i, e fa’alagolago i mea e tutupu mai. I taimi o o’u a’oga i le kolisi, sa ou tusia ai se tauloto e fa’atautu i se aiga faimalaga, ua tu’ua lo latou aiga ona o le la mala ua umi o feagai ma i latou. O le amataga o le tauloto e fa’apea: “E i ai lo’u aiga manaiā i tuā i o, i se mea o.” (I had a nice home back there, somewhere). E lē o le tauloto aupito sili lea ona lelei, peita’i, e lē mafai ona galo iā te a’u le ulua’i taimi, i tuā i o, i se mea o o.

O le olaga o tagata faimalaga i aso la, ua tutusa lava ma aso nei. Ua savavali tagata i le tele o maila ina ia ‘alo ese mai ai i taua ma le matelaina, tu’ua aiga, fa’amata’uina o latou ola, ma le lē iloa po’o fea e o i ai, peita’i, latou te fa’amoemoe pea ma tatalo, o le ā latou maua ni nofoaga saogālemū ma lelei i se mea o o.(somewhere). I se nofoaga i luga atu o le nuanua.... O le to’atele o tagata latou te talotalo i se nofoaga i luga atu o le nuanua, ina ia lē toe fa’alogoina ai ni leo o ni pomu pāpā. I se nofoaga o le ā latou maua ai ni meaai ma nonofo lelei ai, nai lo’o le nofoaga ua latou tu’ua.

O Aperamo, na ia tu’ua lona aiga ma mea uma sa iā te ia, mo se isi lau’ele’ele i se mea o o. Na ia matuā lē iloa lava le mea o lo’o alu aga’i i ai, a’o ā fo’i foliga o le na nu’u pe afai e taunu’u i o, peita’i, na fa’amoemoe lava ia maua le lau’ele’ele o le suāsusu ma le meli. Ua taumafai tagata i aso nei ina ia maua le lau’ele’ele na tauto ai le Atua, tau lava ina iloa ai i latou o ni tagata ‘ese i se lalolagi lē fefa’auoa’i.

Tatalo: Tatalo mo i latou o lo’o saili pea i o, ina ia latou maua se lau’ele’ele i luga atu o le nuanua, latou te sa’oloto ai, **Amene,**

Mafaufauga Loloto: Tu’u lou tagata i totonu o se aiga o loo faimalaga e saili se lau’ele’ele fou. Tusi sau solo, se pese po’o se tala e uiga i le tou faigāmalaga.

Aso Tofi- Iuni 21, 2018. “O fafine matelaina.”

Women in poverty

Tusi Faitau- Ruta-1: 1- 5.

Matua- (f: 2). *“O Elimeleka le igoa o le tagata, o le igoa o lana avā o Naomi, o igoa fō'i o ona atali'i e to'alua o Ma'alona ma Killiona, o Sā Efaratā i latou mai Petele'ema o Iuta, ua o atu i latou i le nu'u o Moapi, ua nonofo ai.”*

O Moapi, o se tasi o atunu'u na latou olopalaina ma fa'asauā iā Isaraelu i taimi o fa'amasino. Na i ai pea lava le feinoinoa'i ma le faitaga'i i ia malō e lua. O se so'otaga fa'auo ma tagata Moapi, na matuā fa'aleaogāina ma te'ena. Ae ina ua tupu le oge i Iuta, ona malaga lea o Elimeleka ma Naomi ma le la fanau e nonofo i Moapi i le manatu o le a filemū ma saogālemū ai o latou ola. Na faiaivā le la fanau tama e to'alua i fafine Moapi, o le mea e matuā fa'amamafa lona fa'asāina i le tulafona a Isaraelu.

Ina ua maliliu uma tane a fafine e to'atolu, ona fa'afuase'i lea ona avea i latou ma fafine nofo ta'ito'atasi ua leai ni tane. E leai se mea e sili atu ona leaga i atunu'u i sasa'e i na ona po, na i lo le nofo to'atasi ua oti le tane. O oe o se fafine mativa, e lē amana'iaina, ae maise lava pe afai e leai ni ou atali'i. O fafine e leai ni o latou aiā, auā o mea totino uma e fa'asolo i atali'i mai le tamā pe a oti. O le ala lea e matitiva ai fafine i tupe ma le tamāoaiga. O fafine o mea totino a tamāloloa, a le o se tamā, o le to'alua.

O aso nei, o lo'o i ai pea vaega o ituaiga o fafine o lo'o matelaina. O fafine e foliga mai ua vavae'eseina i latou o ni tagata matitiva. E tusa ai ma fa'amaumauga a Malō So'ofā'atasi, i le tele o atunu'u, o lo'o fa'aauau pea ona fa'amoemoe fafine i o latou taito'alua mo le tamāoaiga. I malō ua mautū le atina'eina, o tulafono e faia e le malō po'o tulafono fo'i fa'ale-aganu'u, o lo'o fa'aauauina pea le fa'asāina o fafine e aiā i lau'ele'ele ma isi meatotino, e fa'apenā fo'i ona itiiti so latou sao e maua mo aiga i le tamāoaiga o le atunu'u.

Na tu'ua e Naomi Petele'ema ina ia sola 'ese ai mai le oge, mulimuli ane, na taunu'u i se isi oge ua sili atu le mata'utia ma faigatā nai lo le oge sa i ai muamua. Ua leai sona to'alua, po'o sona atali'i o totoe, a ua tu'ua na o ia ma isi fafine e to'alua, e matuā leai so la feso'ota'iga i lona lau'ele'ele po'o mea'ai

fo'i. Ua tu'ua lava ma le leai o se mea. O le tali sa'o lava o lo'o totoe mo ia, o le toe fo'i i Petele'ema, ua fa'alogo ua i ai le mau e tele, ma taumafai ai sona manuia.

Tatalo: Le Atua alofa e, fesoasoani mai ina ia matou manatuaina i latou o lo'o matelaina ma fia-a'ai, ae maise lava o fafine ua leai se feso'ota'iga ma lau'ele'ele ma mea uma o le olaga. Ia mafai ona matou fesoasoani atu iā i latou i so'o se auala matou te mafaia, **Amene.**

Mafaufauga Loloto: Afai e te le'i faia lava, ae a pe ā e ofoina atu sau fesoasoani i se fa'alapotopotoga, e fesoasoani atu ai i e matelaina ma fia-a'ai.

Aso Faraile- Iuni 22, 2018. “Alofa i ou tuāo'i.”
Love thy neighbour

Tusi Faitau- Ruta- 1: 6-18.

Matua- (ff: 16-17). *“A ua fai atu Ruta, aua e te finau iā te a'u ina ia ou tu'ulafoa'i iā te oe, ia lē mulimuli atu iā te oe, auā o le mea e te alu i ai, ou te alu ai fo'i, o le mea e te nofo ai, ou te nofo ai, e fai lou nu'u mo'u nu'u, e fai lou Atua, mo'u Atua, o le mea e te oti ai, ou te oti ai, e tanu ai foi a'u, ia fa'apea ona faia e le Alii iā te a'u, ma ia fa'aopoopo i ai, pe afai e tu'u-'ese'eseina i taua ma oe i se tasi mea, se'i vaganā le oti.”*

Ua fa'aaau mai ananafi na tatou fa'alogo ai iā Naomi, Ruta ma Orepa ua feoti o latou taito'alua. Ua fa'alogo Naomi ua tele mea'ai i Iuta, ona ia fa'amalosi atu lea i avā a lana fanau, e toe foi i o la aiga. Ua matuā leai lava se saogālemū ma se fa'amafanafanaga o totoe iā te ia, ua na o le toe foi lava i Peteleema i le olaga o le nofo to'atasi ma le mapuitigā. Ua leai lava se mea o totoe iā te ia e avatu ma avā a lana fanau, ua na o le olaga matelaina ma tigā. Mo se fafine to'atasi, e sili atu iā Ruta lona nofo i Moapi auā e lē mautinoa le taliaina o ia i Iuta. O le talitonga o Isaraelu i aso lā, o tagata Amoni po'o Moapi, e lē mafai ona ulufale i le fa'apotopotoga a le Atua. (Teuteronomie-23: 3). O Ruta o le Moapi, ma e matuā leai sana aiā e tapua'i ai i le Atua o Isaraelu, a'o ana upu e lagona i le fatu i fuaiupu 16-17, o lo'o olaola ma aogā pea i tupulaga uma. E fai lou nu'u mo'u nu'u, o lou Atua e fai mo'u Atua. Na tapua'i Ruta i le Atua o Isaraelu ma talia lelei o ia. Na i'u ina

fa'aipoipo ma Poasa, ma avea ai ma tinā o le tamā o Iese le tamā o Tavita le tupu, le amataga o le gafā o Iesu Keriso. E lē galue le Atua e fua fa'atautau i ni lanu, ituaiga po'o sitiseni o atunu'u. O Ruta, o se tasi o fafine mai se to'aitiiti o tinā, o lo'o a'afia i le gafā tau toto o Iesu i le evagelia a Mataio. E lē afāina sona tala'aga po'o fea e sau ai, e i ai lava tagata e ulufale i isi atunu'u ma mafauauga 'ese ma se mafai uiga 'ese. O le tu'uina atu o se avanoa mo i latou, atonu o le ā avea ai ia tagata ma tagata iloga i talafa'asolopito o ia atunu'u. E fa'apei ona talia e le Atua o Ruta le fafine Moapi, tatou mulimuli atu ia i ana fa'ata'ita'iga, ma talia nisi tatou te va'ai i ai e 'ese mai iā i tatou, ma tausia lelei i le fa'aaloalo.

Tatalo: Le Atua alofa e, e fa'apei ona e faia ia tasi i matou uma i lau Afio, se'i e tatalaina le felanua'i o tagata ia avea ma tasi mo tagata uma, ina ia lagona ai le fiafia i totonu o aiga ma lo matou auai fa'atasi, e lē afāina ni o latou tala'aga, **Amene.**

Mafauauga Loloto: I tausaga e tele ua tuana'i, ae maise lava i Aferika ma Sasa'e tutotonu, na va'aia ai e le lalolagi se fuainumera mao'e o tagata ua leai ni nofoaga e nonofo ai, talu ona fa'amauiina i le talafa'asolopito. E fa'apefea ona aogā se fe'au o upu ia a Ruta i fa'afitauli fa'apea o aso nei?

Aso To'onai Iuni 23, 2018.

“O ai e fa'amatalaina ai oe?”

Whom do you identify with?

Tusi Faitau- Luka- 10: 1- 11.

Matua- (ff: 3- 4). *“Inā o atu ia, fa'auta, ou te a'auina atu outou pei o tama'i mamoe i le va o luko. Aua tou te ave se ete tupe, po o se taga, po o se'evae, aua foi tou te ofo alofa atu i se tasi i le ala.”*

O le auina atu o ona so'o i le galuega, na fa'atonuina ai e Iesu i latou ina ia aua nei o ma ni tupe, o se taga po'o se'evae fo'i. O mea tauloto ia a se tagata malaga i le uluai seneturi i Palesitina. Afai latou te femalagaa'i i a'ai eseese, e fa'apefea ona malaga e aunoa ma mea ia? E fa'apei ona ola fa'atasi Iesu ma tagata e leai ni tupe, o ona so'o foi la, e fa'amoemoe o le ā fa'amatalaina fa'atasi ma tagata matitiva. O le leai o se taga, o lona uiga e leai se mea'ai e avea i le malaga, o le mea lea e

iloa fa'atasi ai i latou ma tagata fia a'ai. O tagata sa ola fa'anoanoa i na ona po, e lē se'e i ni se'evae, ia fa'apea foi ona fa'amatalaina fa'atasi ai ma ona so'o. E tatau ona ola fa'atasi ma tagata, ma talia le tulaga o lo'o latou ola ai. O ai e alofa ane iā i latou ma avane se nofoaga e nofo ai, latou te mapu ai lava, se'ia o'o ina fa'aauau le malaga i isi a'ai. O le ata ua fa'amatalaina fa'atasi i latou ma Iesu.

I lana lauga fa'aamuia i luga o le mauga i le mataupu e 6, o lo'o fa'alauiloa ai e Iesu fa'amanuiaga mo so'o se ituaiga o tagata. I latou e matitiva, i latou e fa'anoanoa ma fetagisi, tagata fia a'ai ma i latou e agaleagaina ona o le talalelei. Tusa lava la pe leai ni mea ia mo le malaga, e leai se fa'aletonu i le 'au-so'o i lo latou iloa ma lagona le olaga o lo'o ola ai le tagata mativa, e fia 'ai ma tagi auē, e mafai lava ona latou tala'i atu i tagata i se auala sili atu ona vāvālalata ma lagona o tagata. Fa'aauau le fetalaiaga a Iesu i lona folafolaina o le, "Oi! talofa..." iā i latou o ē mau'o'a, tagata ua ma'o'ona, tagata o lo'o 'ata'ata ma fiafia, tagata ua lauiloa ma lelei a latou upu. O lo'o fetalai mai foi le Atua i le mea lava lea e tasi i aso nei. O le avea ma so'o, e tatau ona fa'amatalaina pe fa'a'ailoa fa'atasi i tatou ma tagata matitiva, fia-a'ai ma mafatia. O olaga fa'apea, e fausia ai e le Atua fa'amanuiaga.

Tatalo: Le Atua alofa e, a'oa'o mai ia matou manatua o le avea ma so'o o le tu'ua lea o mea uma. Ia fa'amatalaina fa'atasi i matou ma tagata ua i ai i mafatiaga o le olaga mativa, ina ia mafai ai ona matou molimau atu, ua matou lagona fa'atasi o latou mafatiaga, **Amene.**

Mafaufaga Loloto: Tusi i lalo ni auala e mafai ai ona fa'amatalaina fa'atasi oe ma tagata o lo'o maulalo tulaga i le tou fa'apopotoga.

O LE NOFOAGA E NONOFO AI.

2. Ua mautū.

(Saunia: Helen Van Koevering).

Fa'aliliuina mai le: NRSVA.

Aso Sa- Iuni 24, 2018.

“Fa'amoemoega i se aiga o le ā o'o mai.”

(Hopes for a homecoming).

Tusi Faitau- Sefanaia- 3: 14- 20.

Matua- (ff: 19-20). “*Fa’auta, o ona po ia ou te fa’atigā ai iā te i latou uma o e fa’asauā iā te oe, ou te fa’aolaina foi lē ua setusetu, ou te fa’apotopotoina foi lē ua tulia, ou te avatu foi iā te i latou le vi’iga ma le igoa i nu’u uma lava sa fa’amāina ai i latou. O ona po ia ou te aumai ai outou, o ona po foi lava ou te fa’apotopotoina ai outou, ou te avatu ai lava iā te outou le igoa ma le vi’iga i nu’u uma o le lalolagi, pe ā ou fa’afoisia la outou tafega, o outou o vā’ai i ai, o lo’o fetalai mai ai le Alii.*”

O le ā le uiga o le upu aiga iā te oe? I nofoaga i tua i le atunu’u o Mozambique o le aiga, e nonofo fa’atasi i se soifuaga e tasi i le felagolagoma’i o tagata uma e aofia ai le tolu po’o le fa’augā-tupulaga. I atunu’u ua lelei lona atina’eina, o le aiga, ua manatu e nonofo valavala, o nisi taimi ua le mamao tele le va, a’o isi foi taimi, ua matuā vāvā mamao lava pe ā ma se konetineta le va. O nisi ua fa’apea mai, o le aiga, o le nofoaga lea sa fanau ai ma tupu mai ai. O le ala lea e manatu ai e tatau lava ona e toe foi i lou aiga, ‘auā o le aiga o lo’o i ai lou fatu’

O le fegasoloa’i o tagata, ua a’afia ai le sili atu o tagata, na i lo’o latou o lo’o faia le femalagaa’i. O oe o se vaega o le ‘aiga,’ po’o fea lava e te nofo ai ma ola i lenei lalolagi, ma feso’ota’i i isi tagata, o le ā suia ai lava le aiga. O ta’amilosaga o ni faigā-uo fou ma le felagolagoma’i, e umi se taimi e atia’e ai. Manatunatu ifo, pe afai o le ā fa’aauu pea ona leai ni feso’ota’iga, e pei ona faia e le to’atele o nai tagata sulufa’i solo ma le lē saogālemū o le ola, ua fa’amalosia le tu’ua o mea uma, ma fa’amata’uina lo latou ola i le sailiga o se aiga fou. Fa’amata o le Atua o le nofoaga (aiga) lea mo i tatou, o lo’o i le fatu o tagata ola uma, o lo’o fa’amoemoe atu i le aiga lea ua leva ona manana’o i ai?

Tatalo: Le Atua e, o Lē na foafoa ma saunia mea uma, ia e taofia i latou uma ua lē mafai ona latou lagonaina le i ai i aiga i le taimi nei, po’o le ā lava le fa’afitauli. Ia latou feiloa’i ma Oe i le malaga atu i lou aiga. **Amene.**

Aso Gafua Iuni 25, 2018.

“Ua taunu’u Naomi i le aiga,”

Naomi arrives home

Tusi Faitau- Ruta- 1: 19- 22.

Matua- (f: 22). *“Ua fo’i mai Naomi atoa ma Ruta le Moapi, le avā a lana tama, fa’atasi ma ia o lē na fo’i mai mai le nu’u o Moapi, ua la o’o mai i Petele’ema i le amataga o le seleselegā-karite.”*

I le tele o tausaga, sa nonofo ai Naomi ma lana tane ma ona atali’i e to’alua i se laueleele ‘ese. Na latou tu’ua lo latou aiga ma laueleele i le taimi o le oge, ma nonofo feso’ota’i ai i Moapi, ma i’u ina fa’aipoipo atu ai le la fanau i fafine Moapi. Mo se fafine ua oti lana tane, fa’atasi ma lana fanau tama, e fa’apefea ona tatou fa’aigoa se tinā ua feoti sana fanau? Na fa’alogo Naomi ua toe lelei le seleselega i lona laueleele i Iuta, ona sauni lea e toe foi i ai.

E lē o ia o se fafine fai to’alua, po’o se tinā, a’o Mara, ‘auā ua matuā o’ona mea ua faia e le Ali’i iā te ia,’ e pei ona i ai i le tala. I le tala lea, ua tatou a’oa’oina mai iā Naomi, le mea tatou te mafaufau i ai, o le toe fo’i i tua. (ff: 8, 10, 15.). Peita’i, o le mea sa’o ma le moni, o le aga’i i luma le mea na faia e Naomi. I le fa’atauanau a Ruta e nonofo pea ma le tinā o lana avā, na i’u ina malaga uma ai fafine ia e to’alua i le agai atu lenā i luma, o le ā toe fa’amatalaina ai i laua i se isi nofoaga fou.

O le fa’atuatuaina o Ruta, na toe maua ai le uiga fou o lona fa’aipoipo atu iā Poasa le tagata na fa’aolaina o ia mai tigā. O Naomi, sa saili ia toe iloa o ia i lona aiga ma lona nu’u, ae maise o le olioli i le toe talia o ia i totonu o le li’o o ona tagata. O le lu’i mai le manatuaina o lona ta’u, ma le aofia ai o le alofa i lona toe foi, le saogālemū ma se lumana’i manuia e lē gata mo ia lava, a’o tagata uma i augā-tupulaga uma i le lalolagi. O Opetā, o le tamā o le tamā o le tupu o Tavita, le aiga e sau ai le laina o le fa’aola o Iesu. A’o Opetā lenā, na fanaua e Ruta mai iā Poasa, ina ua toe foi ma taunu’u i le aiga moni, ma ua toe fa’amatalaina ai le olaga, e tatau ona aga’i pea i luma tagata uma i le aiga o le Atua.

Tatalo: Le Atua alofa e, galue mai ina ia ou aga’i pea i luma ia maua le fa’afouina atoatoa iā te oe. E te taofia le lalolagi, o

le tuana'i ma le lumana'i i ou a'ao, ia mafai ona ou a'oa'oina lo'u lumanai i le taimi nei. **Amene.**

Mafaufauga Loloto: Fa'aavanoa sina taimi e mafaufau ai i le uiga o le agai i luma, ma le taunu'u i le aiga, mo oe lava ia i so'o se fa'afitauli o le ā lua feagai i le asō.

Aso Lua Iuni 26, 2018. “Ua mautū Paulo i Roma.”

Paul settles in Rome

Tusi Faitau- Galuega- 28: 11-16, 30).

Matua- (ff: 14- 15, 30). *“Ua maua ai ni o matou uso, ua pulutia ai i matou e nonofo ma i latou i aso e fitu, ona o atu lea o i matou i Roma. Ua logona le tala iā i matou e le ‘au uso o i ai, ona latou omai lea e fa’afetaia’i mai iā i matou, ua o’o mai lava i Apio Foro, ma Fale Fa’atau e Tolu, ua va’ai atu Paulo iā te i latou, ona fa’afetai lea i le Atua ma lototele ai. Ua nofo fo’i Paulo i tausaga atoa e lua i lona fale e todogi, ua na talia uma lava ē na ulufale iā te ia.”*

Ua maua e le Ekalesia se misionare ua tu’ua lona aiga ma ua toe fo’i atu e galulue ma i latou. O le tama’ita’i o Marcia, na ia saunia se kuka moa manaia, atoa ma se teu fugāla’au. O Kathy, na ia saunia le anoanoa’i o kuki ma keke felanulanuai e fa’afeiloai ai le misionare. O Ioane, na ia fa’atumuina le pusa-‘aaisa i taumafa e tele. O Ioane fo’i, na alu ane i le tasi aso ma ‘ave le aiga mo se fa’atauga. O Kent, na afe ane i le lona lua o aso ma ‘ave le aiga mo se maimoaga i le taulaga fou. Masalo o se vala’aulia ina ia faia ai se talanoaga e fa’atatau i le olaga ua tu’ua i le aiga muamua, o lo’o fa’aalia ai le loloto o le talimalō ma le fa’afeiloa’i atu i tagata ‘ese i se lauelele ‘ese, ma avea ai ma malō fa’aaloologia.

O le ta’ita’iiga o se fa’amoemoe aga’i i tua i le aiga tuai o le misionare, o se taimi faigatā, ina ua avea le malō fa’aaloologia ma tagata talimalō. O le mautū i se nofoaga, o se gasologa e a’afia ai ma le sau i le aiga. O tagata ‘ese e avea ma malō fa’aloologia ma talimalō iā i latou, ma auai i le gasologa fa’aauau pea lenā. O le mea ua a’oa’oina, o tagata fou i le aiga, o lo’o latou i ai uma lava i le gasologa tutusa lea e tasi, ma ua i ai feso’ota’iga ma ala laupapa ua fausia ai faigā-uo e atia’e ai le fegasoloa’i ina ia matuā lelei ni suiga e tula’i mai. O le ui i le gasologa lea, e tatala ai le iloa o isi i le fa’amoemoe

o ia fa'atinoga. O le amanaiaina o le tasi, o se talimalō po'o se malō fa'aaloogia foi, o le talimalō maualuga lenā. Taumafai e fa'atino ma saga fa'atino pea le talimalō i le lelei e gata ai le lelei i so'o se tagata.

Tatalo: Le Alii e, Iesu, o Oe o le talimalō ma le malō fa'aaloogia i ā matou laulau ma ā matou mafutaga fa'alē-uo i le ala. Ia matou a'oa'oina mai iā te Oe le ola talimalō lelei ma le maualuga i totonu, fa'atasi ma tagata uma. **Amene.**

Mafaufauga Loloto: O le a tou feiloa'i i le asō ma ni tagata o lo'o mafatia i le fa'a'eseina, o le tu'ua to'atasi, tigā ma le lē malamalama, ua na o le Atua na te silafiaina. Avea oe ma tagata talimalō ma tatalo mo i latou.

Aso Lulu- Iuni 27, 2018. “Sa'ili'ili ia manuia le a'ai.”

Seek the welfare of the city

Tusi Faitau- Ieremia- 29: 1-9.

Matua- (f: 7). *“Ia outou sa'ili'ili fo'i ia manuia le a'ai ua ou fa'atāfea ai outou, ma ia outou tatalo atu i le Ali'i mo lenā a'ai, auā o lona manuia e manuia ai outou.”*

O le aga'i atu i taulaga e nonofo ai, o le ā anoanoa'i suiga fou o le olaga e tatau ona a'oa'o ma fa'amasani i ai. O tu ma agaifanua fou, ae maise o le mau filifiliga e faia ai. Po'o le aga'i atu i taulaga po'o a'ai mao tua fo'i, e tele pea lu'itau ma le lē mautonu ae maise o le i'u ina vaivai ai. Peita'i, e fiafia pea ma fa'afouina lagona ona o avanoa fou ua maua, e aumaia ai le malosi ma le mafai e feagai ai ma ia la'asaga fou o le olaga. O lologa i tausaga ta'itasi i nu'u mao tua i Mozambique, e taia le a'ai atoa e latalata ane i vaitafe o Shire ma Zambezi mo le atoa o le vaitau o timuga. O le i'uga, o le lē saogālemū o mea'ai, o fa'ama'i ma le leai o ni mea totino, ma tu'ua ai i latou i le fia-a'ai, o solitulafono, o faigā-malō malepelepe ma le lē mautū, ae maise o le faigatā ma le nenefu o le lumana'i. O le matelaina, na te fa'aitiitia le malosi o tagata e fesoasoani ai le tasi i le isi, ma fa'ateleina ai le fa'alagolago atu i fesoasoani mai isi malō.

O a tatou Ekalesia, ua fa'alaei'auina ona tagata ia galulue mo lo latou lava atina'eina ia manuia ai ma aga'i ai i luma. Peita'i, o le matelaina lava na te lē nanāina a'afiaga o le tagata ola, i

sana taumafaiga ma sona mana’oga ia tali atu i fa’afitauli o tagata lautele i so’o se vaipanoa. O le Sitete o West Virginia, na tupu ai fo’i ni lologa ma tafega e le’i mafaufaina i le vaitau o le Spring. O fale na tafefea ma i latou na maliliu ai. O i latou o fesoasoani muamua atoa ai ma le anoanoa’i o tagata mai le itu e le’i a’afia, na latou sasao fa’atasi ma saunia ai mea’ai, lavalava ma auala o feoa’iga, aemaise o le saunia o ni nofoaga mo i latou na afāina. O se va’aiga lautele ma le vave lenā i fa’ailoga o le pitola’au tauave a le tagata ma le auai ai o le Atua. O lo’o va’aia ai le lalagaina fa’atasi o le taga’i mamao i le lumana’i mo le lelei lautele o tagata uma, ma tatou maua ai fa’ama’itega o le auai fa’atasi i talosaga e fua tele mai. Tatalo fa’apitoa mo le filemū ma le manuia o ō tatou tuā’oi, ina ia maua le malosi e fa’afeso’ota’i ai le fa’apotopotoga, i so’o se mea tatou te i ai.

Tatalo: Le Atua e, a’oa’o i matou ia iloa ona tatalo mo le lelei lautele o tagata, ma le filemū ma le manuia ia va’aia i o matou tuā’oi, po’o le taulaga po’o nu’u i tua. Ia o’o mai lou malō. **Amene.**

Mafaufauga Loloto: E fa’apefea ona avea oe o se vaega o suiga o lo’o e manao e te va’aia i le tou fa’apotopotoga?

Aso Tofi- Iuni 28, 2018. “Ia usiusita’i i e pule.”

Be subject to the authorities

Tusi Faitau- Roma- 13: 1-10.

Matua- (f: 8). “*Aua nei iā te outou se mea e tasi a se tasi tagata, a e tau lava o le fealofani, auā ai se alofa atu i se tasi tagata, ua atoatoa ona faia e ia o le tulafono.*”

Mo le tele o tausaga o lo’u olaga matua, sa ou nofo i se atunu’u e tauivi ma le faigatā o le tau atina’eina ma maua ai se mapusaga mai le tele o tausaga ma tausaga o Mozambique. E ui lava ina maua tupe i sina totogi i le lalolagi atia’e ua i ai nei, ma ua faigofie ai le olaga na i lo’o le mea sa i ai i taimi a’o laiti. Peita’i, o nai o’u tuā’oi e ta’ua o ‘agrarian’ o lo’o ola pea i se olaga faigatā ma le pagātia, e fa’amoemoe i timuga mo se vai, e siosiomia i le popole i tala i le fa’afouina pea o fete’enaiga ma i latou e i ai le pule, o lo’o malepe ai le malō, ona o le fa’aaogāina o le malosi o nai tagata ia, e maua ai o

latou manuia. Ua avea pea i matou o tagata 'ese (mazungus), vaganā ai o matou nofoaga (bairro), o le lotu ma le maketi. O fafine e sili atu ona pagātia ma mafatia, ma tamaiti ua sili lea ona avea ma avega mamafa o le mafaufau. Sa ou a'oa'oina mai i'ina le manatu e fa'apea, o le malosi po'o le paoa (pule) o le tagata e to'atasi, e tatau ona fa'aaogāina e fa'amalosia ai isi tagata.

E lē faigatā ona tatou iloa le uiga o le pulē po'o le paoa i ona aiā fa'alē-tagata, ae maise lava pe afai e o'o le olaga i le tele ma le anoanoa'i o le ola fa'atusatusa. E matuā faigatā ona va'aia po'o afea e mafai ai e se tagata 'ese ona fa'amautū i se eleele fou. Peita'i, ua leva ona lē toe avea oe ma tagata 'ese, a'o se tagata moni o se atunu'u 'ese, e tutusa i le gagana ma aganu'u. Ina ua ma'ea ma uma lelei faiga fa'avae o tagata femalagaa'i, ona aloaia loa lea ona talia o 'au e i latou o i ai le pule. Na fa'aaauu ona latou talia o 'au i aso uma, ina ua fa'alogoina e tagata ua ou fa'aleoina lelei la latou gagana. E to'atele i latou na nonofo e pei ona matou faia, o nisi ua sili atu ona lelei. E umi se taimi e iloa manino ai, po'o le ā le mafua'aga e vaevaeina ai se sosaiete i le va o 'tatou' ma 'latou.' po'o 'totonu' ma 'fapo'. Mo le i ai fa'atasi i totonu o le vaega to'atele, ua ou a'oa'oina ai, o le paoa po'o le pulē e tatau ona avea ma tagata e tausia isi tagata.

I Roma, na tautala ai Paulo i le alofa i le isi tagata e lē o se aitalafu i le tulafono (f:8a). a'o le pulē silisili mai le Atua e fa'atino i mea uma tatou te i ai, o le fealofani. Pule ma alofa i isi tagata, pe amanaiaina ma mamalu, pe lē taualoa ma pagātia. Ia tatou ola mo le tu'uina atu o i tatou mo isi tagata. Fa'amata e mafai ona tu'uina atoatoa o tatou tagata e olaina ni suiga 'ese mai, e ala i le ofoina atu o le pulē mai totonu o tatou fatu e alofa atu ai i isi?

Tatalo: Le Atua Tolutasi e, i le malosi'aga o lou alofa, o le alofa o lo'o faasoasoa iā i matou uma ma lau foafoaga atoa. Ia avea i matou o ni tagata ua lauiloa ua ofoina atu mo Oe e ala i le alofa atu i o matou loto ma agaga ma le malosi atoa.

Amene.

Mafaufauga Loloto: E fa’apefea ona e malamalama i le pule ma ou aiā, ma lo tatou vala’auina e tali atu i le alofa i lo tatou lalolagi?

Aso Faraile Iuni 29, 2018.

“Fa’asoaso le laueleele ma le vai.”

Sharing land and water

Tusi Faitau- Kenese- 26: 12-33.

Matua- (f: 22). *“Ua tu’ua e ia lea mea, ua eli le tasi vai, ua latou lē fefinaua’i ai, ona ia fa’aigoa ai lea o Reopo, ua fa’apea ana, auā ua fa’alauteleina nei e le Ali’i se mea e nonofo ai, tatou te uluola ai i le nu’u.”*

O le laueleele ma le vai, o vaega patino ia i tagata agrarian ma so’o se tagata lava o lo’o ola i le olaga fa’aonaponei i taulaga. Peita’i, o i latou o lo’o aumau i le taulaga, ua galo vave iā i latou le mana’oga o tagata mao tuā, i le na o le ki lava o le paipa. O le talafa’asolopito ma tala o le lalolagi i ona tuā’oi, ua fuaina lea i le laueleele ma le vai, ma lo tatou popolega lenā mo le lumana’i. O le laueleele ma le vai, o mea totino ia o le tala i le foafoaga, ua atoatoa ona fausia i le mata’isau ma le potu o le Atua, ma ua i ai lona a’afiaga tele i totonu iā i tatou, auā e matuā aogā ma tāua mo lo tatou ola. O le laueleele ma le vai, o meaalofa a le Atua, e ui ina tatou iloa faitioga ma fete’enaiga ona o laueleele ma vai ua lē utuva ona tuputupu pea le fa’aleagaina.

O le faitauga o le asō, Ua tatou va’aia ai le i ai o se vai ‘eli, o se avanoa ua fausia o se meaalofa mo le saogālemū, filemū, fa’amanuiaga ma le fa’amalieina. O meaalofa a le Atua, ua faigofie ona tatou ta’ua ana mealofa ia, “o tatou lava,” ma tatou suia ai le uiga o ana meaalofa i le fetau’i ma le femisaa’i, le malaia ma le fa’aleagaina. E lē gata i le na, a’o le fa’atulagaga ma le fa’agasologa o lo tatou olaga, ua fausia ai avanoa e taofi mau ai i luga o i latou o lo’o i ai le pule ma le paoa i laueleele ma vai, ua manumalo ai i latou i le soifua o tagata fa’atauva’a ma maulalo o latou tulaga. Ua lē manatuaina ma leai so latou malosi ina ua tatou fa’auigaina ma tusilima i ai o tagata matelaina.

O le alualu i luma o le tekonolosi, ua mafai ai ona toe soso’o nisi o laueleele ma vai i le talafa’asolopito e le’i mamao atu. E ala i lo latou fa’afesāga’i ma iloa ai, pe fa’apefea e isi ona

tu'ua o latou mana'o ma le fa'anaunauga o loto i se laueleele ma vai mo mea'ai e tatau ma le aso, o le fa'amalieina, ua manuia ai tagata uma. Afai e te ola ma avea oe ma tagata e fa'a'uo i tagata o lo'o pagatia ma mafatia i le soifuuga, po'o fea lava o lo'o e mautu ai i le isi itu o le ala laupapa, o le olaga e 'ese'ese nofoaga, ae feso'ota'i fa'atasi tagata. O le laueleele ma vai fo'i, e tatau ona feso'ota'i ma fa'asoa fa'atasi.

Tatalo: Le Atua o le laueleele ma le vai, ia mafai ona matou fa'alogo ma va'ai i avanoa ma le fa'amalieina ua e saunia mo i matou uma. **Amene.**

Mafaufauga Loloto: Fa'aavanoa sou taimi e a'oa'o ai e faatatau i se atunu'u patino se tasi o le lalolagi, ma mafaufau i fa'afitauli e pei o le tagi a tagata sulufa'i, ma ia e manatunatu lelei i sau tali atu i ai.

Aso To'onai- Iuni 30, 2018. "Ofoina atu o ulua'i fua"

Offering the first fruits

Tusi Faitau- Teuteronome- 26: 1-15.

Matua- (ff: 10-11). *"O lenei fo'i, le Ali'i e, fa'auta mai, ua ou aumai le fa'apolopolo o fua o le laueleele, ua e foa'iina mai ia te 'au. Ona e tu'uina atu ai lea i luma o le Ali'i lou Atua, e te ifo atu fo'i i luma o le Ali'i lou Atua, ia e olioli fo'i i mea lelei uma lava ua foa'iina mai e le Alii lou Atua ia te oe ma lou aiga, o oe, ma lo Sā Levī, ma le tagata 'ese o ia te oe."*

O le tausamiga maualuga o seleselega, o le ofoina atu o ulua'i fua o fa'atoaga e fa'amanatu ai le lelei silisili o le Atua ma lona i ai i lona aiga ma tagata, o aso malolō o le Aso Faafetai. A'o ou tusia nei mafaufauga, o lo'o o'u va'ava'ai atu i le fa'amanatuina o le aso fa'afetai mo le ulua'i taimi talu ona ma fa'aipoipo ma lo'u to'alua ma lona aiga atoa. E o'o lava fo'i i le ma fanau o le ā omai fa'atasi uma e fa'atasi ma le tinā o lō latou tamā, o tuafāfine o lō latou tamā, o uso ma tauaiga uma o lō latou tamā, ae maise lava o o latou mātua. Ua matuā malie ma fīafia lo'u loto i le avanoa mo le aiga tele, ma ua mafaufau o le ā kukaina uma lava ipu o taumafa 'ese'ese i tu ma aga e masani ai, o le pīpī, o le maukeni ma pai e gaosia i apu, o 'umala ma isi lava mea ua masani ai. O se matuā fiafiaga tele, ma ua taula'i lava i ai le va'ai i le na aso pe ā o'o mai.

E lē fa'apea ona ou te le'i fa'amanatuina muamua le Aso Fa'afetai, peita'i, ona o le isi atunu'u e itiiti ma 'ese'ese ai mea e fa'atino ai. O uo e potopoto ma saili ni auala fou e fa'amanatu ai lea aso. O le tu'uina atu o le fa'afetai i le Atua mo mea lelei uma o le tausaga ua mavae. E o'o lava fo'i i aiga e mamao, o le fa'amamafa lava e tasi, ia matuā fa'ateleina le fa'afetai. E i ai le sitepu e tasi e feso'ota'i ai le fa'amanatuga ma le tupu pea o le agaga fa'afetai, i le manatuaina o le meaalofa silisili ua uma ona foa'iina mai mo i tatou. Va'ai i le manaia ma le lelei o le ola fa'afetai i le Atua. Peita'i, o le ofoina atu, e lē faia fa'atasi i le tausaga. Ua valaauina i tatou e le talisuga a le Alii ina ia tatou faia ma masani i aso uma le ofoina atu o le loto fa'afetai i le Atua. Ia aiāina e le loto fa'afetai o tatou tagata i aso uma ma taimi uma. O le vala'auina lea o i tatou i le fa'afou atoatoa o le ola ma o tatou olaga i taimi uma. E o'o lava i taulaga e faia, i taimi o le papatisoga, o fa'aipoipoga, o le maliu, ia fa'ailogaina lava i le agaga lea o le faafetai, ma tatou te fa'atunu'uina ma fai pea lea ma fa'amanatuina o le olioli tele i le tatou tali atu i le olaga.

O le tausaga lenei, ua matuā tatau ona tatou fa'amanatuina ma faia pea le omai fa'atasi o aiga e fa'asoa fa'atasi, auā tatou te mafaia ona fai. O le malaga mai i le atunu'u lenei, ua mafai ai ona faigofie ona ou auai i le fa'amanatuina fa'atasi, o se sao e fa'apitoa mo se nofoaga ma se aiga. O se mea ua matuā lelei tele.

Tatalo: Ona o le olioli ua tele, ua matou fa'amanatuina ai lou alofa ma lou soifua ofoina mai mo i matou, ona o le fiafia, ua matou iloa ai o matou manuia. Le Alii e, ua matou tatalo ia a'oa'o mai i matou ina ia fa'aauau ona matou tu'uina atu ia fa'amanuia ma le loto faafetai, **Amene.**

Mafaufauga Loloto: Toe manatunatu i lou olaga ma tusi i lalo ni mea tāua e te fa'afetai ai i aso uma ma lenei vaiaso, fa'aauau atu i se masina, ma ia fa'asoa atu lau lisi i au uo. Fiafia i le na mea.

